

أحمد يونس
7 نادر فوده
الأعوات....

مكتبة نجاد
على الهاتف



أهداء

امي ...

سأظل أهديك يا حبيبتي كل عمل أقدمه ، لأني سأظل
أتنفس عشقك حتى يأتيني النفس الأخير ويحين اللقاء ...
ولدك الصغير أحمد

(مقدمة)

لطالما تركت نفسي للأحداث والأشباح كي تقودني كيفما شئت، ففي العذراء والجحيم ؛ وجدت نفسي أقوم بدور المحقق متناسياً تماماً مهنتي الأساسية، وهي الصحفي الباحث عن المتاعب وأبواب الظلام، أفتح أبوابها وأدخل دون إستأذان، لكنني نويت في هذه المرة أن أتحدى الظروف مهما كانت، وأن أعود أدراجي إلى مهنتي الحبيبة، كصحفي يسمع و يسجل و يحلل و يروي، صحفي يعشق المغامرة مهما طالته من مخاطر.

اسمحوا لي أن أردد عليكم الجملة التي تعشقونها مثلي تماماً و ربما أكثر...

أنا الصحفي نادر فودة، الصحفي بجريدة عمق الحدث باب ما وراء الطبيعة، الرجل الذي لا يُغمض له جفن، إلا بعد أن يتحدث مع الجن والعفاريت، الصحفي الذي وجد في الأشباح والشياطين أصدقاء مخلصين، الصحفي الذي يرى أن يوم ميلاده، هو اليوم الذي رُج بي داخل أحد القبور، وواجه الشياطين وهواجسه ومخاوفه عن هذا المكان الموحش، الصحفي الذي إذا رغبت أن تقدم له هدية قيّمة، فلا تقدم له قلب مُحِب على طبق من فضة، بل قدم له رأس مفصولٍ داخل كفن رث، الصحفي الذي لا يسعد بزيارة أقاربه

قدر ما يسعد بزيارته لدجال أو ساحر أو أحد الروحانيين.

إذا؛ فأنتم الآن مع موعد إقلاع الرحلة السابعة لنادر فودة مع الأعوان..

قلل إضاءة من حولك، استمع إلى الموسيقى المُخيفة المفضلة في قائمتك، أترك هاتفك، أغلق عليك باب عُرفتك، واستمتع بهذه الرحلة التي ينقلها لكم كالعادة على لساني صديقي العزيز ورفيقي الدائم أحمد يونس.

الفصل الأول

(نحاس)

من واقع سنين طويلة وخبرات مُكتسبة بيقدّر الإنسان
يكتشف أبعاد أخرى للكون و يصدق و يقتنع تماماً إنه أصبح
مُلم بكل شيء، وإذ فجأة يتعرض لموقف ما أو تجربة ترجعه
لنقطة الصفر فيُدرِك إنه ما تعلمش حاجة.

الشاهد من كلامي إني كل ما أخوض معركة من معارك
عالم الظلام أخرج منها وأنا مقتنع تمام الإقتناع إني أصبحت
مؤهل تماماً لخوض المزيد من المعارك ومع أول موقف بتأكد
إني مجرد تلميذ مُجتهد في عالم ما وراء الطبيعة و إني لسه
قُدامي كثير جدّا علشان أزعم إني لدي ما يكفي من الخبرات
الحياتية.

ليه بقولكم كده؟

علشان بعد روايتي إلي فاتت وفي نهايتها لو تفتكروا
إتقلبت الموازين تماماً لما كُنت فاكِر إني بخبرتي قُدرت
أحل لغز أميرة وسامر ولكني إكتشفت إن في طرف ثالث
قارئ الصورة من البداية وحطلي عنصر يساعدي إني أكمل
للنهاية، الطرف ده كان (هالة).

هالة إلي ضيعتها بغبائي (رواية النقش الملعون)، هالة إلي

ما سببتش ليها غير كل حُزن في مُقابل إنها ما سببتش ليا
غير كل خير، ومن يومها لحد النهاردة وأنا عندي أمل إنها
تظهر أو حتى تجيلي في المنام، لكن من الواضح إن عقاب
هالة ليا بإنها تفضل تساعدني من غير حتى ما أشوفها.

كان نفسي أقولكم السيناريو إللي أنتوا مستنينه إنها ظهرت
وإننا قعدنا مع بعض وإننا لقينا حل يجمعنا من عالمين
مُختلفين، كان نفسي أقولكم إن الإنسانة الوحيدة إللي قلبي
اتحرك بسببها موجودة جنبي وأنا بكتب لكم الكلام ده، لكن
حقيقي ليس كل ما يتمناه المرء يُدركه.

قطع إبحاري في عالمي الخاص صوت تليفون مكتبي وهو
بيرن بإتصال من مديري المباشر.

نادر: أيوة يا فندم

المدير: تعالى يا نادر عاوزك

نادر: تحت أمر حضرتك.

قومت من مكتبي وروحت على مكتب أستاذ عماد على
طول إللي استقبلني بحفاوته المعتادة ودعاني للجلوس ودار
بيننا الحوار التالي..

عماد: ما شاء الله شايف الملف ده؟

نادر: ملف إيه يا فندم؟

عماد: دي مبيعات الجورنال الأخيرة

نادر: أه تقصد حضرتك من وقت ما أنا جيت

عماد (مقاطعًا): لا أقصد من وقت ما أنا جيت

نادر (متهكمًا): خلاص همشيها من وقت ما أنت جيت، بس أحب أفكرك إن إليّ قبلك لما نسب لنفسه كل حاجة اتغضب عليه

عماد (مُبتمسًا): يا راجل أنا بهزر، طب بذمتك أنا عمري بخست حقك؟، ده أنا مابقولش غير نادر راح نادر جه، ده حتى أكلة السمك إليّ وعدتني بيها طلعت بايظة

نادر: والله حضرتك إليّ طلبت أجيبك سمك من آخر الدنيا

عماد: يلا خير، المهم أنت فين؟

نادر: ما أنا واقف قدامك أهو

عماد: ما تستعبطش يا نادر أنت فاهم سؤالي كويس

نادر: أستاذ عماد عاوزك تعرف حاجة أنا شخص مش بتاع (عبي وإحشي)

عماد: بمعني؟

نادر: بمعنى إني مش علشان حضرتك عاوز تبيع أقوم أنا
أحشي أي حاجة

عماد: يا بني افهم أنا لسه بقولك مبيعاتنا تضاعفت بسببك
وإن مجلس الإدارة مبسوطين بشغلك قد إيه

نادر: ولو، أنا بني آدم محسوك ومش هعمل حاجة تقلل من
رصيدي، وبعدين تعالى هنا أنا مديك قصص تغطي بتاع 6
أعداد لسه جايين، هي طفاصة وخلاص؟!

عماد: القصص إلكي من تأليفك يا نادر حاجة والتحقيقات
إلكي أنت بتخوضها حاجة تانية

نادر: والله على ما أتذكر إن حضرتك إلكي طلبت تنشر
القصص بتاعتي في الأوقات إلكي مفيهاش تحقيقات حتى
كمان قولتلي إنها عظيمة ولازم تظهر للنور

عماد: هو أنا معرفش أقول كلمتين لمصلحة الشغل إلا لما
ترد علينا بموشح؟

نادر: لا موشح ولا حاجة أنت سألت وأنا جاوبت

عماد: طب وحوار نحاس؟

نادر: بشتغل عليه

عماد: طب ما تقول كده من الأول

نادر: هو أنت سألت؟

عماد (متنهدًا): أديني سألت ممكن تعرفني عملت إيه في موضوع نحاس؟

نادر: شغال عليه

عماد (غاضبًا): هو حرام تريحني وتقول بتعمل إيه؟

نادر: هو أنا من إمتى بقول لحد أنا بعمل إيه!

- بعد إذنك أنا راجع مكتبي وماتنساش تطلعلي فلوس انتقالاتي والإقامة للكام يوم إالي جايبين

عماد (مبتسمًا): أخيرًا قولت الجملة إالي مستني أسمعها! يا أخي ده أنا بستناك تطلب الفلوس زي ما أكون أنا إالي هاخدها

نادر (مبتسمًا): علشان عارف إني طالما طلبت فلوس يبقى في تحقيق جاي، بعد إذنك.

خرجت من مكتب أستاذ عماد وأنا مبسوط لحالة الاستفزاز إالي بسببهاله وإالي من المؤكد إني سببتها ليك أنت كمان وأنت بتقرأ، صدقوني أنا مش شخص مُستفز و لا حاجة، الحكاية و ما فيها إني تعبت و شقيت لحد ما وصلت للمكان إالي أنا فيه و للأسف كما جرت العادة إن المديرين ينسبوا

لنفسهم نجاح أي حد مُجتهد زَيِّي فكان قراري إني مش
هسمح لحد أبدًا يسرق تعبى علشان هو مجرد منصبه أعلى
مني في الشغل.

طبعا عاوزين تعرفوا إيه حوار نحّاس؟

نحّاس ده شغال مُسعف وفي فطار رمضان إالي فات بتاع
الجورنال لقيت شخص غريب جاي يسلم عليا وقال:

نحّاس: حضرتك أستاذ نادر صح؟

نادر: أيوه تحت أمرك

عماد (ضاحكا): والله وبقالك فائز وجايين يتصوروا معاك
يا أستاذ نادر

نحّاس: لأ أنا مش بتاع تصوير والكلام ده، أنا جاي للراجل
ده تحديداً لأنني قرّيت تحقيقاته في الجورنال وكل مرة
بتأكد إنه إنسان مُخلص و مُجتهد و كل إالي بيقوله صدق
وما فيهوش مبالغة أو كذب.

اعتدل نادر في جلسته وقال: وأنا يشرفني أسمع حضرتك،
أؤمرني

نحّاس: أنا إسمي نحّاس عندي ٤٨ سنة و ببساطة كدة أنا
شوفت أهوال كتير و حاجات تشيّب و دورت عليك كتير

علشان أحكيها لك لكني معرفتش أوصلك، وشبحان الله
النهارده ومن غير ترتيب ألاقك قاعد بتفطر في الترابيزة
إلي جنبتي.

نادر: كله بميعاده ياعم نحّاس، اتفضل قول وأنا سامعك
نحّاس: لأ مش هينفع هنا، لا الزمان ولا المكان هينفعوا،
الورقة دي فيها رقم التليفون كلمني بعد العيد وهحكلك كل
حاجة من طقطق ل سلامو عليكموا

نادر: بس أنا مافهمتش اشمعنى أنت إلي شوفت كمية
الأهوال إلي قولت عليها

نحّاس: يكفيك إني أقولك إني شغال مُسعف؟
تبدلت ملامح نادر ونظر لنحّاس باهتمام أكثر
نحّاس: أيوه هو إلي جه في دماغك دلوقتي
عربية إسعاف وميتين بمليون شكل وطريقة و أسرار
مايعرفهاش غير واحد زي إلي واقف قدامك دلوقتي
نادر: خلاص وصلت ياعم نحّاس، هكلمك.

طبقت الورقة وخطبتها في جيبتي وقولت هكلمه فعلاً بعد
العيد لعل وعسى تُخرج بتحقيق جديد.

وشغل بالي حاجة غريبة جدًا، ومعرفش ليه فكرت في الموضوع كده، لاحظت إن عم نحاس راجل مُصطنع، كلامه مرتب، وهدومه منمقة، ده حتى كان لابس بليزر عليه علامة ماركة، باين عليها إنها غالية جدًا، يعني أعتقد ده بمرتبته في شهر كامل، وأعتقد بردو إن شغلانة مسعف زيها زي أي شغلانة بسيطة، مش مدير بنك يعني عشان يلبس كده ويتكلم بالطريقة دي، ورجعت شيلت الأفكار دي من دماغي وقولت لنفسى مليش دعوة، الله أعلم بحاله وحياته، وبعد العيد مش بعيد إن شاء الله، أنا يهمني أكتب وأسمع، مش التحري عن الأحوال الاجتماعية..



عدى على الموضوع ده ٧ شهور وكل ما أجي أكلمه يحصل حاجة تمنعني، مرة أتشغل في تحقيق جديد، مرة أسافر البلد لأمي وأختي، بس أعتقد إن كده آن الآوان إني أكلمه، بس على الله ألاقي الورقة إالي فيها رقم تليفونه.

روحت البيت ومن قبل ما أغير هدومي قلبت الدنيا حرفيًا على الورقة، وإالي كنت خايف منه لاقيته الورقة ملهاش أثر! ما أقولكمش على كمية الإحباط إالي حسيته، جهزت وجبة

خفيفة و صبيت عصير البرتقال، اتغديت ودخلت أريح شوية
مع إني مش من مُحبي نوم العصاري، فضلت أتقلب على
السريـر

شوية أعصر في دماغي وأفكر أنا شايل الورقة فين ولسه
هروح في النوم لقيت باب الشقة بيخبط قومت فتحت الباب
لقيت آخر حد كُنت ممكن أتوقعه واقف على الباب، نحّاس!!
نادر: إيه أنت، أنت، أنت!!

نحّاس: مالك يا أستاذ نادر؟ ما كنتش عاوز تشوفني ولا
إيه؟

نادر: بالعكس أنا لسه كُنت بدور على رقم تليفونك، أنت
عرفت عنواني مين؟ و ليه دلوقتي بالذات جيت لي؟
نحّاس: حلم

نادر: يعني إيه؟

نحّاس: شوفتك إمبارح في حلم بتتصل بيا وبتقولي إنك
عاوزني وحتى بتعتذرلي إنك اتأخرت عليا، صحيت من النوم
و قولت لازم أجيلك بأي طريقة، فضلت أدور لحد ما جبت
عنوان الجورنال، ولما روحت قالولي إنك لسه ماشي من
شوية ومارضيوش يدوني العنوان إلا واحد منهم خرج

ورايا برة وإداهولي، حتى بالأمانة إداني الورقة دي وقال
أوصلها لك وما تفتحهاش غير بعد ما أنا أمشي

نادر: لا تمشي إيه بقى إحنا عاوزين نتكلم

نحاس: صدقني هنتكلم، متقلقش هجيلك الجورنال بكرة
وهنتكلم

نادر: تمام إتفقنا هستناك بكرة.

وخرج نحاس ودخلت أوضتي في اللحظة دي حسيت إن
إيدي قافلة ومتبته على حاجة، فتحتها لقيت الورقة إيلي
نحاس إدهالي فتحتها لقيت مكتوب فيها عنوان في منطقة
الحسين، إيه العنوان ده؟

ومين من الشغل إيلي باعتهولي؟

وباعتهولي ليه؟

على العموم بكرة مش بعيد.



تاني يوم الصبح من أول ما دخلت الجورنال و أنا عمال
أسأل مين إيلي قابل نحاس من الموجودين، للأسف بسبب
الشهرة إيلي اكتسبتها من كتاباتي بقى بيجي الجورنال ناس
كثير يوميًا يا إما تسأل عني يا إما تسبب لي جوابات عن
تجاربيهم الفرعية وعلشان كدة محدش إداني إجابة مفيدة
لسؤالي.

خمس ساعات هي مدة إنتظاري لزيارة نحاس كنت مجهز

الورق و جهاز التسجيل و أقلامي علشان أدون و أسجل كل حاجة يقولها لكن للأسف مجاش.

طلّعت الورقة من جيبى وبصيت على العنوان المكتوب و كان القرار فعلاً زي ما إنتوا بتفكروا دلوقتي إن أنا أروح هناك.

لما اتحركت من الشغل كانت الساعة حوالي أربعة عصرًا وصلت العنوان حوالي الساعة خمسة ونص، البيت كان في حارة ضيقة تحسه بيت أثري عتيق، طلّعت الدور الثاني زي ما مكتوب في الورقة، فتحت لي لما خبطت واحدة ست في أوائل الخمسينات.

نادر: هو ده بيت مين؟

الست: خير اللهم اجعله خير، أنت مين يا بني وعاوز مين؟

نادر: معرفش

الست: هو إيه إيلي ماتعرفش؟ جاي بتخبط عليا وبتقول مين؟! هو حضرتك من بتوع التعداد ولا حرامي فاكروني حيلتي حاجة، أدخل دور بنفسك ولو لقيت حاجة ابقى خُدها

نادر: لأ أنتي فهمتي غلط طب تعرفي حد اسمه نحاس؟

الست: أنت عاوز إيه يا بني من الآخر أنا مش قادرة أقف

نادر: معرفش أنا كل إللي أعرفه إن في واحد اسمه نحّاس
جابلي الورقة دي وكان في اتفاق نتقابل وما إتقابلناش

السّيت: نحّاس قالك إن أنتوا هتتقابلوا؟!

نادر: أقسم لك ده إللي حصل

السّيت: اتفضل يابني أدخل

نادر: طب قبل ما أدخل سؤال واحد، أنتي تعرفي نحّاس؟

السّيت: نحّاس يبقى جوزي يابني بس هو حرّج عليا ما
تكلمش مع حد غريب.

دخلنا، البيت من جوا بيت بسيط جدّا بيغلّب عليه الكآبة،
وكان فيه برواز خضني، كان برواز كبير مرسوم جواه منظر
طبيعي، لغروب الشمس على مقابر!!، محطتش في دماغي،
لأن الست فضلت تلح عليا إلحاح شديد إني أشرب كوباية
شاي، ووافقت..

السّيت: أنا يابني اسمي راضية

نادر: عاشت الأسامي أنا عارف إنك قلقانة مني وده حقك
بس لما عم نحّاس يشوفني هتتطممني

راضية: أنا افتكرتك يابني مش أنت إللي كُنت موجود في
المطعم رمضان إللي فات وجوزي جه وقف معاك؟

نادر: بالضبط كده الله ينور عليك

راضية: عاوز من نحّاس إيه؟

نادر: هو إللي عايز مش أنا إللي عايز وهو إللي إداني
العنوان ده لما جالي إمبراح

راضية: أنت بتقول إيه يابني؟ نحّاس مات من ثلاثة شهور

نادر (بينه وبين نفسه): أنا مابقيتش أستبعد حاجة

راضية: أنت بتقول إيه؟

نادر: لا ولا حاجة علشان لو حد تاني سمع الكلام ده كان
خاف وإستغرب وخرج يجري، لكن إللي قاعد قدامك ده
شاف وسمع كثير أوي

راضية: طب لما جالك إمبراح كان عاوز منك إيه؟

نادر: كان عاوزني أجي هنا علشان يحكي إللي عنده

راضية: إن كان على إللي عنده، فهو كان عنده كثير وياما
قولتله بطل تحكي أحسن الناس يقولوا عليك مجنون

نادر: طب ما تحكي أنتي لأن ديه هعتبرها وصيته إني
أكتب إللي عنده

راضية: ويحصلني زيّ إللي حصله؟!!!

نادر: هو إيه إللي حصله؟

راضية: نحّاس ما ماتش مودة ربنا

نادر: كل الموت يا ست راضية موت ربنا

راضية: لأ، إلا مودة جوزي

نادر: ممكن أعرف هو مات إزاي؟

راضية: هقولك في الوقت المناسب

نادر: والوقت المناسب ده إمتى يا ست راضية

راضية: لما تعرف إللي كان عاوز يحكيهولك الأول

نادر (محاولاً السيطرة على غضبه): هو إحنا هنفضل نلف
وندور ورا بعض كتير النهاردة؟! هو إيه الوقت المناسب أو
ابعتيني لحد من إللي قولتيلي إنه حاكلهم علشان يعرفوني
إللي حصل

راضية: لأ

نادر: وأخرتها؟

راضية: مش الأستاذ بيعرف يقرأ بردو؟

نادر: على قدي

راضية: طب استنى

دخلت راضية جوا ورجعت معاها كشكول كبير وإدتهولي

راضية: قولتك مش هتحتاج حد يحكيك أي حاجة،
نحّاس بنفسه حاكي كل حاجة هنا في الورق ده

أخذت الكشكول في خُضني كأني لقيت كنز وشكرتها و
قومت بسرعة علشان أخلص من كلامها ومراوغتها ليا وأنا
طالع من البيت قالتلي:

راضية: خلّص وارجلي علشان أحكيك إيه إيلي حصل
لنحّاس في آخر أيامه و إيه إيلي حصلي أنا بعد ما هو مات،
ونفس إيلي قولتهوله هقولهولك ما تتكلمش مع أي حد عن
إيلي هتقرأه، مع السلامة يابني.



الفصل الثاني (مذكرات نحّاس)

روّحت البيت في زمن قياسي وعندي فضول أعرف
مذكرات نحّاس فيها إيه.

قعدت على السرير، طلّعت الورق و الأقلام و جهاز
التسجيل و جهزت عصير البرتقال وبدأت أقرأ.

مبدئياً من الواضح إن المذكرات دي اتكتبت على فترات
متباعدة، بعض الورق قديم مُتهالك والبعض حالته متوسطة
والبعض لسه جديد، ماينفعش أقول عليه كشكول زي ماهي
قالت لأنه ببساطة هو عبارة عن ورق كتير متجمع من مصادر
مُختلفة ومتدبس في بعضه.

خليني أقرأ لكم المذكرات زي ماهي مكتوبة بالضبط.

مذكرات نحّاس...

مش عارف أبدأ منين أنا لا بعرف أكتب مذكرات ولا
عمري مسكت ورقة وقلم كتبت حاجة غير تصاريح تسليم
المصابين والأموات.

بس هكتب، هكتب أحسن ما يقولوا عليا مجنون، هكتب
يمكن حد يصدق، هكتب قبل ما أموت نفسي أو حد منهم

يموتني.

أنا اسمي نحّاس، ماشي في التسعة وأربعين سنة، بشتغل مُسَعِف بقالي زيادة عن خمستاشر سنة، لو قولت إني نقلت ألف حادثة مش هكون كداب إن منهم 900 حالة وفاة، ده أنا زمايلي في الشغل سموني (نحّاس الموت علينا حق).

أنا وصلت لمرحلة إن كل ما بيجيلنا بلاغ بحادثة وبكون في الوردية بتاعتي بروح وأنا متأكد إني مش هلاقي ولا واحد عايش وهلاقيهم كلهم ميتين.

مش ده المهم، المهم إللي هحكيه دلوقتي..

القصة بدأت بحادثة كبيرة على الأوتوستراد كانت ميكروباص و عربية نقل، لما وصلنا لقيناهم كلهم ماتوا ماعدا شيخ كبير عُمره فوق الثمانين سنة كان بيلْقُظ أنفاسه الأخيرة وإحنا بنشيله كان عمال يقول: الأمانة منقولة.. الأمانة منقولة، الأمانة منقولة، وشاور بإيده بوهن وضعف شديد قربت ودني منه فقالّي: اقبلها يا بني اقبلها

قولتله: هي إيه يا حاج؟

الشيخ: بالله عليك اقبلها دي أمانة ومسئولية

نحّاس: حاضر يا حاج ماتتعبش نفسك بس واهدي خالص.

كان رده عليا:

أشهد أن لا إله إلا الله.. وأشهد أن محمد رسول الله

ومات! مات وسابلي لُغز مش فاهمه و إليي اكتشفته إن
المُسْعِف إليي كان معايا ماسمعش أي حاجة من الكلام ده!

ده كمان بيحلف لي إني كُنت بكلم نفسي وإن الراجل ميت
من وقت ما وصلنا.

طلعنا على القسم عملنا المحضر المُعتاد وإليي بنعمله دايمًا
في الحوادث ومنه طلعنا للتلاجة سلمنا الجثامين و كان
ميعاد ورديتي خلص ورّوحت، أقدر أقول إن من اليوم ده
حياتي اتبدلت ١٨٠ درجة و البداية كانت بأحلام كتير جدًا كل
ليلة بالشيخ إليي كان في الحادثة، الأحلام كانت عبارة عن
إعادة كل إليي حصل من وقت ما روحت مكان الحادثة لحد
ما سلمت الجثة ورسايل تانية غير مفهومة، لحد ما في يوم
كُنت بنقل جثة واحد وواحدة من بيتهم، إليي حصل وإحنا
في الطريق وزميلي السواق جنبي فجأة زغرودة جت من
مكان الجُثث أنا حرفياً موتت في جلدي لدرجة إني مابقيتش
عارف أنطق وبصيت لزميلي لقيته مركز في الطريق وكأنه
ماسمعش أي حاجة، فمكنش قدامي غير إني ألتزم الصمت،
مفيش دقيقة أو دقيقتين بالكثير وانطلقت الزغرودة الثانية،
صرخت في زميلي و قولتله أنت مش سامع إليي بيحصل؟

قالي: لأ مش سامع حاجة

مكملش الجملة و إذ بصوت طبل و دفوف وزغاريد ينطلق من عند الجُثث، إلتفت ورايا لقيت الجُثتين قاعدين! صرخت في زميلي و طلبت منه يوقف العربية، نزلت أجري من العربية و فتحت الباب إالي ورا لقيت الجُثث نائمة على السراير زي ما حطناهم بالضبط وزميلي مفيش على لسانه غير أنت إتلبست يا نحّاس، أنت اتلبست يا نحّاس، حلفت ما أنا مكمل المشوار في العربية، قولتله اسبقني وهحصلك بالمواصلات.

إلي عرفته بعد كده إن الإثنين دول كانوا عرسان وماتوا بتسريب غاز يوم فرحهم.

ده كان أول موقف أتعرض له و بدأت المواقف تتوالى.

تاني مرة كُنا بننقل جُثة سِت ماتت في انهيار عقار، إحنا نقلنا في الحادثة دي جُثث كتير ودي كانت آخر جُثة، كُنت يومها أنا إالي سايق العربية و زميلي جنبي لأنه كان مطبق ورديتين فعرضت عليه إني أسوق و وافق، في عز كلامنا أنا وهو سمعت خبط من ورا إلتفت ورايا زي المجنون مفيش حاجة، فكملت سواقة سمعت صوت واحدة سِت بتقولي: بنتي لسه هناك، إلتفت بسرعة لزميلي وقولتله مش معقولة تكون مش سامع إالي أنا سامعه؟

فجاوبني بنفس الرد بتاع المرة إللي فاتت إنه مش سامع
أي حاجة، لحد ما وصلنا الجُثة للتلاجة واستلمها العامل مña
وأنا ما بسمعش غير «بنتي لسه هناك» بشكل متكرر ومُستفز
لدرجة إن أنا زعقت وأنا واقف في الشارع خلاص عرفت،
خلاص عرفت، ارحميني.

ورجعت بسرعة لمكان العقار المُنهار و قولت للي موجودين
هناك لقيتوا جُثث تانية؟

فكان ردهم إن الجُثة إللي أنا خدتها كانت آخر جُثة في
المكان كله.

قولتلهم مستحيل، في جُثة لسه ما طلعتش لبنت الست
إللي كانت معايا، و بعد نقاش استمر لعدة دقائق أقنعتهم
يكملوا تنقيب و كانت المفاجأة إنهم فعلاً طلّعوا جُثة بنت
في اوائل العشرينات و كلهم في عينيهم ونظراتهم تساؤلات
كتير ليا مش لاقين لها إجابة، أنا نفسي مش لاقى إجابة.

و توالى الحوادث واستمر تواصل الأموات إللي بنقلهم
معايا.

كُنت أنا و زميلي بننقل واحدة ست جالها غيبوبة سُكّر
بالليل متأخر، و كان زميلي مشغّل كعادته أم كلثوم.

وابن الست كان ورانا بعرييته والمريضة ورا..

كُنت مُندمج جداً مع أم كلثوم و هي بتقول:

بعد حين يبْدَل الحُب دارَه

والعصافيرُ تَهْجُرُ الأوكارَ

وديار كانت قديماً ديار.

وسمعت وسط الأغنية صوت نههة وبُكاء مُنخفض

فقلت لزميلي: أنت مهيب إيه في الأغنية؟

قالي: مهيب إيه مش فاهم؟

نَحّاس: مخلي واحدة تعيط جوا الأغنية!

زميلي: إيه ده! هو أنا مابيتهاأليش؟!

نَحّاس: لأ ياخويا، هو ده مش أنت إيلي عامله؟

زميلي: أقسم بالله الشريط ده موجود على طول بتاع هذه

ليلتي و أول مرة أسمع العياط ده جوا الأغنية.

وفي عز كلامنا، بصيت بالضدفة ورا، لقيت الست قامت

قعدت و شدت ماسك الأكسجين من على وشها، و التفتت

لي وبعزم ما فيها حدفت ماسك الأكسجين بالخرطوم بتاعه

عليّ، أنا وطيت بحركة لا إرادية ومن غير ما أقصد خبطت

زميلي ففرمل بسرعة.

إلتفت ورا لقيت الست نايمة زي ماهي و الماسك على وشها!!!

لما نزلنا علشان ندخلها الطوارئ لقيت الماسك مفصول عن أنبوبة الأكسجين أو تحديدًا مقطوع بفعل فاعل! ربنا ستر والست ماكنتش ماتت يومها.

مش هنسى في مرة لما كُنت بنقل جثة راجل مراته قتلته، طول الطريق حرفياً كُنت بسمع أفضع شتائم من جثة الراجل و تهديدات ليا إنه هيجيلي ويطلع على جتتي البلا.

إنتوا متخيلين هل في بني آدم يتحمل إيلي أنا إتحمَلته ده؟!


الموضوع عمال يزيد و أنا حالي بتسوء و قدمت طلب إني أتنقل لأي وظيفة مكتبية وإني منقلش لا جُثث و لا مُصابين تاني، قدمت الطلب ده تحديدًا بعد حادثة مُعينة حسيت بعدها إني لو منسحبتش هتجنن ده إذا كُنت لسه ما إتجننتش أصلًا، الحادثة دي كانت في عز الشتا والجو كان مغيم و الدنيا قالت هاتك يا مطرة واتبلغنا إن في أتوبيس شركة عمل حادثة مع عربية نقل، لما وصلنا شوفت منظر غريب جدًا، شوفت كل المُصابين واقفين على الرصيف

وغرقانين في دمهم ولا بيتحركوا ولا بيعملوا أي حاجة،
جريت عليهم أسألهم و أحاول أساعدهم محدش فيهم رد
عليا كأنهم منومين مغناطيسيًا، لقيت زميلي جاي من ورايا
بيقولي: أنت واقف بتهيب إيه عندك هو أنا هشيل الميتين
دول كلهم لوحدي؟

قولتله أديك قولت ميتين مش أولى نشوف المُصابين دول
الأول نطمئن عليهم

رد عليا: مُصابين مين؟ كل إللي في الحادثة ماتوا
قولتله: سلامة نظرك أmaal دول مين؟ و شاورت على إللي
واقفين على الرصيف ولقيتهم كلهم مُبتسمين.

قالي: هو إحنا مش هنبطل شغل المجانين ده بقى؟ مش
قد الشغلانة يا نحاس سييها، الرصيف فاضي مفيش عليه أي
حد و الجُثث كلها مرمية على الأرض قدامك.



كل الجُثث إيلي في الأرض كانت نُسخة طَبَق الأصل من
إيلي واقفين على الرصيف فأيقنت إن حالتي بتسوء لأنني
لازم أسيب الشغلانة دي.

ليلتها لما رَوّحت البيت كُنت واخد القرار بأنني أتنقل من
العمل الميداني ده أو أسيب الشغلانة خالص.

حكيت لراضية مراتي كل إيلي حصل من أول ما شوفت
الشيخ لحد الحادثة الأخيرة فكان ردها: بلاش تتكلم مع حد

وما تقطعش عيشك بإيدك.

دخلت إترميت على السرير وأنا مش عارف إيه القرار الصح إيلي لازم يتاخذ، معرفش نمت قد إيه لكني صحيت مخنوق مش قادر أتنفس مش قادر حتى أمد إيدي أجيب المية إيلي جنبي أشربها، و في وسط الضلمة شايف ناس كتير واقفة في الأوضة واقفين زي التماثيل مش عارف أشوف ملامح وشوشهم من الضلمة لكن شايف هيئتهم كويس و عددهم إيلي يتجاوز عشر أفراد، بصعوبة بالغة قدرت أحرك إيدي و مديتها للأباجورة علشان أثور الأوضة يادوب لمست الزرار والأباجورة نورت و حسيت بإيد متلجة قبضت على إيدي، لما الأوضة نورت مفيش حاجة اختفت زي ما بتقولوا في كُتب الحواديت بالعكس كل حاجة بقت أوضح، نفس الجُثث إيلي كانت على الرصيف متلخخة بالدم واقفين حوالين السرير وواحد منهم هو إيلي كان ماسك إيدي علشان ما أنورش الأباجورة، أنتوا متخيلين الموقف؟

تخيل نفسك نايم على السرير وتصحى تلاقي أكثر من عشر جُثث واقفين حوالين السرير ومحاولينه وكلهم عندهم الباردة الخالية من الحياة متسلطة عليك، أنا معرفش المفروض الواحد في المواقف إيلي زي كده يعمل إيه ويتصرف إزاي!

كل إلهي عملته إني قرئت بعض آيات من القرآن فكان رد فعلهم إنهم إتكلموا كلهم مع بعض بصوت واحد عميق مُخيف كأنه جاي من الجحيم و قالوا: لا تتزك الأمانة، لا تتزك الأمانة، لا تتزك الأمانة وفتحوا الباب وخرجوا واحد ورا الثاني، طبعا محدش شاف ولا سمع غيري كالعادة، وهنا كان قراري النهائي إني هسيب الشغل أو هتنقل وإلهي يحصل يحصل.

دلوقتي أنا بالفعل إتنتقلت وسبت المجال الميداني كله وكنت فاكِر إن هو ده العلاج بس للأسف إلهي أدركته مؤخرًا إني فتحت على نفسي باب من أبواب جهنم.

بعد ما كنت بشوف الميتين و بسمع أصواتهم في عربية الإسعاف، دلوقتي بقيت بشوفهم في كل مكان حواليا و بعد ما كانوا مجرد إنهم بيوصلولي رسالة أو استغاثة دلوقتي بقوا يعذبوني نفسيًا و جسديًا ليل نهار وبيأكدولي إن الأمانة اتقلبت عليا بعد ما خونتها وإن إلهي باقي في غمري مجرد أيام، حاولت أتدارك الأمر و أرجع للشغل الميداني تاني لكن للأسف الوضع ماتغيرش والموتى بيطاردوني و كأنهم بينتقموا من ملك الموت في شخصي و بعد ما كنت أنا أحد أذرع ملك الموت لتوصيل الموتى للتلاجات بقيت ضحية لأرواح خبيثة قررت إن هي تسلمني لملك الموت بمنتهى البُطء الرهيب.

أنا معرفش علاج إيلي عندي ده إيه، أنا مش عاوز أموت ولا مُستعد للمواجهة دي دلوقتي.

دي آخر حاجة بكتبها و إيلي يُقع في إيده المذكرات دي أكيد هيكون بيقرأها وأنا ميت وهنصحك نصيحة، مش كل أمانة نقدر نحملها ونكون أمناء عليها..

انتهت مذكراتي..

النحاس..

أنهيت تصفح مذكرات نحاس كانت الساعة حوالي عشرة بالليل بدون ما أفكر كثير كنت في الشارع رايح الحسين أقابل زوجته، المشوار ماخدش وقت كثير علشان كُنا بالليل ومع أول خبطة على الباب كانت فتحالي.

راضية: كنت مُتأكدة إن أنت

نادر: ما هو أنا لازم أعرف، أنا مش هينفع تسببيني متعلق كده

راضية: اتفضل، قرئت كل حاجة؟

نادر: أه ومحتاج أعرف منك إيه إيلي حصل بعد كده

راضية: وفهمت إيه من إيلي قريرته؟

نادر: فهمت إن نحّاس من بعد ما قابل الشيخ وحياته بقت
صعبة جدًا وماستبعدش إنه يكون انتحر، بجد الله يكون في
عونه على إللي مَرّ بيه وشافه

راضية: نحّاس كل يوم كانت حالته بتكون أصعب من
اليوم إللي كان قبله، بقى عصبي، قاعد لوحده طول الوقت،
مش طايق يقعد مع حد و لا طايقلي كلمة، بقى ياكل لوحده
ساعات ياكل زي إللي ماكلش من أسبوع و يخلص طبق
واتنين و ثلاثة وساعات أشيل الأكل زي ما بحطه، وكل أما
أجي أفاتحه في الحال إللي وصله يزعق ويقول مش أنتي
قولتي ماتتكلمش مع حد وأنتي ماتتفرقيش عن أي حد.
أنا قررت أواجه إللي أنا فيه بنفسني وأحل المشكلة دي من
غير مُساعدة حد.

بتكمل راضية كلامها وبتقول:

لحد ما لقيت في يوم عادل زميله بيتصل بيا على تليفون
البيت وبيقولي: عقلي جوزك يا راضية
غير شغله وقولنا ماشي إنما يسبب الشغل خالص ده كده
اتجنن رسمي.



الأيام الأخيرة في حياة نحّاس كانت صعبة جدًا، شكله بقى
عامل زي الميتين تحت عنيه أسود و وشه أصفر، كان بيدخل
الحمام يقعد بالساعات و أسمععه بيزعق ويقول: ابعدوا عني،
أنا مش عايز الأمانة دي، كُنت بحاول بأي طريقة أمنع إللي
خايقة منه يحصل، وقبل الموت بيوم جالي تليفون من واحد
اسمه حمدي قالي: إنه شغال حارس لتلاجة الميتين إللي
دايمًا نحّاس بيسلم الجُثث فيها و قالي بالحرف:

إلحقي جوزك أول إمبراح كان بيقولي إنه لازم يموت و لما سألتة ليه؟ قالي إن الميتين مش سايبينه، ماقدرش أقولك إن جوزك عنده مرض نفسي بس هقولك إن جوزك اتمس وإللي بيشتغل مع الميتين ياما بيشوف و لو حكيتك عن إللي أنا بشوفه هقولك على حاجات تشيب، ربنا يلطف بيه وبيننا.

راضية: مفيش عدى يومين ولقيت الناس بتخبط على الباب وداخلين شايلين نحاس ميت، إللي يقولي وقع في الشارع و إللي يقولي فضل يبص للسما ويصرخ، واللي قال كان بيقول أنا خلاص سلمت الأمانة ومستعد للموت، ومفهمتش حاجة يا ابني

نادر: أنتي قولتي إن حصلك حاجات بعد موت نحاس

راضية: من وقت ما شوفت وشه وهو ميت كانت عينيه مفتوحة على الآخر وبوقه مفتوح هو كمان، بقيت كل لما أبص للمرايا بشوف الوش ده و بقيت لما بنام بشوفه وهو بيصرخ وبيجري في صحرا وبيجري وراه ناس متكفنة لحد ما يلحقوه و يرقدوه في الأرض ويفضلوا يعضوا في جسمه، أصحى بعدها من النوم ألاقي جسمي مليان عضّ وكأن أنا إللي كانوا بيعضوني مش هو لحد ما جسمي اتشوه

نادر: وبعدين إيه إللي حصل؟

راضية: كل حاجة انتهت فجأة زي ما بدأت وكنت مقررة
إني مش هفتح الموضوع ده مع أي مخلوق مهما حصل،
ممکن أطلب منك طلب؟

نادر: اتفضلني

راضية: انساني يا بني وما تجيش هنا ثاني لأنك قلبت عليا
مواجه كثير ماحبش أفكرها واتفضل مع السلامة.

خرجت من عند راضية وأنا معايا نهاية مأساة نحاس،
نهاية اللعنة إالي قصدته بدون ما يكون له يد أو دخل فيها.

يمكن فعلاً هي كانت أمانة بس الأکید إن مش كل أمانة
يقدر أي شخص إنه يشيلها.



الفصل الثالث

(اختفاء و عودة)

مع نسمات فجر يوم جديد كنت بفتح باب شقتي مُنهك
تعبان محتاج أترمي على أقرب كرسي يقابلني، علشان حتى
مش هقدر أوصل أوضتي وفعلاً ده إيلي حصل بمُجرد ما
دخلت وقفلت ورايا الباب إترميت على أول كرسي قابلني
وفي ثواني معدودة كنت نائم.

لما صحيت حسيت كأنني كنت نائم لأيام متواصلة، فضلت
شوية قاعد على الكرسي بحاول أسترجع كل إيلي حصل
وبمجرد ما لقطت أول خيط فتحت شنطتي بسرعة وبصيت
في الورق وقريت الملاحظات إيلي كاتبها وataكدت إن كل
ده حصل مش مجرد حلم، مخبيش عليكم أنا مؤخرًا الواقع
والأحلام بقوا مُختلطين جدًا عندي ببعض لدرجة إن أوقات
كثير ما بقدرش أُميّز بينهم، هل ده بسبب كُتر إيلي مريت بيه
ولا بسبب لعنة قديمة اتعرضت لها مع دخولي مجال ما وراء
الطبيعة ولسه بدفع تمنها لحد دلوقتي.

قومت أخذت دُش و دورت في التلاجة على أي أكل أفطر
بيه، لبست و نزلت الشغل بمُجرد ما وصلت قابلني مديري
المُباشر أستاذ عماد بنظرة استغراب وقال:

عماد: أنت لحقت؟

نادر: أيوه لحقت

عماد: بس مش عادتكَ إنك تختفي يوم واحد ده أنت حتى مكملتش يوم، بقولك إيه يا نادر أنا مش عاوز كروته في الشغل وبعدين لما أنت تكروت أَمال الباقيين دول يعملوا إيه! نادر: بعد إذْنك يا أستاذ عماد علشان أنا هدخل مكتبي وأعيد صياغة التحقيق.

سبته ودخلت المكتب وطلبت فنجان قهوة و طلّعت كل الورق إللي معايا بما فيها مُذكرات نحّاس ولأول مرة أنسى أسجل على شرايط الكاسيت، معرفش هل ده بسبب اندماجي الشديد مع راضية وهي بتحكي لدرجة إني نسيت إني جاي في مأمورية عمل، ولا فيه حاجة خلّتني أنسى أسجل بفعل فاعل.

مش مشكلة، الموضوع لسه طازة ومش هنسى أي تفصيلة إن شاء الله.

بدأت أسرد كل حاجة بالتفصيل مع وضع بعض لمساتي الصحفية إللي بتضيف تشويق للقارئ، طبعاً بدون أي تحريف في الأحداث، معرفش فضلت أكتب قد إيه لدرجة إن إيدي مبقتش حاسس بيها لكني برّدو مكمل لحد ما وصلت عند

جُملة قالتها لي راضية قالتلي:

قبل الموت بيوم جالي تليفون من واحد اسمه حمدي قالي إنه شغال حارس لتلاجة الميتين إالي دايماً نحاس بيسلم الجُثث فيها وقالي بالحرف:

الحقي جوزك أول إمبراح كان بيقولي إنه لازم يموت ولما سألته ليه؟، قالي إن الميتين مش سايبينه، ماقدرش أقولك إن جوزك عنده مرض نفسي بس هقولك إن جوزك اتمس وإلي بيشغل مع الميتين ياما بيشوف ولو حكيتك عن إالي أنا بشوفه هقولك على حاجات تشيب، ربنا يلطف بيه وبيننا.

آخر جُملة قالها حمدي وقفت قدامها كتير ولقيتني بقول نفسي هو أنا ليه ما روحتش لحمدي؟

ده أنا قدامي كنز ثاني و خبايا ثانية لشخص انخرط مع الأموات، والله فكرة أكمل التحقيق بيه ويبقى إسمي سجلت مع مُسَعِف ومع عامل تلاجة، دلوقتي مطلوب مني أوصل لحمدي، قفلت الورق ودخلت مكتب أستاذ عماد مديري المُباشر.

نادر: التحقيق لسه ماخلصش على فكرة

عماد: عال جدّا، أفهم من كده إنك هتنزل ثاني؟

نادر: ده متوقف على ردك

عماد: ردي على إيه؟

نادر: في واحد اسمه حمدي عامل في تلاجة أموات،
اتصرف وصلني بيه أو هاتلي عنوانه

عماد: طب هو في أي مستشفى طيب

نادر: أنا لو كُنت أعرف ما كُنتش جيت طلبت منك

عماد (بعد صمت دام لدقائق): حاضر يا نادر أنا هتصرف
اتفضل رُوح وبكرة ربنا يقدم إللي فيه الخير.

رجعت مكتبي أخذت كل متعلقاتي وقولت هبقى أكمل
كتابة التحقيق الخاص بنحاس في البيت، وأول ما رجعت
البيت حسيت بحاجة مش طبيعية، إحساس غريب كأن
كان فيه نفس جوه البيت، زي ما يكون كان في حد هنا، أو
لسه هنا!! سيبت كل حاجة من إيدي، روحت أدور بحذر
في كل أرجاء البيت على مجهول أنا نفسي معرفش بدور
على إيه؟! وفي عز إندماجي في البحث، صرخت وإتنفخت
في مكاني!! حسيت بإيد خبّطت على كتفي!!، إلتفت ورايا
ولقيت ورقة متعلقة على باب التلاجة، مكتوب فيها:

حمدي مصطفى ميرزا، زفتى - الغربية، عايش في فيصل

مواعيد شغله في التلاجة الموتى من ٨ مساءً ل ٨ صباحًا..

لو اتحركت كمان ساعتين هتكون عنده و هو بيستلم
الوردية بتاعته.

قربت من الورقة وأنا مش مصدق عنيا!، مديت إيدي ببطئ
وأخذتها من على التلاجة، وبدأت أقلبها وش وش، وأغمض
عنيا وأفتحها يمكن أكون بحلم أو بتخيل، وسمعت صوت
بيقولني:

(متستغربش. لسه الطريق بيبدأ، واللي مستنيك كثير
أوي).

كنت عارف الصوت كويس، ده صوت نحّاس!!..

الفصل الرابع

(من داخل تلاجة الموتى)

في الميعاد المُحدد كُنت مجهز شنطتي، ومتحرك للعنوان
إللي قريته في الورقة اللي لقيتها على تلاجتي

كعادة الطُرق عندنا في الوقت ده بتبقى زحمة جدّا، على
ما وصلت الساعة كانت بعد تسعة، ولعلمكم ده كان مصلحة
لأنني لما روحت الدنيا كانت هادية تمامًا برة.

خليني أوصفلكوا المكان..

تلاجة الموتى بيغلّب عليها من برة كآبة رهيبة، يكفيك
إنك عارف إن كل إللي جوا مجموعة أدراج وأرْفُف شائلة
جُثث منهم الغريق، ومنهم إللي مدبوح، ومنهم إللي مضروب
بالرصاص، ومنهم مات على سريريه، منهم إللي مات وساب
وراه ألغاز محدش فاهمها، منهم إللي مات وساب وراه أسرة
تعيسة مُستقبلها مُظلم، منهم إللي سايب أسرة كانت بتتمنى
اللحظة دي من زمان، منهم إللي عاش في قصور ومنهم
إللي عاش في عِشش، منهم إللي مالوش حد وآخرته مقابر
الصدقة، عاش غريب ومات غريب، منهم إللي هيتعمله أفخم
عزا.

و برغم كل الاختلافات دي، كلهم بيجمع بينهم شيء واحد،

الشيء ده هو التراب إالي كلهم هيترموا عليه وهيغطيهم
وهيحولهم فريسة للدود ينهمش فيهم، مُجرد الفكرة نفسها
مُخيفة ومُقبضة.

قطع تفكيري و تأملي وأنا واقف قدام التلاجة صوت
بيقولي: خير يا بني، أنت ليك حد جوا؟

بصيت لي بيتكلم لقيت شخص هزيل، نحيف، أقرب
للموت منه للحياة، بيدخن سيجارة وإيده بتترعش ونظرات
عينيه خاوية، وفي إيده الثانية كوباية شاي تقريبا نُصها وقع
على الأرض من رعشة إيديه، ماكُنتش محتاج وقت كتير
علشان أستنتج إن ده هو حارس التلاجة أصل زي مابقولوا
سيماهم على وجوههم.



نادر: أيوة، بصراحة واحد قريبي مفقود وقالولي ألف على
التلاجات يمكن ألاقيه

حمدي عامل التلاجة: فهمت، فهمت، اتفضل تعالى.

- دخلت وراه وكعادة أي عامل تلاجة خبط على باب
التلاجة الرئيسي ودخل وأنا وراه

حمدي: أنا عندي ثلاثة جُثث بتوعي محدش اتعرف عليهم

نادر: بتوعك؟!

حمدي: أيوة إحنا في شغلانتنا طالما الجُثث موجودة في
تلاجة المشرحة إللي شغالين فيها بنقول بتاعتنا، قولّي الأول
أنت شوفت جُثث قبل كده؟

نادر: يعني، ليه بتسأل؟

حمدي: أصل ياما ناس كتير جت تتعرف على جُثث
ووقعت من طولها، مش كل الناس بتتحمل المنظر، أكيد أنت
عارف إن شكل الجُثث بيكون صعب خصوصًا بقى لو ميت
غريق أو مسموم أو مدبوح

نادر (مقاطعًا): عم حمدي أنت تعرف راضية ونحاس؟

حمدي: مين دول؟

نادر: نحاس المُسعِف و راضية مراته

حمدي: أه.. أه.. الله يرحمه و يحسن إليه، هو أنت تعرفهم؟

نادر: راضية إللي بعتاني ليك ياعم حمدي

حمدي: ليه؟

نادر: حَكِيتلي عن مكالمتك ليها قبل ما نحاس يموت

بيومين

حمدي: طب مش هي حكيتك، إيه المطلوب مني؟ أحكيك
تاني؟

نادر: أه هتحكيلي بس مش عايزك تحكي عن نحاس
حمدي: أمال؟

نادر: أنت قولتلها بالحرف إنكوا بتشوفوا حاجات كتير
غريبة، أنا عاوز أعرف إيه هي الحاجات الغريبة دي؟
حمدي: بصفتك إيه يا أستاذ؟!

نادر: هو لازم يكون ليا صفة علشان تحكي؟

حمدي: مش القصد، أصلك مادخلتش دوغري من الأول
- تعالى معايا سكة كده و قولي أنت مين وعاوز إيه
بالضبط

نادر: حاضر، بُص يا سيدي أنا صحفي و بعمل تحقیقات مع
المُسعفين واسمك اذكر في التحقيق، فقلت أجيلك

حمدي: تحقيق! كفى الله الشر، هو أنا عملت إيه؟

نادر (ضاحكًا): في شغلنا تحقيق يعني موضوع

حمدي: هتدفع كام؟

نادر: طب ماتيجي أنت كمان سكة وكنت تقول ده من

الأول، ٢٠٠ جنية كويس؟

حمدي: رضا

نادر: اتفضل، نبدأ بقى؟

حمدي (بإبتسامة عريضة): اسأل و أنا تحت أمرك

نادر: احكي لي ياعم حمدي عن الحاجات إلكي تخوف إلكي
بتحصلك هنا

حمدي (ساخرًا): أنا ما بخافش يا أستاذ

نادر: خلاص خرينا نقول على أغرب مواقف حصلت هنا

حمدي: خريني أبدأ لك بحكاية لسه حاصلة من أسبوع،
استلمنا جثة لواحد ميت في حادثة ودخلتها التلاجة بإيدي
لحد ما الدكتور ينزل، وبعدها بيحي ساعة، الدكتور جالي
وطلب يشوفها، خدته ودخلنا التلاجة لقيت الرف بتاعها
مفتوح والجثة مش موجودة، الدكتور نزل تهزيق فيا وقال:
هنروح في ستين داهية بسبب إهمالك الجثة اتسرقت يا
زفت، هاتلي مفتاح التلاجة.

وقفل التلاجة وقال: خليك قاعد هنا أنا هطلع أقلب الدنيا
فوق قبل ما أبلغ يمكن حد يكون طلّعها.

حمدي: حد مين يا دكتور؟ محدش دخل التلاجة من وقت

ما الجثة جت

الدكتور: كدة يبقى موقفك أصعب، ماترغيش كثير خليني
أشوف هعمل إيه.



وخذ المفتاح و طلع وسابني عمّال أضرب أخماس في
أسداس، مين له مصلحة يأذيني ويسرق الجثة من غير حتى
ما ألمحه.

بعد حوالي ثُص ساعة لقيت الدكتور نازل وعلى وشه خيبة
أمل كبيرة

حمدي: إيه الأخبار يا دكتور؟

الدكتور: أخبار زي وشك، الجُثة ضاعت وأنا مُضطّر أبلّغ
حمدي: يا دكتور أقسم لك بالله أنا ما اتحركت من هنا، أنا
معرفش إزاي الجُثة اختفت..

وفي عز كلامنا مع بعض سمعت صوت أنا عارفه كويس
صوت رف من إالي بيتحط فيه الجُثث، بصينا لبعض إحنا
الإثنين والدكتور خد المفتاح وجري فتح باب التلاجة وكانت
الصدمة! الجُثة موجودة في مكانها وعلى وشها ابتسامة
ترعب أكثر من ابتسامة إبليس نفسه.

الدكتور: هو إيه ده؟!

حمدي: مش مهم يا دكتور المهم إن الجُثة رجعت
الدكتور: إزاي يعني! أنا لولا واخد المفتاح معايا كُنت قولت
إن إالي سرقها دخل رجّعها

حمدي: ماهو مش لازم إالي سرقها يا دكتور يكون بني آدم،
الأوضة دي ياما حصل فيها حاجات كتير ملهاش تفسير وأنا
عوّدت نفسي مافكرش كتير و لا أشغل بالي

الدكتور: بالنسبة للجثة إللي بتضحك دي هي كانت كده؟

حمدي: لأ طبعا

الدكتور: خُد يا حمدي المفتاح أهو، أنا هطلع أشوف ورايا إيه.

نادر: يعني الجثة اتحركت ياعم حمدي ولا إيه بالضبط؟

حمدي: أه عادي، الحكاية إللي هحكياهاك دلوقتي هتأكدك إن الميتين بيمشوا ويتحركوا ويعملوا كل حاجة بس مش كل الناس بتقدر تشوف ده.

-في مرة ابني الكبير كان عندي هنا كان بيشتري لِسْتَه راديو ترانزيستور علشان بتحب تشغل القرآن جنبها طول اليوم والراديو بتاعها باظ، وبعد ما اشتراه عدى عليا وقعد معايا شوية كُنا بعد العشا وخرجت أشتري كيسين سكر وشاي وقولتله أقعد هنا لحد ما أرجع.

لما رجعت ما لقيتهاوش اتصلت عليه كذا مرة مردش، مفيش عشر دقائق وسمعت صوت واحدة بتصوت من جوا التلاجة! الدم نشف في عروقي، خبطت على باب التلاجة ودخلت ما كانش في أي صوت فُضلت واقف شوية مستني أي حاجة تحصل تاني يادوب بتلفت علشان أخرج والصرخة

اتكررت تاني ولقيتلك بعدها الأرفف كلها بتتنفض وخبط جامد عليها كأن الميتين صحبوا وعاوزين يخرجوا.

في الموقف إيلي زي ده ماينفعش أهرب، فضلت أفتح الأرفف واحد ورا التاني، كُنت كل ما أفتح رف إما ألاقي الجُثة مقلوبة على بطنها أو على جنبها لحد ما وصلت لواحدة شوفت منظرين عُمرى ما أنساهم.

أولاً: الجُثة على ظهرها والمشمع إيلي ملفوفة فيه مقطوع ووش الستِ عليه غضب ربنا، كانت فاتحة بوقها على الآخر كأنها بتصرُخ.

أما المنظر التاني: فكان جهاز الراديو والتسجيل الضغير إيلي اشتراه ابني وكان شغال شريط عمّال يقول كلام مش مفهوم بس الحقيقة كان كلام يخوّف.

نادر: فاكّر حاجة من الكلام ده ياعم حمدي؟

حمدي: فاكّره كلّ، كان بيقول:

- أقسمت عليكم في ثباتكم العميق


- أن تستجيّبوا وتستيقظوا

- بحق كائنات الظلام

- بحق شهورش وسيلبا والملك الأصم

- أقسمت عليكم أن تقوموا من ثباتكم
- بحق من يسكنون جوف الأرض
- بحق من يسكنون الجانب الآخر
- وبأمر عازر بن مردوخ
- وبحق صارم سليل الأبالسة
- استجيبوا و إلا تهلكوا
- أقسمت عليكم في ثباتكم العميق
- أن تستجيبوا وتستيقظوا
- بحق كائنات الظلام
- بحق شهورش وسيلبا والملك الأصم
- أقسمت عليكم أن تقوموا من ثباتكم
- بحق من يسكنون جوف الأرض
- بحق من يسكنون الجانب الآخر
- وبأمر عازر بن مردوخ
- وبحق صارم سليل الأبالسة

- استجيبيوا وإلا تهلكوا



كان عم حمدي بيقول الكلام ده وأنا بررده جوايا، وحسيت
إني عارفه، أو سمعته أو شوفته قبل كده، بعض الكلمات مش
غريبة عليا!!، وقطع تفكيري عم حمدي وهو بيقول:

حمدي: الكلام ده يابني كان صعب و يخوف أنا نفسي إلكي
مش ميّت أهو جسمي اتنفض لما سمعته

نادر: وعملت إيه ياعم حمدي

حمدي: من غير تفكير شلت جهاز التسجيل رزعته في الأرض اتكسر 100 حِته، و جريت جبت الراديو بتاعي شغلته على القرآن وعلّيت الصوت وسبته في التلاجة وجريت قعدت برة، الدنيا بعدها هديت تمامًا والميتين هديوا

نادر: وعملت مع ابنك إيه؟

حمدي: لما روّحت جِته علّمت من كُتر الضرب إيلي ضربتهوله

نادر: ومعرفتش منه عمل كده ليه؟

حمدي: انت والزفت، قالي إنه قرأ حاجة مكتوبة تخلي الميتين يصحوا وحب يجربها في الميتين بتوعي إيلي في التلاجة وإذا نَفعت هيعملها مع أخته هناء الله يرحمها، إيلي من يوم ما اتوفت ونور حياتنا كله اتطفئ.

نادر: البقاء والدوام لله ياعم حمدي

حمدي: الله يكرمك يابني

نادر: هو كل إيلي بيحصل في التلاجة حاجات تخوّف؟

حمدي: بالعكس في ناس بتيجي وعلى وشّها ابتسامة

تحس إن شوية وهينطق

نادر: شوفت ده بعنيك؟

حمدي: أيوة مع بنتي، لما إتقلت من المستشفى للتلاجة بعد موتها بالمرض الخبيث، كان على وشها ابتسامة رضا و فرحة بعوض ربنا ليها في الجنة، يمكن ده برّد قلبي عليها وكل ما أجي أحزن أو أفكر تعبها، أفكر وشّها البشوش وأفكر لما كُنت بقرأ لها القرآن وهي في التلاجة وحسيت بإيدها الضعيفة وهي ماشية على شعري.



نادر: أنا أسف إنني قلبت عليك المواجه

حمدي: لأ يا بني الموت علينا حق.

نادر: كمل يا عم حمدي

حمدي: كنت في مرة سهران و شاري رغيفين حواوشي وإزاة حاجة ساقعة وحاطط الكرسي على باب التلاجة وقاعد، لسه بفتح الأكل وسمعتك جاي من جوا التلاجة

صوت غيل صغير بينادي عليا

قولتله: أخلص اللُقمة و بعدها هُرد عليك.

الصوت اكرر بس من واحدة ست و ناديت عليا بإسمي ووراها صوت راجل والتالت والرابع تقولش جوا في مولد..

زهقت حطيت الأكل على الكرسي وقومت فتحت الباب ووقفت بين التلاجات وزعقت فيهم

نادر: زعقت في مين؟

حمدي: الميتين!

-وقولتلهم جرى إيه هو أنا مش هعرف أخلص اللُقمة و أتهنى بيها ولا إيه؟ سيبوني أطفح و بعدها ابقوا قوموا ارقصوا، وسمعت لك رزعة جاية من كل أرفف التلاجات قطعت بسببها الخلف و قومت طالع وقافل الباب ورايا، لما طلعت لقيت لفة الحواوشي مفتوحة ومتاكل الرغيفين وباقي منهم لُقمة!

وإزاة الحاجة الساقعة مدلوقة على الكرسي إالي بقعد عليه، ولاد اللذينه طمعوا في اللُقمة بتاعتي، ده أنا كُنت عامل ليلة علشان الرغيفين دول.

نادر: أنت عاوز تفهمني إن الميتين كلوا الحواوشي؟

حمدي: لأ طبعًا، ده شغل جن ما هو الجن أصله طفس و
مفجوع و مايحلالوش ياكل غير أكل البني آدمين..

ومن يومها لو أمي ندهت عليا من ثريتها وأنا باكل ولا هُرد،
هخلص الأكل الأول وبعدها أقوم أشوفها عاوزه إيه!

نادر: أنا مُتشكر جدًا ياعم حمدي، عايز بس قبل ما أمشي
أسألك على حاجة، دايمًا بشوفكوا بتعملوها وسمعتها أكثر
من تفسير، أنتوا ليه بتخبطوا على التلاجة قبل ما تدخلوا؟

حمدي: لأ إحنا مش بنخبط على باب التلاجة بس إحنا
كمان بنخبط على كل باب أو دُرج أو رف هنفتحه، هسألك
سؤال لما حد بيجي يزورك هل بيدخل عليك البيت من غير
احم أو دَستور؟

نادر: لأ طبعًا لازم يستأذن

حمدي: بالضبط كده ده إيلي بنعمله، إحنا بنستأذن قبل ما
نُدخل

نادر: ما أنا بردو مش فاهم ليه!

حمدي: خليني أحكيك حكاية تانية، في مرة زميلي إيلي
بيستلم مني الوردية حصل عنده حالة وفاة، فاضطريت
أشيل مكانه وأفضل هنا ثلاثة أيام متواصلين، على اليوم

التالت كُنت مش شايف قُدامي و كان المفروض كالعادة
أدخل أتطمئن على الجُثث و إن التلاجة شغالة وكله تمام،
فاللي حصل إني من كُتر السهر والإجهااد وعدم النوم نسييت
أخبّط على الباب و أنا بفتحه ودخلت، مالحقتش حتى أقفل
الباب ورايا وأنا داخل الباب اترزع لوحده وسمعت خبط من
برة على الباب شديد جدًا بمجرد ما سمعت الخبط أدركت
إني نسييت أخبّط مابقيتش عارف أعمل إيه أو أتصرف إزاي،
الكهربا اتقطعت والخبط على الباب سكت و سمعت صوت
حد بيتنفس ورايا و حسيت بأنفاس باردة في وشي فضلت
أستعيذ بالله من الشيطان الرجيم ولقيتني بقول لا إراديًا:
أنا أسف سامحوني ماكُنتش أقصد أنا على طول بخبّط
وبستأذن من يوم ما اشتغلت هنا، هي المرادي بس نسييت
بسبب إني منمتش بقالي ثلاثة أيام، العفو والسماح أرجوكم.

بعدها مفيش دقيقة الكهربا رجعت والباب اتفتح لوحده
و خرجت برة ومن يومها مستحيل أدخل المكان من غير
استأذان وأخبّط.

تسألني ليه هقولك إن إللي قبلي جيت لقيتهم بيعملوا كده
وهم جُم لقوا إللي قبلهم بيعملوا كده وأنا إللي هيستلم مني
هقوله يعمل كده.

نادر: تمام ياعم حمدي وصلت

حمدي: مش عايز تعمل بلاغ من بلاغاتك دي مع دكتور
تشرح؟

نادر(بعيون لامعة): والله فكرة بردو إيه المانع، بس ما
تقوليش إن الدكتور إلكي حكيت عليه من شوية علشان شكله
جبان جدًا

حمدي: لا.. لا.. أنا هبعثك لدكتور بيتر، ده بقى عنده
أحلى حكاوي تسمعها ده غير إن قلبه ميت وبينكش عن
الحاجات دي بإبرة

نادر: وألاقيه فين دكتور بيتر؟

حمدي: في بيته

نادر: ماينفعش أجيله هنا؟

حمدي: دكتور بيتر طلع على المعاش من كذا شهر

نادر: وهيوافق يحكي لي؟

حمدي: عيب عليك

نادر: بركاتك يا ٢٠٠ جنية

حمدي (ضاحكًا): لا يا أستاذ في ٢٠٠ جنية تانية علشان
دكتور بيتر

نادر (مُندهشًا): دكتور هياخذ ٢٠٠ جنية علشان يحكي؟!!!

حمدي: لأ طبعا أنا إلكى هاخذهم، دكتور بيتر يغرقك فلوس، قولى بس عايز تروحله إمتى؟

نادر: ينفع دلوقتي؟

حمدي: يا باشا إحنا دلوقتي عدينا نص الليل

نادر: خلاص بكرة

حمدي: تعالى نخرج بره هجيب تليفوني من أوضتي، هاخذ رقمك وبكرة هكلمك وأقولك عنوان دكتور بيتر..

خرجنا ووقفت عند البوابة من جوة، وهو دخل أوضة صغيرة بالقرب من البوابة وقفل بابها عليه، فضلت مستنيه حوالي نص ساعة، غاب عليا وأنا استغربت، فقولت ما بدهاش بقى، وروحت وخبطت على باب اللي الأوضة، ولما الباب اتفتح، ذُهِلت!!، عنيا برقت ورجعت خطوتين لورا، وكان نفس الدهول والإستغراب على ملامح الشخص اللي فتح لي الباب، وسألني:

- أنت مين؟!!!..

نادر (مُندهشًا): إنت اللي مين؟، هو فين عم حمدي؟!.

الشخص: أنا عمار، وأنت إزاي دخلت هنا؟، هو أنا سيبت

البوابة مفتوحة؟، أنا متأكد إنني قفلتها قبل ما أدخل أنا،
وبعدين عم حمدي مات من مُدة..

نادر (بجنون): مات إيه؟، أنت شارب حاجة ولا لسه بتحلم،
عم حمدي كان لسه معايا ودخل الأوضة قدامي..

عمار(بضحكة سمجة): يا بيه ده عادي، انت هنا في تلاجة
أموات، يعني كلها عفاريت وأشباح، ويجوز كمان يكون هو
اللي فتح لك الباب..

حسيت إنني بتعامل مع شخص مُختل، ومن غير كلام أكثر
من كده، خدت بعضي ومشيت، كان جوايا رهبة وإستغراب
وخوف، لكن قدامهم كان فيه شغف، صوت جوايا بيقولي
إن كل الغير منطقي وبيحصل لي ده، هيكون نتيجته تحقيق
محصلش ولا هيحصل زيه أبداً.

وأديني أنهيت المهمة الثانية، إنطلقت في طريق عودتي
للبيت علشان أكتب وأفرغ كل إللي سجلته لأن المرادي
سجلت كل إللي إتقال من أول دقيقة لآخر دقيقة، على
أمل خيط جديد يظهر ويوصلني بدكتور بيتز، أو بالخطوة
الجديدة عموماً...

الفصل الخامس (كسّاب)

مارست مهامي المعتادة من كتابة وتفريغ وعشا ودُش وتغيير هدوم وعلى الساعة أربعة الفجر كُنت في سابع نومة بعد يوم طويل وحافل بأحداث كثير، صبحاني من نومي صوت موبايلي وهو بيرن من بعيد جدًا حاربت النوم بكل الطرُق علشان أصحى وأزُد على الموبايل، كان الإتصال من مروة بنت خالتي صفية.

الساعة كانت السابعة صباحًا والإتصال في حد ذاته غريب وغير متوقع، خصوصًا إن من بعد جواز مروة من كسّاب وكُل إللي حصل قبل كده والعلاقة بيّنا مش أحسن حاجة برغم إني إعتذرتلها ودفعت تمن غلطتي، لكن مفيش حاجة رجعت زي زمان.

نادر: أيوة يا مروة صباح الخير

مروة: صباح الخير يا نادر، آسفة لو بتصل بيك في وقت غير مُناسب، بس أنا قولت تلاقيك في شُغلك دلوقتي

نادر: ولا يهملك أنا كدة كدة كُنت هصحى، خير في حاجة؟

مروة: أنا عارفة إن أنت ما بقاش ليك علاقة بكسّاب، لا من

قريب ولا من بعيد، بس للأسف هو لسه حاطك في دماغه،
أنا حاولت كتير أقنعه ينسأك لكن مفيش فايده، عوزاك
تسمعني ضروري لآخر لحظة يا نادر وما تستعجلش إنك
تقفل معايا المكالمه

نادر: أنا سامعك يا مروة كملي

مروة: كساب ناوي يعيد القديم كله

نادر: بمعنى؟!

مروة: سنوية الوقاد الأسبوع إلكي جاي كساب حالف
يموتك يوم سنوية أبوه

نادر: مروة أنا مش فاهم أنتي عاوزة إيه دلوقتي؟

مروة: أنا خايفة عليك وبقولك تاني أهو، كساب مش
هيسكت

نادر: ماشي، أعمل إيه أنا دلوقتي مش فاهم؟

مروة: خاف يا نادر، ولو تقدر ما تخرجش، ماثخرجش ولو
عاوز رأيي، تعالى إعتذرله يمكن يسامحك

نادر: خلصتي إلكي عندك يا مروة؟

مروة: لأ ماخلصتش، واسمعني لآخر كلمة بقولها في

نادر: ياستي حاضر، كساب إيلي باعتك تقولي الكلام ده؟
مروة: كساب إيه!! بقولك هيموتك، هيبعتني أقولك إنه
هيموتك؟!

نادر: خلاص يا مروة أنا فهمت، سيبيني أفكر أشوف أنا
هعمل إيه

مروة: نادر المشكلة مش فيك أنت لوحده، أنا خايفة على
خالتي وأمنية، أنا هقفل دلوقتي علشان سامعة صوته جاي

نادر: حاضر، مع السلامة يا مروة

- كنت لسه هقفل أفكرت جملة مروة، قررت ما قفلش
وأسمع للأخر و فضلت ساكت شوية و طلع ظني في محله
وسمعت حوار داير بين مروة وعدوي اللود كساب!

مروة (باكية): إرتحت؟ أديني قولتله إيلي أنت عاوزه

كساب: لا ما ارتحتش، أنا مش هرتاح غير وهو راع قدامي

مروة: ما تشيله من دماغك بقى

كساب (صارخًا): أشيل مين؟ ده قتل أبويا، قتل سيدك

مروة: وأنت قتلت أبوه

كسّاب: أنتي مجنونة، بتشبهني مين بمين؟

مروة: والله إللي أعرفه إن هو شالك من دماغه تمامًا، لكن أنت إللي مش قادر تنساه ولا تبطل تفكير فيه

كسّاب: إللي زي نادر ده العلاقة بيني وبينه بالضبط زي القُط والفار، هفضل كل مُدة أظهرله وأنغص عليه حياته وأُخذ منه حبايبه واحد ورا التاني، وبعدها أسيبه فيفتكر إني نسيتُه أقوم طالعه زي عفريت العلبة تاني.

مروة: ممكن أفهم الهدف من مُكالمتي لنادر إيه؟

كسّاب: نادر اليومين دول عايش في وهم إنه ناجح ومحتاج حد ينكد عليه ومكالمة زي دي تصبيرة بمشي عليه بيها لحد ما أخبط الخبطة إللي جاية

مروة: أنا آسفة إني هقولك إن نادر ابن خالتي ناجح فعلاً وياإللي أنت بتعمله ده بتثبت لي إنك أضعف منه

كسّاب (غاضبًا): أنا أقدر أفحصه وأسخطه في لحظة، بس حابب أقولك حاجة سيدك الوقاد كان دايمًا بيقولهاالي: إن الفرق بيني وبينه، إن أبويا كان دايمًا سريع الغضب لكن أنا شخصية استفزازية ومش من السهل جزي لأي حاجة أنا

مش عاوز أعملها «على الأقل دلوقتي»، لكن أوعدك إني لما
أقرر أدمر نادر هعدي سقف توقعاته بكتير.

مروة: أنت ناوي تعمل فيه إيه؟

كساب: هتعرفي في وقتها

مروة: طب ممكن أعرف وقتها ده إمتى؟

كساب: قولتك هتعرفي في وقتها، وبعدين تعالي هنا أنتي
معايا ولا معاه؟

مروة: هو أنا نطقت ولا قولت حاجة؟

كساب: خليكي أفضل كده ما تنطقيش لأن إلي زيك لما
بيفكر أو يتكلم الدنيا بتخرب، يلا اطلعي رتبي الناس إلي
جاية علشان أعالجها، الناس قاعدة برة بقالها زمن

مروة: تحت أمرك، هأخذ تليفوني وأخرج، الخط اتقطع
وأنهت مروة المُكالمة وإلي أثبتت لي.

أولاً: إن مهما حصل إحنا دم واحد

ثانياً: إن الملعون كساب مش ناوي يسبيني في حالي أبداً.

بس أنا مش هوّقف حياتي علشان مستني إلي هيعمله، لما
يبقى يقرر إنه يعمل حاجة يبقى يحلها ألف حلال.

الفصل السادس

(طبيب تشرح)

فطرت و قعدت أكمل شغلي في إنتظار رؤية ولا أي هاتف
يبلغني بالخطوة الجاية، حاولت أشيل من بالي خطط كساب
للإنتقام مني، إلا إن صوته فضل يتردد جوايا، وبدأت أسأل
نفسي:

هل كساب يكون له يد في إيلي بيحصل معايا؟!، لكني
تراجعت عن الفكرة، ده كلها أموات في أموات، أنا لازم أركن
التفكير في كساب على جنب دلوقتي، وبعدين هيقاله روقة
لوحده، لازم دلوقتي أركز أكثر في الموضوع بتاع الأموات
ده، إيلي هيفتحلي باب جديد

وتحقيق جديد أضمه لسلسلة التحقيقات الأخيرة إيلي
مبدئيًا أطلقت عليها (أعوان الموت)، بس ده عنوان مبدئي
وارد جدًا إني أغيره.

حاجة قالتلي قلب في رسايل الموبايل، عملت كده فعلاً
لقيت أول رسالة كالتالي:

أستاذ نادر أنا حمدي عامل تلاجة الموتى، بحاول أكلمك
بقالي أكثر من ساعة وأنت مشغول، ده عنوان دكتور بيتر هو
مُنْتَظَرُكَ النهاردة الضُّهر ولو فاضي دلوقتي روحله.

حمدي!!! أنا كنت بقرأ وأنا مش مصدق عينيا، بس سريعًا فوقت لنفسي، وقولت أنا لازم أكمل طريقي، لازم أعرف، هل فعلاً دول أموات، ولا أنا اتجنتت ولا إيه؟!..



مفيش رُبِع ساعة وكُنت وصلت العنوان خصوصًا إنه في وسط البلد جنبي، عمارة قديمة مكونة من ست أدوار، الدور عبارة عن شقة وهو ساكن في الدور الرابع، خبطت فتحلي

واحد في أوائل الستينات يتمتع بجسم إلى حد ما رياضي
مرسوم على وشه ابتسامة ترحاب وقال: أستاذ ناجي صح؟



نادر: لأ يا فندم نادر، نادر فودة

دكتور بيتر: أنا أسف بس حمدي إيلي قال كده

نادر: يعني حمدي ده مش ميت زي ما عمار قال؟

دكتور بيتر: هو حضرتك بتقول إيه؟، وعمار مين؟

نادر (بإحراج): لا، لا، ولا حاجة، متاخذتش في بالك.

دخلنا بيت دكتور بيتر وطلب مني أستناه دقايق، وبعدها
رجع معاه كوبايتين حاجة ساقعة

دكتور بيتر: على حسب ما فهمت من حمدي أنت عاوز
تسمع مني أكثر مواقف مُرعبة حصلت لي في أثناء عملي
كطبيب.

نادر: أكون شاكر ليك جدًا يا دكتور

دكتور بيتر: على حسب بردو ما فهمت إنك صحفي

نادر: تمام كده

دكتور بيتر: بُص أنا هحكيلك موقف بعتره من المواقف
إلي ملهاش تفسير لحد دلوقتي، الكلام ده من مُدة طويلة،
استلمت جُثة وكان مشكوك في سبب وفاتها فطبيعي كان
لازم تتشرح.

لأول مرة في حياتي أحس إن في جُثة رافضة إنها تتشرح،
رافضة بكل الطرق

نادر: إزاي؟

دكتور بيتر: مبدئيًا الجثة كانت موجودة على ترابيزة التشريح وكل ما أتلفت علشان أعمل حاجة أحس إن الجثة بيتغير فيها حاجة، يعني مرة ألقى دراع الجثة اليمين نازل من على الترابيزة فرجعتة مكانه، إتلفت أعمل حاجة ثانية وعلى ما رجعت لقيت رجلين الجثة مفتوحين وبعيد عن بعض تمامًا ضميتهم لبعض بصعوبة.

أنا ما كنتش لاحق أجيب أي مشرط علشان أبدأ تشريح حرفياً كل ما أتلفت لازم يحصل حاجة، والختام لقيت الجثة بتسود كلها و كأن حد دلق عليها قطران أسود، أنا كنت شايفها بتسود تدريجيًا بداية من الرجلين صعودًا لباقي الجسم، وقفت قدامها محتار مش عارف أعمل إيه، ناديت على حد من الموجودين برة وسألته أنت شايف إيه؟ فكان رده إنه شايف جثة عادية جدًا، واكتشفت إن أنا الوحيد إللي شايف المنظر المرعب ده، عاوز أقولك إن الموضوع موقوفش عند كده، بدأ خيط دم يُخرج من عينيّن الجثة المقفولة وينزل على ترابيزة التشريح ومنها للأرض، اضطريت أدخل الجثة ثاني التلاجة لأني حسيت إن أعصابي هتنهار من المشهد ده، وفعلاً ثاني يوم شرحتها عادي جدًا وما حصلش حاجة.



- في مرة حصل حاجة عمري بردو ما بنساها، كُنت هشرّح
جُثة شاب مات بطلقة طايشة في فرح يا عيني، وأنا
موضوع ضرب النار في الأفراح ده بيعصبني جدّا.

حطيت الجُثة على ترابيزة التشريح وجبت المشروط أقوم
أسمعك صوت واحدة بتقولي: بالراحة على ياسين!

أنا تنحت وبصيت حواليا مفيش حد!

مسكت المشرط ودخلته في الجثة أقوم سامعك صوت
واحدة بتعيط وبتقول:

بالراحة أرجوك ياسين بيخاف أوي من العمليات!
قولت يارب استر!

وكملت تشريح و كانت ليلة سودا
كل ما أعمل حاجة أسمعك عياط وصويت!
نادر: وكملت عادي؟

دكتور بيتر: أه لأن ده شغلي والحالات دي حصلت كتير
ومش كل ما هسمع حاجة هسيب شغلي وأخرج.

ده أنت فكرتني في مرة وأنا في الكلية في معمل
التشريح، كانت جثة متغطية وهنشرحها أنا وزمايلي ولسه
بنقرب قامت الجثة متحركة والميت قام قعد والملاية
مغطياه!

كل البنات الثلاثة وقعوا من طولهم وإثنين دكاترة زمايلي
طلعوا يجروا ووقعوا كل حاجة في طريقهم..

دكتور المادة اترمى على أقرب كرسي، أنا فضلت فاتح
بوقي وساكت!

الجثة بدأت تتنفض وتشيل الملاية من عليها ببطء شديد لحد ما وقعت من عليها، إذ بينا نلاقي دكتور ماجد زميلنا عامل فينا مقلب، ماقولكش على الضرب إالي كله يومها من الكل.

وقالنا: المقلب ده حاجة كده زي منهج الكلية كل سنة لازم الدكاترة يعملوه في بعض!

سيبك من الموقف إالي فات وهحكيلك على حاجة معنديش تفسير ليها.

بطبيعة الحال بيعت لمعمل الطب الشرعي عينات علشان يطلع التقرير النهائي بتاعه، شرحت جثة واحدة ست في الخمسينات من عُمرها وبعت بالفعل العينات ولقيت دكتور أحمد من المعمل بيكلمني وبيقولي:

دكتور بيتر هو إيه العينات إالي حضرتك باعتهاالي دي؟!

دكتور بيتر: عينات إيه؟ إيه الجديد ما زي كل مرة.

دكتور أحمد: لأ مش زي كل مرة، حضرتك متأكد إنك إالي صاحب العينات دي؟

دكتور بيتر: أيوة طبعا يا دكتور أحمد، هو في إيه؟

دكتور أحمد: العينات والأنسجة دي لكائن عمري ما شوفته

قبل كده، في حاجة يا دكتور بيتر غربية في الموضوع ثلاثة أجهزة ميكروسكوب اتحرقوا، و جهازين فضلت نتايجهم كلهم بايظة والأغرب من كده إني كل ما أبص على عينة وأركز معاها علشان أعرف دي إيه، يجيلي ضداع رهيب و يروح بمجرد ما أشيل عيني من على العينات وأخرها من شوية سمعت خبط شديد جدًا جاي من برة المعمل، طلعت بسرعة أشوف في إيه مالمقيتش في حاجة، أنا هبعت لحضرتك تقرير وقفل بيه الموضوع ده خلّي الجثة دي تمشي من عندك أنا مش مرتاح، الموضوع كله غريب، سلام.



نادر: ممكن توصلني بدكتور أحمد أسمع منه تفاصيل أكثر؟
دكتور بيتر: الحقيقة كنت أتمنى لكن للأسف دكتور أحمد
اتوفى بعد المكالمة دي بيومين في ظروف غامضة جدًا،
تقدر تقول شاب صحته كويسة جدًا ما عندهوش أي أمراض
يموت فجأة بعد تحليله لعينة مربية، أنا نفسي شكيت و
طلبت إن دكتور أحمد جثته تتشرح لكن للأسف مانفعش

نادر: مانفعش ليه؟

دكتور بيتر: اتقال كلام كثير، اتقال إن أهله جُم وأخذوا
الجثة ورفضوا إن حد يقرب منها، واتقال إن الجثة أصلاً
اختفت بعد الوفاة بساعتين، واتقال إن دكتور أحمد فقد
بصره بسبب انفجار عدسة ميكروسكوب في وشه وإنه
انتحر بعدها، الشاهد إن حصل تكتّم شديد على الموضوع
وللأمانة ما حاولتش أدور علشان مايكونش مصيري نفس
مصيره، أنا بدعي دايمًا ربنا يرحمه ويعزي أهله، صدقني أنا
من وقتها كنت جدّيًا بفكر إني أستقيل

نادر: خير، كان نفسي أكمل التحقيق مع طبيب تاني

دكتور بيتر: تحب أبعتك لدكتور رعاية؟

نادر: وده هيفيد في التحقيق بتاعي؟

دكتور بيتر: طبعا، دكاترة الرعاية بيشهدوا اللحظات
الأخيرة للمريض قبل وفاته وصدقني اللحظات دي فيها كلام
كثير جدًا يتقال.

نادر: موافق جدًا، تبعطني لمين؟

دكتور بيتر: سامح ابن أختي هيكيلك ومش هيخبي،
هيكون متطمن علشان أنا إللي باعتك له

نادر: طيب هتكلمه؟

دكتور بيتر: حالاً هكلمه

طلع دكتور بيتر موبايله وأجرى المكالمة التالية:

- ألو..

- أيوة يا سامح يا حبيبي

- وأنت كمان، ماما عاملة إيه؟

- نُشكر ربنا يا حبيبي

- ده أنتوا تنوروا

- بقولك إيه يا سامح، في واحد صديق ليا اسمه أستاذ نادر شغال صحفي و بيعمل تحقيق في الجورنال عنده عن أغرب حالات الوفيات، سجل معايا وكان بيستأذني أوصله لحد في الرعاية وأنا مالقيتش أحسن منك يا حبيبي، عندك مانع إني أبعثهولك؟

- لا يا حبيبي مش هنذكر أسماء مرضى ولا حاجة

- لأ دي اه براحتك يكتب اسمك أو مايكتبوش دي براحتك

- لأ إنسان كويس جداً

- ماتقلقش لو رfdوك خالك هيتصرف

- عيب يا واد إحنا بيفرق معانا معاش من غيره

- قولي أنت فين النهاردة

- تمام.. تمام.. ده العشم يا حبيبي

- خلاص هقوله، تعيش يا حبيبي

- أشوفك على خير، سلامي لماما

- مع ألف سلامة

أنهى دكتور بيتر المكالمة وقال: تمام

دكتور سامح موافق، هكتبك العنوان أهو بتاع البيت
علشان هو أجازة النهاردة ورقم تليفونه احتياطي

نادر: أقدر أروحله على الساعة كام كده؟

دكتور بيتر: حالاً، اطلع من عندي روحله، هو ساكن في ١٥
مايو يادوب تتحرك دلوقتي

- شكرت دكتور بيتر، وفعلاً نطيت في أول تاكسي قابلني.

رايح أكمل التحقيق مع عنصر مُساعد جديد من (أعوان
الموت).

الفصل السابع

(أحمد يونس)

أول ما اتحركت بالعربية لقيت السواق يقول المشوار ده هيبقى طويل ما ينفعش فيه أغاني، الوحيد إيلي ينفع في الطريق ده هو أحمد يونس، ولقيته شغل حاجة زي فيلم إذاعي لمذيع شاب قايم بدور الراوي، خطفني الحقيقة لأسلوب سرده السلس وصوته إيلي بيقدريلونه مع الأحداث وبرغم إنه قايم بدور الراوي وبدور كل الأبطال لكنه قادر يفرق بينهم كويس لدرجة خلّيتني أصدق إن في خمس شخصيات بيتكلموا مع بعض، طلّعت جهاز التسجيل بتاعي وبدأت أسجل إيلي بسمعه كان يقول:

إتفزعت على صوت الباب بيخبط، خدت نفسي وأنا قلبي هيقف وعمال ينبض بسرعة من الخوف، روحت للباب عشان أفتح وأشوف مين، ولما فتحت مالقيتش حدًا! مالقيتش شخص، لقيت القطة قاعدة على الأرض وجنبها جواب!!!!

رجعت خطوتين لورا وأنا رجليا مش شايلاني وحاسس إنني بحلم، فجأة القطة بصت لي بصة غريبة ومشيت!! لقيت نفسي اتحركت وجريت على باب الشقة، بصيت على القطة، إيلي لقيتها اختفت تمامًا!! وقفت للحظات و أنا مسيطر عليا

حالة من عدم الاستيعاب، وبعدها ماكنش قدامي غير إني أخذ الجواب إالي على الأرض، كان جوايا فضول رهيب بيحركني ومش قادر أقاومه، فمديت إيدي وأخذت الجواب، إالي لقيت مكتوب عليه إسمي الثلاثي (مصطفى سلامة البرديسي) وعنواني!، عنيا رجعت تدمع ثاني من الخوف، قفلت الباب وقعدت على الكرسي و فتحت الجواب وبدأت أقرأ الآتي:

توقعت منك ردة فعل أحسن من المرة إالي فاتت يا مصطفى عشان ما كانتش غلطتي من الأساس، أنا حاولت أبعد لكن مفيش فايذة لا أنت هتقدر تستغني عني ولا أنا هقدر أستغني عنك، مصطفى من فضلك بلاش تجاهل، بلاش تجاهل أكثر من كده...

جسمي كان بيتنفض، إيدي من الخوف عرقت جامد لدرجة إن الورقة إتبلت، سامع صوت همس جاي من كل ركن في الشقة بإسمي، كان صوت بنت عمالة تقول: مصطفى، بلاش تجاهل، أنا هنا..

الخوف سيطر عليا، خدت موبايلي وجريت بره الشقة ونزلت الشارع، اتصلت بمحمد وأنا بنهج ومش قادر أخذ نفسي من الرعب وأول ما رد عليا قولتله بغضب:

تعالالي دلوقتي بسرعة، سيب أي حاجة وأي حد وتعالالي حالاً، قفلت معاه السكة من غير ما استنى منه أي رد، وبعد عشر دقائق لقيته جاي بيجري عليا واتفجئ أول ما شافني قاعد على الرصيف قدام باب العمارة وسألني:

أنت قاعد كده ليه يا بني؟ مالك في إيه؟!

جمعت شتات نفسي وحكىته إيلي حصل، وأخذته وطلعنا الشقة وخليته يقرأ الجواب بنفسه، ملامحه اتبدلت واحتلها الخوف و الذعر، كان عمال يبصلي وهو مبرق ويرجع يقرأ إيلي مكتوب في الجواب تاني، وبعد ما خلص جبتله الورقة إيلي أنا كُنت بدأت أكتب فيها الجواب، ووريته الإسم إيلي عليها، كان فكره شارد وإيده بتترعش، سكت شوية وقال:

أكيد الشقة دي مسكونة، أو القطة إيلي أنت جبتها دي فيها ولا ساكنها جن أو عفريت، إحنا لازم نسيب الشقة دي بسرعة، الشقة دي مسكونة ومتعفرتة..

برغم الرعب إيلي كان ساكن جوايا إلا إني ما كنتش شايف إن ده حل، في إحساس بالفضول لمعرفة إيه إيلي بيحصل تحديداً بيحارب إحساس الخوف جوايا، بيدفعني استنى وأعرف السر ورا الجواب ده، و مين هي ناني دي؟!

جاوبت على محمد و قولتله:



- قطع تركيزي مع القصة صوت السواق:

السائق: دي قصة ناني يا أستاذ ده أنا سمعتها يجي 12 مرة
نادر: هو أنا بس عندي سؤال الساعة دلوقتي حوالي واحدة
الضهر، راديو إيه إلهي بيشغل رُعب الضهر ده؟
السائق: لأ أصل محسوبك ذكي، بسجل القصة بالليل

وأفضل أشغل فيها وأسمعها علشان لو فاتني منها حاجة أقدر أفهمها.

نادر: اسم المذيع ده مش غريب عليا، حد قالي عنه حاجة أو سمعت منه حاجة بس مش فاكِر، حتى صوته حاسس إني سمعته قبل كده

السائق: جَرِّب تسمعه مرة وهتدمنه، البرنامج بتاعه بيحي بالليل على ال Fm

اسمه ع القهوة والرُّعب يوم واحد في الأسبوع.

نادر: طب وباقي الأيام؟

السائق: حاجات تانية، مرة أخبار، مرة أغاني قديمة، مرة مُسابقات، بس الصراحة أنا أكثر حاجة بتضطبط لي دماغي هو الرُّعب، مش أنا لوحدي على فكرة كُل السواقين زمايلي على كدة

نادر: خلاص أوعدك هبدأ أسمع

السائق: ماتعرفناش بالكريم؟

نادر: نادر فودة

السائق: وأنا أخوك عبدالرحمن، لو عندك مشوار ثابت في نفس الميعاد كل يوم ممكن أوديك

نادر: لأ والله أنا شُغلي جنب البيت، ممكن تشغّل بقى باقي
الحكاية عايز أسمعها

السائق: لأ سيبك من دي، دي مش حلوة، أنا عندي قصص
تانية أحسن منها مليون مرة

نادرو: مش حلوة و سمعتها ١٢ مرة!!

السائق (ضاحكًا): عندك حق هي حلوة، بس أنا يعني عايز
أسمّعك حاجات كتير يعني خُذ عندك قصة طب ما تقوله

نادر: أقوله إيه؟

السائق (ضاحكًا): لأ هي اسمها كده

نادر: لأ أنا هكمل القصة بتاعت ناني أحسن

السائق: طب ما تسيبك منه وأسمّعك السِت دي أحسن من
أي حد بقى، و لا أقولك تسمع حلیم؟

أنا عندي شريط كوكتيل اشتريته من إسكندرية الصيف
إللي فات الأغاني لازقة في بعض، الأغنية تكون لسه
هتخلص تقوم داخلة أغنية تانية بشياكة، ما تلاقيش
الحاجات دي عند أي حد يا أستاذ نادر، بقولك إيه؟

نادر (ضاحكًا): قول

السائق: سمعت أغنية على إلفى جرى بتاعت أصالة وصابر الرباعي؟

نادر (بصوت عالي): مالها؟

السائق: سيبك من الأغنية دي، بيقولك أصالة لما طلعت تغني كانت الأغنية متظبطة على صوت صابر وقامت أصالة لما طلعت تغني أنت عارف طبعا إن أصالة صوتها عالي وبقى صابر يغني في حنة وأصالة تغني في حنة ثانية والأغنية طلعت وحشة أوي، بس علشان أنا بحب أصالة وصابر الرباعي لازم أسمعها كل يوم.

نادر (ضاحكا): طبعا لازم علشان ما ياخدوش على خاطرهم، أنت بتجيب المعلومات دي منين بقی یاسطی عبدالرحمن؟

السائق: من قناة مولدي

نادر: وقناة مولدي بقی قالتلك إيه ثاني؟

السائق: بيقولك إن نوال الزوجي ووائل كافوري كان المفروض هيتجوزوا بعد أغنية مين حبيبي أنا، بس ما حصلش نصيب

نادر (انهار ضاحكا): تلاقيهم اختلفوا على القائمة

السائق: إيه ده؟ هي تونس فيها قايمة زيّنا؟

نادر: هما لبنانيين على فكرة

السائق: اسكت ما تفكرنيش بموضوع القايمة ده، أنا لما جيت أطلق بنت الناس الكويسيين قلعتني هدومي وبيّعتني الجلد والسقط منها لله خلّتني أمشي أكلم نفسي في الشارع
نادر: معلى هم الستات كلهم كده، ادعي عليهم وأنت بتصلي

السائق: لا ماقدرش أصل إحنا رجعنا لبعض

نادر: هي ١٥ مايو قرّبت؟

السائق: يادوب إحنا في ١٣ مايو

نادر: لأ كده كتير أوي بقى

السائق: شكلك زهقت

نادر: مازهقتش ولا حاجة

السائق: أنت تعرف إن أحمد يونس ده...

نادر: أحمد يونس مين؟

السائق: ياعم بتاع الرّعب إالي كنت لسه بتسمعه من شوية

نادر: ماله؟

السائق: وحيد أمه وأبوه

نادر: ربنا يخليه ليهم

السائق: بس ليه أربع إخوات

نادر: ألف مبروك

السائق: هفهمك، بيقولك أبوه خلف أربع عيال وقعد عشرين سنة ما بيخلفش وبعدها خلف

نادر: وده عرفته بردو من قناة مولدي؟

السائق: لأ، من زكريا

نادر: زكريا مين؟

السائق: زميلي طبعا هيكون مين يعني

نادر: و زكريا عرف مينين؟

السائق: ابن عم زكريا شغال في مبنى الإذاعة والتلفزيون وأنت فاهم بقى مفيش حاجة بتستخبي يا أستاذ نادر، ده بيقولك إنه أصلاً سعودي، تعرف أنا عرفت ده إزاي بقى؟

نادر: إزاي ياعم عبدو؟

السائق: أصله بياخذ أجازات كثير ويبطلع يعمل غُمرَة أو ممكن مايكونش سعودي ولا حاجة ويكون غني ما أنت عارف بقى بتوع التلفزيون والممثلين على قلبهم فلوس قد كده، هو أنت بتشتغل إيه؟

نادر: على قلبي فلوس قد كده، صحفي فضلة خيرك

السائق: أيوة ياعم ما أنتوا واكلينها والعة، بالله عليك لما تقابل أحمد يونس قوله إن كل التكاسي بتسمعك وعايزينك تزود الرُعب تخليه يومين مش يوم واحد و تقوله إن عبدالرحمن متابِعك هو ومراته و عياله وعايِزة يعملِي إهداء بأغنية التلميذ و الأستاذ للفنان رمضان البرنس و يهديها للواطي زكريا.

نادر: عم عبدالرحمن أنا تعبِت ممكن تكمل القصة؟

السائق: لأ مش هينفع أصل إحنا وصلنا، شايف المدخل إللي كله شجر ده؟ ده مدخل ١٥ مايو، أنت نازل أي مجاورة بقى؟



نادر: مجاورة ٧

السائق: مُتأكد؟

نادر: والمصحف أه

السائق: أصل ممكن يكون سمعت غلط وتكون نازل أطلس
ولا أي مُجاورة تانية، على العموم خلّص مشوارك وأنا قاعد
مستنيك

نادر: للأسف أنا هبات هنا ياعم عبدالرحمن

السائق: هتبات عند حد أول مرة تزوره؟ ما يصحش كده الناس يقولوا عليك إيه؟ كل بيت له حرمة يابني

نادر: اركن على جنب ياعم عبدالرحمن، أنا هنزل هنا، الحساب كام؟

السائق: إيلي تدفعه ولو مش عاوز تدفع خالص ولا يهملك، ده أنت أول واحد تسيبني أحكي إيلي عندي كله من غير ما يقاطعني.

نادر: معلى الحساب كام ياعم عبدالرحمن؟

السائق: في العادي هاخذ ٢٠ جنية إنما منك ١٠ جنية كفاية أوي.

نزلت من العربية وعندي كمية ضداع ممزوجة بإبتسامة عريضة من رغي عم عبد الرحمن الراجل الطيب المصري أبو دم خفيف إيلي قدر يخرجني من التوتر وشدة الأعصاب إيلي كنت فيها.

وبسؤال شخص والثاني عرفت عنوان دكتور سامح وتوجهت له.

الفصل الثامن

(غرفة الرعاية)

تليفوني رن..

نادر: ألو

المتصل: أستاذ نادر معايا؟

نادر: أيوة يافندم مين حضرتك؟

المتصل: أنا دكتور سامح إيلي حضرتك جايلي

نادر: أنا تحت العمارة

دكتور سامح: هستأذنك في آخر الشارع هتلاقي كوفي
شوب اسمه بلاك تايجر، بستأذنك تستناني هناك وأنا هلبس
وأجي لحضرتك

نادر: حاضر هستناك هناك



توجهت للكوفي شوب، قعدت وطلبت عصير البُرتقال
رفيقي في ليالي الصيف الحارة وليالي الشتاء الباردة، فتحت
شنطتي وبدأت أرتب ورقي لحد ما دكتور سامح يوصل،
بعد أقل من عشر دقائق دخل شاب في أوائل الثلاثينات من
عمره لابس نضارة طبية وسألني حضرتك أستاذ نادر؟

فجاوبته أيوة، شد الكرسي و قعد وبدأنا حوارنا...

دكتور سامح: أنا بعذر ليك إني ماقدرتش أطلعك البيت

عندي، المدام لسه مخلقة وماكُتَاش هنعرف نقول كلمتين
بسبب صوت ريمون ابني

نادر: حمد لله على سلامتها وربنا يخلي

دكتور سامح: أستاذك قبل أي حاجة إني هسجل زي ما
سجلت الحوار مع دكتور بيتر

دكتور سامح: بس إيلي أنا فهمته إن الحوار هينزل في
الجورنال مش هيتسجل

نادر: التسجيل ده علشان أختصر الوقت بدل ما أقعد أكتب
وراك كل كلمة وأعطلك يعني تقدر تقول إنه مجرد مرجع ليا
دكتور سامح: تمام فهمت، ممكن أعرف اسم الجورنال إيه
علشان أبقي أشتري العدد

نادر: الجورنال اسمه غُمق الحدث، الباب إيلي بكتب فيه
اسمه ما وراء الطبيعة ولو تسمحلي أنا هبعت لحضرتك كذا
عدد هدية وقت نزول التقرير

دكتور سامح: مُتشكر جدًا يا أستاذ نادر، قولي تحب أبدأ
منين؟

نادر: أنا هنا مُستمع، حضرتك ابدأ من مكان ما تحب وأنا لو
عندي سؤال هسأله

دكتور سامح: أنت بتصعب عليا كده الموضوع، بس خليني
أفكر إيه أحسن حاجة أبدأ معاك بيها

نادر: للدرجادي هم كثير؟

دكتور سامح: عُرفة الرعاية من أكثر الأماكن إالي بيحصل
فيها عجائب وبنقف قدامها مش لاقيين تفسير.



نادر: غالبًا حضرتك فهمت غلط، أنا مش عاوز كلام طبي
دكتور سامح (مقاطعًا): لأ أنا فاهم، أنت عاوز حاجات
غريبة ومُخيفة صح كدة؟

نادر: الله ينور عليك

دكتور سامح: هتصدقني لو قولتلك إن المرضى في
الغيبوبة بيكلموا بعض؟

نادر: يعني إيه؟

دكتور سامح: كذا مرة نسمع مريض في غيبوبة بيتكلم
كلام واضح ومفهوم جدًا ودي ما بتكونش الصدمة، الصدمة
لما تلاقي مريض تاني في غيبوبة بردو يزُد عليه وبيتكلم في
نفس الموضوع، يعني مثلاً الشهر إلكي فات كان في عندنا
مريض في غيبوبة كبدية اسمه الحاج مُحسن خليني أقولك
إن مريض الغيبوبة الكبدية ممكن يزَعق ويشتم بدون وعي.

الحاج مُحسن كان إلكي على لسانه ماتقلعونيش هدومي
يا ولاد الكلب، وكل ما يفوق لثواني بسيطة أدخل أقوله
محدث قلّعتك هدومك وإحنا مغطيينك كمان أهو، بعدها
يدخل في الغيبوبة تاني ويرجع يقول نفس الجملة >
ماتقلعونيش هدومي يا ولاد الكلب >.

معرفش إللي هقولهولك ده كوميدي ولا مُرعب، مريضة
تانية في غيبوبة تامة كان اسمها ست سامية زعقت وهي في
الغيبوبة وقالت يا دكتور رفيق رجعوا للراجل هدومه بدل ما
ربنا ينتقم منكوا.

حبيب بس أعرفك إن الست سامية دخلت عندنا و هي
عندها غيبوبة أصلاً و ما فاقتش ولو لدقيقة واحدة و قبل
ما تسألني أيوة رئيس قسم الرعاية اسمه دكتور رفيق، أنا
اتجننت لما سمعتها ونزلت للاستقبال و قولتلم اقلبوا لي
الدنيا بإسم سامية عبدالرازق وهدان دخلت هنا قبل كده و
لا، قولت يمكن تكون جت قبل كده واسم الدكتور رفيق
متخزن في الذاكرة عندها ولكن دي كانت أول مرة تُدخل
عندنا المستشفى، أنا ماقدرتش أسكت لما ابنها جه يزورها
حكيتله إللي حصل فقاللي:

أنا مش مستغرب إللي حضرتك بتقوله، كل مرة ماما
بيجيلها غيبوبة لازم تتكلم عن ناس ماتعرفهمش وتحكي عن
حاجات هتحصل وبالفعل بتحصل، ركز معاها لأنها هتتكلم
تاني.

عدى يوم وإثنين و رجع عم مُحسن يشتم تاني، لقيتلك
المريضة سامية بتزُد بصوت عالي: أنت عارف يا رفيق لو ما
رجعتلوش هدومه ابنك هيسقط في الثانوية السنة دي.

عارف دكتور رفيق عمل إيه؟

بعت لأبن عم مُحسن جابله طقم من البيت وحطهوله جنبه على السرير، عم مُحسن مات بعدها بساعة.

أما السيت سامية فضلت تنادي على عم مُحسن وتقول:ه

مش اتفقنا هنمشي سوا، مش قولتلك تعرّفني وأنت ماشي، أنا هحصلك بُكرة مع أذان الفجر.

عاوز أقولك إن حرفيًا مع أذان الفجر كُل أجهزة السيت سامية توقفت عن العمل وكأنها وعدت ونفذت.

دي أول حكاية تحب تسمع ثاني؟

نادر: ياريت

دكتور سامح: موقف كوميدي و غريب عمري ما بنساه، الحاج ناصر كان محجوز عندنا في الرعاية كان كل شوية ينادي يقول: هاتولي سيجارة علشان هموت، طبعا إحنا دورنا نطبطب و ندلع و نعامل المريض زي الطفل و خصوصاً لو كان كبير في السن، خلاني قاعد معاه وقالني: هاتلي ياد أنت سيجارة

قولتله: ممنوع تدخن سجاير هنا

قالني: هات من العلبة إيلي أبوك مخبئها في رف الحمام.

- أنا كأني إتكهربت، لأن بابا فعلاً مخبي علبة سجاير في الحمام وماحدث يعرف غيري لأن لو ماما عرفت مش هيحصل طيب

الحاج ناصر: مالك مستغرب كده ليه؟ تحب أقولك أنت كنت بتذهب إيه الأسبوع إالي فات؟

دكتور سامح: لأ شكرًا

الحاج ناصر: قوم اجري يلا هاتلي سيجارة قبل ما أموت - قولتله حاضر وطلعت وقفت مع زمايلي ندرتش شوية، سمعت صوت الحاج ناصر بينادي بصوت عالي أوي، روحته بسرعة لقيته واقف على السرير وبيشاورلي

وقالي: مش قولتلك هاتلي سيجارة يا زفت قبل ما أموت؟ بعدها وقع مات، أيوة مات يا أستاذ نادر، الراجل كان زي الفل و كان المفروض هيتنقل لغرفة عادية خلال ساعة أو ساعتين بالكثير لكنه مات!



تسألني مات إزاي، تسألني كان عارف إزاي إنه هيموت، كل دي حاجات بينه وبين ربنا، إللي أقدر أقوله أنا كطبيب إنه جاله سكتة قلبية.

خليني أختملك بقصة ماما هدى، ماما هدى دخلت عندنا في غيبوبة تامة و من أول ما دخلت وكان واضح جدًا إن الحالة مُنتهية وإنها مسألة وقت، ولادها كانوا بيعجوا كل يوم وعاوزين يسمعوا أي كلمة تديهم أمل، للأسف إحنا

يبقى موقفنا صعب جدًا في المواقف دي لأننا مش هينفع
نڏي أمل زائف، فدايمًا بيكون ردنا إن إحنا بنعمل إللي علينا
ومفيش حاجة بعيدة على ربنا وبنحكيلهم عن حالات كان
مفقود فيها الأمل تمامًا وفاقت فجأة.

إبنها الكبير كُنت شارحله الوضع بمُنتهى الوضوح علشان
هو سألني وقال لي لازم نرتب نفسنا، رئيس القسم عندنا كان
مُتعاطف جدًا معاهم و كان بيقف يكلمهم كتير وقال لإبنها
الكبير: بالوضع إللي قدامي الحالة قدامها أقل من ٢٤ ساعة و
تحصل الوفاة.

بس إللي حصل يا أستاذ نادر إن الحالة كملت ثلاثة أيام و
ماحصلش وفاة، رئيس القسم قال لإبنها الكبير سؤال خلى
جسمي كله يقشعر..

رئيس القسم: هو في حد ماما بتحبه مسافر؟

الإبن: أه أخويا الصغير

رئيس القسم: فين؟

الإبن: دبي

رئيس القسم: ومُنتظر يجي قريب؟

الإبن: طيارته هتوصل القاهرة بكرة الساعة تسعة الصبح،

هو في حاجة؟

رئيس القسم: إيلي هقولهولك ده ماينفعش دكتور في مكانتي يقوله لكن دي حقيقة لمستها وشوفتها بعنيا طول ثلاثين سنة شغل.

الإبن: إيلي هي إيه؟

رئيس القسم: الأم بتفضل مستنية أقرب حد ليها من ولادها لو المفروض إنه جاي يشوفها وبعدها بتسلم الأمانة وتتوفى

الإبن: معقول؟!

رئيس القسم: أنا بحكيك بناءً عن سنين طويلة مريت بالموقف ده كتير جدًا.

دكتور سامح: عارف إيلي حصل يا أستاذ نادر؟

الإبن وصل المطار الساعة ٩ و ربع وماما هدى إتوفت الساعة ٩ ونص.

ودي حاجة أنا شوفتها بعيني مش بحكيها على لسان حد.

نادر: حقيقي أنتوا بتشوفوا مواقف صعبة جدًا ومؤثرة جدًا وأنا مبسوط إن الناس هتقرأ وتعرف عنكم أكثر.

دكتور سامح: أنا عارف إنك كُنت عاوز مواقف تخوَّف بس إحنا أغلب إللي بيحصل عندنا مواقف إنسانية، بس خليني أقولك إن إحنا كل ليلة بعد ما بنهدي النور قسم الرعاية بيتحول لمكان بنسميه وادي الموت، بصراحة أنا بخاف من غرفة الرعاية بالليل بس ما بقدرش أقول ده

نادر: بتخاف من إيه؟

دكتور سامح: بخاف من الهمهمات إللي بسمعها والهمس المُرعب والأصوات إللي بتهمس بإسمي والخيالات المُظلمة إللي بشوفها بين السراير

- بخاف من الخبط إللي بسمعه على الباب بالليل وأنا متأكد إن مفيش حد واقف برة

- بخاف وأنا متأكد إن ملك الموت جاي يمارس مهامه

- بخاف وأنا عارف إني عامل مساعد له في تنفيذ المهمة إللي جاي ليها

- بخاف لما بسمع حد من المرضى وهو غايب عن الوعي بيبكي ويقول سيبوني أرجع ولو حتى يوم، ولما أسمع مريض يقول أنا جايلك يا أمي ولا أسمع مريضة تقول سامحني يا أبويا و لما أسمع شابة صغيرة تقول ولادي أمانة


- بخاف لما ببقى بتجول من سرير للتاني وبتابع الحالات بالليل وألاقيهم مفتحين عينهم وبيبصولي وما بيتكلموش

- بخاف لما مريض في غيبوبة تامة ويفتح عنيه ويبتسملي

- بخاف لما أكون واقف جنب مريض في غيبوبة ويمد إيده ويمسك إيدي ويكلبش عليها وكأنه بيقلولي ماتخليهمش ياخدوني

- بخاف لما مريض يفوق من غيبوبة و يحكي لي عن كل إيلي اتعمل معاه وهو في الغيبوبة بدقة شديدة ولما أساله عرفت إزاي ده؟ يقلولي: أنا كنت طائر وشايفكم وأنتوا بتعالجونني

- بترعب من الراوية الموحدة إيلي كل مرضى الغيبوبة بيتكلموا عنها، رواية الممر المظلم إيلي في آخره ضوء بعيد وإنهم طول ما بيبصوله بيكونوا مرتاحين وبيجروا ناحيته، وطول ما هما بيجروا في إيدين بتطلع من تحت الأرض و تمسك رجليهم و كيانات مظلمة بتجري وراهم في الممر ده.



تعرف إن قعدتنا النهاردة دي كُنت عارف إنها هتحصل من
أسبوع؟

نادر: إزاي؟

دكتور سامح: عم إسماعيل قالي في صحفي هيجيلك
وهيتكلم معاك وهيكتب كلام كويس عنك

نادر: ده مريض عندك في الرعاية؟

دكتور سامح: لأ، ده مغسل عرفته بطبيعة الشغلانة، أقولك
قالي إيه كمان؟، قالي إنك هتطلب مني أوصلك بيه علشان
كدة الورقة دي فيها تليفونه وعنوانه وهو مستنيك يا أستاذ
نادر

توقفت عاجزًا عن الرد والتعليق، حقيقي الموت وما قبله
وما بعده عالم يستحق نظرة أكثر شمولية مش مجرد نظرة
خوف من سكرات الموت وأقوال متضاربة حول ما يحدث
للميت في قبره.

نادر: أنا بشكر الظروف إالي جمعتني بيك يا دكتور سامح

دكتور سامح: الشكر لله يا أستاذ نادر

نادر: أستاذنك وأسف إني طوّلت عليك

دكتور سامح: أنا إالي أسف إني كُنت سبب في الدموع إالي
بتحاول تمنعها من أول ما بدأت كلامي، بس خليني أقولك
حاجة فلسفة الموت أعمق بكثير من فقدنا لحبايبنا، طول
عمري شايف الموت ما هو إلا عبور لحياة أفضل بكثير

نادر: أشكرك

تركت دكتور سامح وأنا مُحمل بمشاعر وأحاسيس كثيرة
جدًا يغلب عليها إنها مشاعر إيجابية، يمكن ده ما كانش

المتوقع من القعدة دي لكن إللي حصل بصراحة أفضل بكثير
من أي سيناريو كُنت راسمه.

قومت مشيت وبعد ما ركبت التاكسي في طريق رجوعي
للبيت، بدأت أفكر في حوارني مع سامح، ووقفت عند حاجة
مهمة خلتنني كنت هتجنن!!، هو إسماعيل ده عرفني إزاي؟،
لأنني بقيت مشهور ولا فيه حاجة تانية غريبة بتحصل؟!، لا.
لا، لا، كده جنون، أنا أفكرت حاجة مهمة جداً، البرواز بتاع
الغروب فوق القبور اللي شوفته لما زورت الست راضية، كان
موجود عند دكتور بيتر كمان!!، والكلمات اللي ردها عليا عم
حمدي، كان مكتوب منها على بليزر نحاس!!، وعلى شنطة
دكتور سامح!!، لا. كده جنون بجد، أنا إزاي ما كُنتش واخد
بالي من كل ده؟، ولا أنا اتجننت ولا إيه؟!..

الفصل التاسع

(حامل أسرار الموتى)

بعد ما عقلي كان هيشت مني، لقيت نفسي الوقت سرقني في التفكير وكنت قربت على البيت، كانت الساعة ستة مساءً، المفروض إني هطلع البيت، وأقعد أرتب إللي كتبتة وأفرغ إللي سجلته، ما أنا لازم أعرف كل ده آخرته إيه، ولازم أكمل، والصبح هكلم عم إسماعيل المغسل.

كان قلبي بيدق بسرعة غريبة، أول مرة أحس إن الللي بيحصل مُريب لدرجة دي، وبدأت أسأل نفسي: يا ترى بقى مين قابلته ميت ومين عايش؟، وفجأة اتفزعت على صوت تليفوني بيرن!!.

نادر: ألو.. نادر فودة مين عايزني؟

المتصل: أنت متصلتش بيا ليه؟، هو مش دكتور سامح قالك تكلمني؟

نادر بتعجب: عم إسماعيل المغسل؟!

المتصل: أيوة يا سيدي هو ولسه جايب رقمك من دكتور سامح حالاً، أنت فين؟

نادر: أنا روحت

إسماعيل: بطل كذب وقول للسواق إيلي أنت معاه يجيبك
وييجي على العنوان إيلي معاك في الورقة.

نادر: مش ممكن نأجل لبكرة؟

إسماعيل: لأ مش ممكن يا النهاردة يا مفيش

نادر: حاضر ياعم إسماعيل، اطلع ياسطى على القلعة

وصلت العنوان بعد ساعتين لف ودوخة، وعلى الساعة
ثمانية وشوية كنت قدام البيت، كان ساكن في الدور
الأرضي، بيت صغير على أول طريق آخره مقابر، مجرد ما
خبطت واحد فتحلي وقال لي بزعيق: أنا مبحبش شغل العيال
الصغيرة الطايشة ده اتفقنا على ميعاد يبقى تلتزم بيه

نادر: ماشي ياعم إسماعيل أنا أسف

إسماعيل: أنت لسه هتتأسف أدخل يلا خرينا نخلص

نادر: أنت عرفت منين إن أنا هروح للدكتور سامح

إسماعيل: عرفت، وعرفت إنك روح لنحاس وروحت
لمراته راضية وروحت لحمدي وروحت للدكتور بيتر و لسه
هتروح لناس تانية

نادر: بردو ماجاوبتنيش! كل دول ناس أنت عرفت إن أنا

روحتلهم بعد ما أنا روحتلهم ومشييت إنما على حسب كلام
دكتور سامح أنت كُنت عارف إن أنا رايحله من قبلها
إسماعيل: اعفيني..

كان جوايا إحساس إني قلبي مقبوض، عم إسماعيل ده
شكله وهيئته وطريقته كلهم عِجاب، كفاية إحساسي إني
قاعد جوه قبر مش بيت، واللي جاي على بالي، إن في الغالب
بيتر وسامح أموات، حتى إسماعيل نفسه، رغم إني شايفه
وقاعد قدامي!!

نادر: عاوزني ليه ياعم إسماعيل

إسماعيل: أنت إللي عاوزني مش أنا إللي عاوزك، ولو مش
عاوز تسمع حاجات من إللي أنا بشوفها براحتك

نادر: لأ طبعا، هو أنا هاجي المشوار ده كله على الفاضي؟
أكيد عاوز أسمع

إسماعيل: مش هتطلع الجهاز إللي بتسجل بيه؟

نادر: حتى دي كمان عارفها؟

إسماعيل (مُتجاهلاً سؤالي): عمري ما بنسى المتوفي إللي
روحت أغسله في الزاوية، تقريبا أنا اتضربت من مراته وبناته
ضرب عُمرِي ما اتضربته طول عُمرِي

نادر: ضربوك ليه؟

إسماعيل: علشان داخل أغسل أبوهم، المهم بدأت يابني
الغسل وبدأت أوضيه وفي عز ما أنا بوضيه الراجل قام
مّتاوب و رجع قطع تاني!

أنا بقيت واقف مش عارف أنا بيتهيا لي ولا دي حقيقة،
أطلع أسألهم حد كشف على أبوكم، أعشمهم ولا أكمل الغسل؟
سميت وقولت أكمل قام الراجل عطس!

قولت مابدهاش طلعت برة و قولتلهم أبوكوا ما ماتش
أبعثوا هاتوا الدكتور بسرعة، الزغاريط ملّت البيت وبعد
الضرب إالي اتضربته كله بقى يحضن فيّا، مفيش عشر
دقايق وكان الدكتور جه وكشف عليه وقال الراجل ميت
وشبعان موت، بقيت أحلف له إن الراجل إتّاوب وعطس
قدامي.

قالي: أنا ليا إالي قدامي، أنا دكتور وده شغلي.

تخيل بقى أنا بغسل واحد وأنا مُتأكد إنه ما ماتش وكل
الشواهد إالي حواليا بتقول إنه مات!

وأنا بلف الكفن على نصه إالي فوق وبنيمه على جنبه
اليمين الراجل قام ماسكني من كتفي اتمكنت وقومت ضاربه

بالقلم قولت يمكن يفوق ولا في فايدة.

جابوا النعش وشالوه، واحد من إيلي شايلين النعش قال:
الميت اتكلم!

حصل هرج ومرج ورجعوا شالوه بالنعش ثاني وراحوا بيه
على الجامع، في الوقت ده قررت إن أنا مش هسيبه وهفضل
معا.

وصلنا الثرب و أنا طول الطريق عمال أقول للناس يا
جماعة الراجل ده فيه حاجة مش مضبوطة ولا حد سأل فيا،
نزلوا بيه الثربة و سمعنا زعيق جاي منها كانوا ثلاثة إيلي
بيدفنوه تحت طلع إثنين و شايلين واحد منهم بيقلوا إنه
أغمي عليه تحت، قولت في وقتها على طول الميت كلمه،
بردو محدش سمعني وقفلوا على الراجل الثربة وكله إتشغل
بالثربي إيلي أغمي عليه ومشىوا وسابوا الميت لنصيبه.



خذت تليفون واحد من الثريّة الإثنين الثانيين وطلع إلی
أغمي عليه أبوهم الثري الكبير، و ثاني يوم اتصلت بيهم
أتطمئن على أبوهم رد عليا ابنه وقالی أبويا فاق بالضبط بعد
دقيقتين وقالی:

الميت حي.. الميت إلی دفناه حي!

إحنا بلغنا على طول أهل الميت و قالوا إنك قولتلهم كده
أنت كمان، فتحوا الثربة وجت عربية الإسعاف خدته وودوه

المستشفى وكشفوا عليه قالوا إنه توفي من ٤٨ ساعة!!!

نادر: ممكن أقابل الثربي ده؟

إسماعيل: هتقابله، بس ماتستعجلش

نادر: طب مصير الراجل إللي مات إيه؟

إسماعيل: لما تقابل الثربي يحكيك

نادر: طب أنا دايمًا أسمع إن في حاجات على وش الميت بتشوفوها بتقولكم إذا كانت دي سوء خاتمة و لا حُسن خاتمة؟

إسماعيل: أسف دي حاجات ماينفعش أقولها، دي بالذات أمانة ولو قولتها أبقى خاين للأمانة.

- تعرف يا أستاذ نادر إن أنا ما باخدش فلوس على الشغلانة دي؟ ومش أنا لوحدي، معظم زمايلي كدة.

أنا بعمل ده زكاة عن نفسي و عن عيالي وبدعي ربنا يقدرني أفهم كل رسالة الميت بيوصلها لي وأنا بغسله، وبحاول دايمًا أستره من عيون الناس حتى أقرب الناس له، ده أنا في مرة مجرد ما بدأت أغسل الميت فضل يبكي ودموعه ما بتقفش، ولاده إنهاروا خرجتهم كلهم برة وشديت الكرسي وقعدت جنب راسه أقرأ قرآن وأذكر ربنا

فوق الساعة وكُنتَ بمسح دموعه بمنديل لحد ما بّطل بُكاء
واترسم على وشه ابتسامة حسيت إنها طُمأنينة.

كُنت في مرة دخلت أغسّل واحد لقيته فاتح بوقه على
الأخر ومكلبش وعنية مبرقة زي ما يكون شايف جهنم
قدامه، أهله كانوا مغطين وشه من كُتر خوفهم منه، جبت
طرحه قماش كبيرة من مراته و لفيتها حوالين دماغه
بالطول و شديتها جامد لحد ما بوقه إتقفل وعقدتها كذا
عُقدة و فضلت أضغط على عينيه علشان تقفل لحد ما قفلت
بعد يجي عشر دقائق لكن وأنا بغسّله وبدّخل المية بين
صوابع رجليه شوفت منظر مستحيل أنساه، عنيه فتحوا
تاني لكن كلها كانت بيضا والنني الأسود اختفى تمامًا،
معرفتش أعمل حاجة غير إني رميت ملاية على وشه لحد
ما أخلص غُسل و بعد ما خلصت رفعت الملاية بحذر شديد
لقيت عينيه بقت كُتلتين من الدم، ما كانش قدامي حاجة
أعملها غير إني أكفن على المنظر ده.

نادر: قولي ياعم إسماعيل إيه أكثر مرة ارتحت وأنت
بتغسّل؟

إسماعيل: همّ مرتين يابني

- مرة كُنت بغسّل إمام جامع، طول ما أنا بغسّله ريحة
الأوضة كانت جميلة جدّا وكان على وشه ابتسامة بشوشة

تطمئن.

نادر: و المرة الثانية؟

إسماعيل: كُنت بغسل طفل، أمه كانت مُنهارة وخرجوها برة وبمجرد ما بدأت أغسّله قومت فتحت الباب وطلبت منها تدخل علشان تشوف إيلي أنا شايفه.

نادر: كُنت شايف إيه ياعم إسماعيل؟

إسماعيل: ملاك نايم يابني و كل شوية الضحكة تملّى وشه كأنه عايش و لولا إنه ميت وشبعان موت كُنت شكيت في إنه ميت، بعد ما أمه شافت المنظر ده وقفت وشاركت في الغُسل، ده غير الحالة العامة إيلي كانت في الأوضة كنت حاسس إن في زفة عريس بتستعد علشان تبتدي وكُنت سامع أصوات عذبة معرفش مصدرها لكني مرتاح و سعيد جداً وأنا بسمعها.

نادر: أصوات إيه أنا مش فاهم؟ كان في كلام قدرت تميزه؟

إسماعيل: كانت حاجة كده عاملة زي أصوات العصافير وأصوات تسبيح جميلة جداً تخليك طاير، بالمناسبة والدة الطفل هي كمان سمعت، أزيدك من الشعر بيت؟ إيلي شالوا نعش الطفل سمعوا الموضوع.

- تعرف إن إحنا كمغسلاتية وحنوتية و ثربية برغم حزننا
لوفاة أي طفل إلا إننا بنكون مبسوطين في نفس الوقت إننا
شاركنا في توصيله للجنة و دايماً أقول لكل أم و لكل أب
فقدوا طفل ليهم، ملّوا عنيكوا منه كويس بالنظرة الأخيرة
لأن ده سبب دخولكم الجنة وإوعوا تضيعوا السبب ده
علشان دُنيا طالت أم قصُرت فهي دُنيا زائلة.

نادر: طب إيه إيلي عندك تاني تقولهولي؟

إسماعيل: كُنت في مرة بغُسل ميت و أنا بغسل له راسه
لقيت حاجة في ودني بتقولي دقي المية أكثر، من غير
تفكير دقيت المية فعلاً، بعدها عرفت من مراته إنه لما كان
بيستحمى وهو عايش كان بيحب يدفي المية سواء صيف
أو شتا.

وفي مرة كُنت بغُسل أخين توأم ماتوا في حادثة، أقسم
لك إني كُنت لما بغُسل واحد بسمع التاني بيعيط ولما أغُسل
التاني أسمع الأولاني بيعيط.

كُنت في مرة بغُسل شيخ، طول ما أنا بغسله شامم ريحة
حلوة جدًا طالعة من جسمه وسامع صوت قرآن بيترتل
بصوت جميل من مصدر غير معلوم.

الحكاية إيلي هقولها لك دي تفسيرها مش عندي، اتصلوا

بِيا أروح أغسّل واحد في المستشفى، رocht فقابلي أولاده
و قالوا هنطلعه من التلاجة و فعلاً طلعه و حطيناه على
ترابيزة الغسل إالي موجودة في المستشفى وأول ما شغلت
الخرطوم و المية جت عليه، الراجل فتّح عينيه الإثنين
وبصلي بصة عمري في حياتي ما بنساها، حسيت إن عزرائيل
إالي بصلي ولقيت عينيه بتلف في الأوضة بخوف شديد
لدرجة إني بصيت حواليا عايز أشوفه هو ببص على إيه!

ولاده الإثنين كانوا معايا ماحدث منهم شاف حاجة من
إالي شوفتها، كملت الغسل و طول ما أنا بغسل سامع عياط
حد و نهنة كلها خوف وفزع، سندنه و قعدناه على ترابيزة
الغسل حسيت بنار طالعة من جسمه بتحرقني، ماكنش
قدامي أي حاجة أعملها غير إني أخلص الغسل بسرعة، لما
خرجت لقيت واقف برة واحدة ست عمالة تعيط وتقول:
يارب سامحه على إالي عمله.

شاورتلها وخذتها على جنب وقولتلها أنتي مراته؟

قالتلي: أه

قولتلها: من غير ما أعرف تفاصيل، إالي حصل جوا بيقول
إن جوزك عمل مُصيبة وإالي سمعتك بتقوليه أكدي الكلام
ده، شوفي جوزك عمل إيه وحليّه قبل ما يتقفل قبره عليه.

ردت قالتلي: أكل حق ولاد أخوه الأيتام وأنا هكلم
مرات أخوه دلوقتي وهقولها تيجي تاخذ كل حقوقها بس
يسامحوه

نادر: هل معنى كده إن كل واحد بيغسل بيقدر يعرف حالة
الميت إيه؟

إسماعيل: هل كل صحفي بيعرف يعمل مواضيع زي
التانيين؟

نادر: لأ

إسماعيل: و ده نفس الرد بردو لأ.

نادر: اتفضل كمل

إسماعيل: هحكبك حكاية الجثة إيلي من غير راس، انتبه
كويس للي هتسمعه.

- برغم إننا بنشوف كتير و قليل لكن لما بيجيلي جثة من
غير راس و أعرف إنها مقطوعة بفعل فاعل، موضوعة بيبقى
بيخوف، لما فتحت الجراب الكبير إيلي محطوط فيه الجثة،
طبعا كانت متشرحة لكن ده مايخصنيش أنا بغسلها زي أي
جثة، بدأت أوضيها فجأة قام النور قطع، في الحالات إيلي
زي كده بيبقى معايا كشاف بشغله لحد ما حد من إيلي

موجودين برة المغسلة يفتحلي، طلّعت الكشاف علشان
أولعه إنه يشتغل أبدًا مع إني مغيّر البطاريات بتاعته إمبارح،
فضلت أفتح وأقفل فيه علشان يشتغل مفيش فايدة، خبطته
خبطتين نور وطفى، وفي اللحظة إلكي نور فيها لقيت الجثة
قاعدة على الترابيزة، لأ و إيه الراس موجودة!!



والكشاف اتسلط على الوش وشوفته بالضبط وكان مُبتسم

ابتسامة نَشَفَت الدم في عروقي، استعذت بالله من الشيطان
الرجيم وفضلت أقول:

- ربي أعوذ بك من همزات الشياطين وأعوذ بك ربي أن
يحضرون.

- ربي أعوذ بك من همزات الشياطين وأعوذ بك ربي أن
يحضرون.

- ربي أعوذ بك من همزات الشياطين وأعوذ بك ربي أن
يحضرون.

وقفت في الضلمة بطولي لا عارف أروح ناحية الباب و لا
عارف أنادي على حد، عارف أنت لما تقعد شوية في الضلمة
وعنيك تاخذ عليها بتبدأ تشوف في الضلمة، أنا شوفت
بالضبط إللي هقولهولك..

الجثة نزلت من على المغسلة وشدت كفن من الموجودين
على الترابيزة و لبسته زي ما يكون عباية، تقدر تقول بقى
شكلها عامل زي العفاريت إللي بتشوفهم في أفلام الرعب
حرفيًا أنا رجليا مابقتش قادرة تشيلني وشوفت الميت بيلف
ببطء في الأوضة ويقف في كل ركن شوية لحد ما قرب عند
الرُكن إللي أنا واقف فيه وأنا مفيش في أيدي حاجة أعملها
غير إني بدعي وبستغفر ربنا، فضل يقرب ببطء مني ومع

كُل خطوة يقربها رُوحِي بَتَتسحب مِنِّي لحد ما بقى واقف
في وشي حَسِيت ببرد رهيب خارج من جسمه، مَدِيت إيديا
بالراحة جَدًّا و قَرَبْتها مِنْهُ علشان أَتأكّد في حاجة قدامي ولا
لأ، لَمَسْت بِإيدي الكفن وفي نفس اللحظة الكشاف نُور في
إيدي التانية فَرَفَعْتَه ببطء وجسمي كله بِيَتَنَفَضُ و سَلَطْتَه
على وشه، شَوَفْت وش مُخيف ونظرات غضب و دم بينزل
من مكان الدبح.

هي صرخة واحدة خرجت من الجُثة أنهت كل حاجة
وإِتَظَفَى الكشاف واختفت الجُثة وساد الظلام من جديد
ولقيت إيد بَتَخْبِطُنِي على وشي، بصيت لقيتني واقع على
الأرض وجنبي الكشاف متكسر وواحد من العاملين في
المستشفى بيقولي: مالك يا عم إسماعيل في إيه؟ أنا أول ما
الكهربا قطعت دخلت بسرعة لقيتك واقع على الأرض مغمي
عليك، مفيش دقيقة والكهربا جت وقعدت أفوِّق فيك.

قومت يا أستاذ نادر بصيت بسرعة على الجُثة لقيتها في
مكانها والكفن في مكانه زي ما هو لكنه غرقان دم، هل ده
معناه إن إلهي شوفته حصل؟ الله أعلم.

لما خرجت طلبت من ابن المتوفي يوريني صورة أبوة،
كانت نفس الملامح إلهي شوفتها جوا في المغسلة، و حاجات
كتير بقى يا أستاذ نادر يكفي إن أنا أقولك إن المُغسَّل هو

حامل أسرار الجثة وزى ما قولتك من شوية هي أمانة،
تعرف إن أنا لما جيت أغسل أبويا هو إللي كفن نفسه؟

نادر: إزاي؟

إسماعيل: والله زي ما بقولك كده، كنت بغسله في بيته
وكانت حالتي وحشة جدّا، بعد ما غسلته خرجت أغسل
وشي من كُتر العياط، رجعت لقيته متكفن وعلى وشه
ابتسامة غُمري ما شوفتها في حياتي.

نادر: وعملت إيه؟

إسماعيل: بقولك الراجل كفن نفسه، عايزني أمد إيدي تاني
بعد كده؟

نادر: عندك حق، ده الساعة بقت ١٢ يادوب أمشي

إسماعيل: مش هتاخذ رقم سند؟

نادر: سند مين؟

إسماعيل: التربي يا أستاذ

نادر: أه، أه صح

إسماعيل: أدي الورقة فيها العنوان بتاعه وتليفون البقال
إللي تحت بيته

نادر: طب أقوله إيه لما أكلمه؟

إسماعيل: ما تقولش حاجة وما تروحلوش الليلة دي، بكرة الساعة ٩ بالليل تكون عنده أكون وصلتله وفهمته كل حاجة

نادر: يعني دلوقتي أقدر أروح؟

إسماعيل: أنت لازم تروح علشان ليلتك بكرة هتكون أطول ليلة وهتعوز تكون فايق جدًا طول ما أنت قاعد مع سند وتكون مركز في كل كلمة هيقولها لك

نادر: أنا مُتشكر جدًا يا عم إسماعيل، حضرتك تؤمرني بأي حاجة؟

إسماعيل: لا يا بني الأمر لله، ما تنسائيش في عديدين زي إيلي هتبعثهم لدكتور سامح

نادر: هو قالك دي كمان؟

إسماعيل: يا بني أنا محدش بيقولي حاجة، ربك مسخر إيلي بيلغني بكل حاجة

نادر: طب ما تقولي إيه إيلي هيحصل مع سند الثربي؟

إسماعيل: علم الغيب عنده وحده، بس ما تنساش ترتاح كويس النهاردة زي ما قولتلك علشان الليلة بكرة طويلة أوي، اتفضل مع ألف سلامة.

الفصل العاشر

(كيان مجهول)

ودّعت عم إسماعيل وخرجت وعندي مزيج جديد من المشاعر بيغلّب عليها الترقّب والقلق من لقائي بسند الثربي خصوصًا إن ليّا صولات وجولات مع المقابر وإليّ مش فاكّر يقدر يرجع للروايات إليّ فاتت وخصوصًا (رواية كساب).

كساب!!، هل ليه علاقة بكل ده وعايذ يرجعني المقابر ثاني؟، هل كل اللي بيحصل ده من أفعاله الشيطانية؟، أنا إزاي مباخدش بالي غير لما بمشي!!، كان مكتوب جزء من الكلمات على مدخل بيت عم إسماعيل!!، الكلمة المشتركة اللي شفتها عند الكل وهي (silpa)!!، معرفش ليه أنا المرة دي قلقان كده!.


وصلت البيت والساعة كانت واحدة بعد نُص الليل، دخلت الحمام أخذت دُش دافي كُنت في أُمس الحاجة ليه علشان محتاج أنزّل من على جسمي تعب وإرهاق الكام يوم إليّ فاتوا، وقفت تحت المية الدافية، مر وقت قد إيه معرفش، فوقت كان الحمام مش باين من كُتر بُخار المية إليّ ماليه، حسيت بحركة حواليا ماشوفتش حاجة مُحددة لكني شايف كيان تفاصيله مُبهمة بيتحرك في البُخار، بعدها سمعت

صوت أشبه بفحيح التعابين جاي من أكثر من اتجاه، بقيت أبص بسرعة كل ما أسمع الصوت أشوف الكيان ده بيتحرك بسرعة خاطفة جدًا، مديت رجلي علشان أخرج من البانيو، حاجة زقتني بمُنتهى الغُنف خبطتني في الحِيطة إللي ورايا في دماغي، بدأت الدنيا تلف بيّا، كُنت بحاول جاهدًا إني مافقدش الوعي، وشوفت الكيان المجهول واقف عند مراية الحمام، بعدها حسيت بسائل نازل من دماغي على رقبتني، ما احتاجتش كتير علشان أعرف إن ده دم لأنني شوفت الأرض تحت رجليا الدم بينقط عليها، ما حسيتش بنفسي غير وأنا بقع على الأرض.

معرفش مر عليا قد إيه وأنا فاقد الوعي، لما فوقت تحاملت على نفسي وقومت بصعوبة خرجت برة البانيو ووقفت أبص للمرايا إللي مكتوب عليها بالدم..

- لم ينتهِ الدرس يا غبي

- أوليس القبر ببعيد!



جُمَلَتِينِ مَشْ مَحْتَاجِ أَفْكَرِ كَثِيرِ عِلْشَانِ أَفْهَمِ مِينِ وَرَاهِمِ
وَ أَكِيدِ كَلِّكُمْ فَهَمْتُوا، مَرُوءَةٌ كَانَ عِنْدَهَا حَقٌّ، وَإِحْسَاسِي
وَحْدَسِي، كُلِّ حَاجَةٍ بِتَأَكُّدٍ إِنَّ الْمَلْعُونَ كَسَّابِ أَرْسَلِ أَحَدِ
جَنُودِهِ عِلْشَانِ يَبْتَ فِيَّا الرُّعْبِ وَيُعْطِلْنِي عَنْ تَكْمَلَةِ مَشْوَاري
وَنَجَاحِي.

فَتَحْتُ حَنْفِيَّةَ الْبَانِيُو عِلْشَانِ أَنْضَفَ مَكَانِ الدَّمِ وَغَسَلْتُ
الْمَرَايَا وَغَسَلْتُ رَاسِي مَكَانَ الْجَرَحِ وَرَوَحْتُ أَوْضَتِي إِيْتَرَمَيْتِ

على السرير، بصيت في الموبايل كانت الساعة خمسة الفجر.
ونمت، نمت علشان زي ما عم إسماعيل قالي وراك ليلة
طويلة معرفش هل كان يقصد إلي حصل في الحمام ولا
يقصد حاجات لسه هتحصلي الليلة دي عند سند الثربي، كلها
ساعات وكل حاجة هتبان.

الفصل الحادي عشر (الذراع الأخير)

صوت من بعيد بينادي عليًا.

صوت عارفه كويس بس مش قادر أميّز هو صوت مين.

صوت كأنه جاي من العالم الآخر.

صوت مليان ذكريات وحنين خدني معاه لبيتنا القديم وأنا
طفل صغير بلعب بالعجلة أم سّادات قدام البيت مستني
صوت أمي في أي وقت وهي بتقولي: بابا جه يا نادر اطلع
علشان نتغدى سوا، وبيجي بصوته يقول: يلا يا حبيبي
علشان ناكل سوا أنت عارف إني ما بحبش أتغدى من غيرك.
صوت دافي كان بيحتضني ومجرد ما أسمعته أحس
بالأمان.

صوت (مصطفى عبد الرحيم فودة)

أبويا إللي من بعد ما سابني كل حاجة اتعرت

الزهر، المستقبل، الحاضر والأمان.

صوت بيقول: اصحى يا نادر وراك شغل كتير يابني.

- صحيت بمُنتهى الهدوء والسعادة وصوت أبويا العذب

لسه بيتردد في وداني.

- صحيت ولقيت دموعي مغرقة المخدة، سقّوها دموع
الفقد، سقّوها دموع الحنين لأبويا، سقّوها دموع الفرحة
بسماع صوته بعد سنين من غيابه.

يمكن من المرات القليلة إللي أبدأ فيها يومي بالمشاعر
الجميلة دي، بصيت في الساعة كانت سبعة بالليل، نمت كثير
جدًا ويادوب أقوم ألبس وأنزل أروح لسند الثربي.

لبست و طلّعت الورقة إللي إدهالي عم إسماعيل واتصلت
بالرقم المكتوب ولو تفتكروا هو كان قايلي إن ده رقم البقال
إللي تحت بيت سند.

نادر: سلامو عليكموا، ممكن أكلم عم سند إللي ساكن في
الحارة هنا؟

البقال: حاضر يا بني، أقوله مين؟

نادر: قوله نادر فودة الصحفي إللي من طرف عم إسماعيل

البقال: طب هتستنى شوية ولا ترجع تتصل ثاني؟

نادر: لأ هتستنى

البقال: طيب، اطلع يا واد نادي لعمك سند من فوق

قوله في تليفون جايلك من واحد

اسمه.. اسمه.. نادر ولا معرفش إيه من طرف الحاج
إسماعيل.

فضلت مستني على التليفون أسمع حوارات وجمل
مُتداخلة من زباين البقال من عيّنة:

- رُبّع كيلو بسطرمة ياعم مُخْلِص

- حسابك تَقِل أوي يا أستاذ مُنِصِف

- صوت سِت بتقول جبت أكياس الفير أند لافلي ياعم
مُخْلِص؟

- يابنتي ما أنا مش عارف ده للقشرة ولا إيه بالضبط

- ياعم مُخْلِص ده كريم تفتيح أقسم بالله كريم تفتيح،
هتجيبه ولا أروح للصيدلية إللي في أول الشارع؟


- طب أصبري هسألك عليه تاني النهاردة

- الحلاوة بتاعت المرة إللي فاتت ماكنتش حلوة زي كل
مرة ياعم مُخْلِص

- جبت الجبنة البريزيدووووون ياعم مُخْلِص؟

- هو أنا أقدر ما أجبش طلباتك

- عاوزه كوز لانشون صلاح وعبد الفتاح
- ألف سلامة ياعم مُخلص.



«وفي وسط كل ده»

- ألو، مين معايا؟

نادر: أنا نادر ياعم سند بكلم حضرتك من طرف عم

إسماعيل والمفروض يكون قالك إني جايلك

سند: أه، أه قالي يابني تشرف وتانس، هتيجي إمتى؟

نادر: أنا لابس يادوب هنزل وهجيلك على طول

سند: قدامك حوالي قد إيه كده؟

نادر: مسافة السكة من عندي لعندك حوالي ساعة

سند: لأ ساعة إيه، خرينا يوم ثاني أنا عندي شغل دلوقتي

نادر: طب بكرة مناسب ليك؟

سند: بكرة أنا مسافر البلد أزور الحاجة

نادر: طب و العمل؟ أنا محتاج أقابلك ضروري

سند: بقولك إيه، تعرف تجيلي ٦ أكتوبر دلوقتي؟

نادر: أه طبعًا، أجي فين بالضبط؟

سند: اطلع على طريق الواحات أنا رايح الثرب إالي هناك

نادر: أيوة عارفها

سند: خلاص هستناك هناك، أول ما توصل هتعرف تجييني،

أي حد هتسأله ها يدلك

نادر: ماشي ياعم سند مع ألف سلامة.

نطيت في أول ميكروباص قابلني رايح ٦ أكتوبر و نزلت
ميدان جُهينة خدت عربية من هناك نزلتني قدام مقابر
الواحات.

«السلام عليكم دار قوم مؤمنين

أنثم السابقون ونحن بكم إن شاء الله لاحقون».

دخلت طبعًا كانت الدنيا ضلمة قابلت في وشّي واحد سألته
ألاقي عم سند الثربي فين؟

قالي: جوا في أوضة الاستراحة

نادر: إلهي هي فين دي؟

قالي: في وشك أهي يا أستاذ

شكرته وروحت على طول على الأوضة، لقيت ثلاثة رجاله
قاعدين قولتلهم عم سند موجود؟

واحد رد منهم قالي: اتفضل يا أستاذ نادر أنا سند.

سلمت عليهم و قعدت، جابولي كوباية شاي وخرج الإثنين
وتبقى عم سند.



سند: اتفضل يا سيدي اسأل إيلي أنت عاوزه كله، أنت
متوصي عليك من الغالي

نادر: هو حضرتك ها تدفن حد دلوقتي؟

سند: في واحد ميت ومستنينه يجي من اسكندرية
دلوقتي علشان أهله اشترطوا يتدفن مع أبوه، وتقدر تقول
إني قاعد معاك لحد ما الأمانة توصل، تحب أحكي أنا ولا
تسأل أنت؟

نادر: لا اتفضل احكي ياعم سند، وأنا لو عندي سؤال هسأله

سند: صل على إلهي هيشفع فيك

نادر: اللهم صل عليك يا بني

سند: شغلانتنا دي يا بني مش هقولك من أصعب الشغلانات
بس هقولك من أغربها، من كثر ما الواحد شاف ما بقتش
أستغرب أي حاجة، يعني مثلاً لو أنت قولتلي دلوقتي إنك
ميت وشبعان موت مش هكذبك، ولو قابلتني بكرة وقولتلي
إنك عمرك ما شوفتني قبل كده بردو مش هكذبك.

كلنا أموات، وكلنا عايشين في ملكوت الله..

شوفت الإثنين إلهي كانوا قاعدين من شوية دول وقاموا؟
دول ثرية زيي، عارف كانوا بيحكولي إيه قبل ما أنت
تيجي؟

نادر: إيه؟


سند: إحنا قبل ما بندفن أي حد لازم نفتح الثربة ننصفها
ونمهدا علشان تكون جاهزة للضيف الجديد، لما فتحوا
الثربة الإثنين سمعوا صوت بيقول: ابني فين؟!

واحد منهم إترعب والتاني رد بتلقائية: على وصول يا حاج

واستأذنوا الإثنين علشان يجهزوا المكان إللي هيتدفن فيه، وبعد ما خلصوا وهما خارجين نفس الصوت قالهم: ما تأخروش ابني عليّا.

موضوع إن إحنا نسمع أصوات في المقابر ده عادي جدّا، في مرة كُنت بالليل بشقّر على الثرب وكان معايا فانوس شغال بالجاز وسمعت صوت واحدة ست بتقول: اقفل باب الستر يا سند!

أنا جتتي اتلبشت، بصيت حواليا يمين و شمال أدور على مصدر الصوت مش لاقى، سمعت خبطة شديدة جاية من مكان قريب، جريت ناحية صوت الخبط لقيت ثربة مفتوحة و طالع من جواها نور بيترعش، قربت بحذر شديد لقيت برة الثربة كفن متقطع ومرمي قربت أكثر ووطيت بصيت شوفت أكثر منظر مُرعب في حياتي، كانت واحدة ست لسه مدفونة وعريانة تمامًا وواحد قاعد جنبها و معاه قلم عمّال يرسم على جسمها! المنظر خلع قلبي، زعقت بأعلى صوتي بتعمل إيه يا ملعون؟



الراجل طلع يجري وزقني وقعني وهرب، سمعت الصوت
اتكرر ثاني «استرني يا سند»، جيت أشيل الكفن كان متقطع
ومتهربد قومت قالع الجلابية ورميتها على الميتة، شديت
باب الثربة و قفلته وطلعت أجري على الجامع إالي جنب
الثرب وإالي اتصلى عليها فيه، حكيت للشيخ كل إالي حصل
فاتصل ببناتها.

مفيش نص ساعة كانوا كلهم موجودين والشيخ قالهم

أَمَّكُوا لَازِم تَتَغَسَّل تَانِي، وَبَعْتَ الشَّيْخ جَاب مَغْسَلَة أَنَا أَعْرِفَهَا
كُويَس اسْمَهَا إِحْسَان.

دَخَلْنَا الثَّرْبَة وَطَلَّعْنَا الْجُثَّة أَقْسَم لَكَ بِالله الْجُثَّة كَانَتْ
بَتْتَرَعَش وَإِحْنَا شَايَلِينَهَا وَ كُنْتُ سَامِعْلَهَا صَوْت زِي مَا تَكُون
بَتْعِيْط، وَ جَرِينَا بِيهَا عَلَى أَوْضَة فِي الْجَامِع وَ الْمَغْسَلَة خَدَتْ
بَنَاتَهَا وَ قَفَلُوا عَلَى نَفْسِهِمْ بَاب الْأَوْضَة وَأَنَا وَالشَّيْخ وَقَفْنَا
بَرَة، مَفِيْش دَقَائِق وَ سَمِعْنَا وَاحِدَة مِنْ بَنَاتَهَا بَتَصَوْت وَ صَوْت
الْمَغْسَلَة عَمَّالَة تَسْتَغْفِر بِصَوْت عَالِي، دَقِيقَتَيْن كَمَا ن وَ سَمِعْنَا
الْمَغْسَلَة عَمَّالَة تَقُول:

أَعُوذُ بِالله، أَعُوذُ بِالله، حَسْبِي اللهُ وَنَعَمْ الْوَكِيل.

الْمَغْسَلَة وَارَبَتْ الْبَاب وَقَالَتْ لِي أَنَا عَاوِزَة مِيَّة كَثِير أُوِي إِلِّي
بِيَحْصَل جَوَا صَعْب أُوِي يَاعَم سَنْد، قَوْلْتَلَهَا فِي إِيَه يَابَتْ يَا
إِحْسَان؟

قَالَتْ لِي: شَرِّ كَبِير أُوِي يَاعَم سَنْد شَرِّ كَبِير، اَمْلَالِي جَرَادَل
وَهَاتَهَا وَ شَغَلْ قَرَّانَ الْجَامِع وَعَلِّي الصَّوْت.

خَدَتْ مِنْ مِيَّة وَقَفَلَتْ عَلَيْهِمْ وَ قَفَلَتْ عَلَيْهِم الْأَوْضَة
تَانِي، شَوِيَّة وَابْنَتْ صَوْت تَانِي وَ فَتَحَتْ الْبَاب وَ طَلَعَتْ
تَجْرِي فِي الشَّارِع وَ أَخْتَهَا مِنْ وَرَاهَا، غَضَبَ عَنِّي مِنْ غَيْر مَا
أَقْصَد لَمَحْتُ بِطَرْفٍ عَيْنِي الْأَرْضَ فِي الْأَوْضَة مِنْ جَوَا

كانت كلها سوداا سودااا كأنها اتصبغت بلون أسود، قلبي
دق بسرعة وقولت لإحسان هتعملي إيه لوحدك في المصيبة
دي؟

إحسان: وأي مصيبة ياعم سند، سيبنى أخلص و لما أطلع
لازم تحكي لي أنت شوفت إيه.

دخلت إحسان الأوضة تاني وغابت فوق الساعتين، فتحت
الباب وطلبت مئا ندخل نشيل الميتة، دخلت أنا و شيخ
الجامع الأوضة كانت زي ما تكون كان فيها حريقة، الكراسي
و الحيطان عليهم هباب أسود، محدش علق و شلناها إحنا
الثلاثة وطلعنا بيها على الثرب ومن حُسن الحظ إن الجامع
جوا المقابر فمحدث شافنا و لا دري باللي بنعمله، فتحت
الثربة تاني ودخلناها ونيمناها على القبلة و لقيت القلم إالي
كان الملعون بيكتب بيه، رميته برة الثربة و وقفنا دعيئالها
وقفلنا الثربة و رocht جبت من الاستراحة شوية أسمنت
خلطتهم بمية و قفلت الباب من برة على المسكينة أحسن
الملعون ده يجيلها تاني.

نادر: ماعرفتوش مين إالي عمل كده ياعم سند؟

سند: أهو واحد من أعوان إبليس لا عنده دين ولا دم ولا
احترام لحرمة ميت، كل إالي عاوزه يعمل السحر بتاعه و لو
على حساب آلام الأحياء و الأموات.

نادر: إحسان حِكْتِكَ شافت إيه جوا ياعم سند؟

سند: ما رضيتش يابني أبدًا، وما قالتش غير دي أسرار بيني و بين الميتة بس أنا حابة أقولك ياعم سند إنها بتقولك «سترتني في رقدتي ربنا يسترك».

نادر: وكملت عادي شُغْلِكَ ياعم سند؟

سند: وكملت وهكمل لحد ما أترمي زيهم في رقدتي الأخيرة.

نادر: احكي لي كمان ياعم سند شكلك عندك كتير و أنا عاوز أسمع و أسجل حكاياتك.

سند: طب صلِ على النبي

نادر: اللهم صلِ عليك يا سيدنا النبي

سند: طب زيد النبي صلاة

نادر: اللهم صلِ عليه وعلى كل الأنبياء المُختارين

سند: مانساش يوم كُنت بدفن شاب مات بسكتة قلبية يا قلب أمه، جُم يصحوه لقيوه ميت.

يومها المقابر كانت حزينة حرفيًا من الحزن والصويت عليه.

لكن كله كوم و أبوه كوم ثاني، الراجل كان ما بينطقش،
كان في عالم ثاني، ساكت، أخرس، ما بينزلوش دمة واحدة،
لما استلمت الجثة و دخلت بيها الثربة نزل أبوه معايا وكان
ما بيعملش حاجة غير إنه قاعد يطبطب على ابنه زي ما
يكون طفل صغير...

نيمناه في اتجاه القبلة على جنبه اليمين وجينا نُخرج لقيت
الراجل كشف وش ابنه و حط ودنه جنب وش ابنه و قال:

- حاضر يا حبيبي

- حاضر يا قلب أبوك

- بس ماتخافش من أي حاجة هنا

- اللقا قَرَب يا ضنايا أوي

- لأ يا حبيبي مش هسيبك، بس أنت ادعيلي أعرف أوصل
لمكانتك دي لما ييجي آواني

- لأ ماتخافش ربك رحيم بينا أوي

- اوعى تنسى عملك معاك يحفظك ويحميك

- حاضر يا بني

- حاضر همشي.

أنا كُنت واقف يا أستاذ نادر مش عارف أعمل إيه مقدرش أقول إن الراجل اتجنن من الصدمة، لأن كلامه كان منطقي جدًا ومافيهوش أي حاجة تقول إنه مثلاً بيخرف.

كل إللي عملته إني وقفت أستناه لحد ما يخلص و بص و قالي: كتر ألف خيرك يابني.

وسندته وخرجنا برا الثربة ووقفنا ندعي وبعدها كالعادة انصرف الجميع...

تاني يوم يا أستاذ نادر جالي أصعب خبر وهو وفاة الأب بنفس الطريقة، جُم يصحوه لقيوه مات!

يومها روحت أدفنه وكُنت حزين جدًا على الأسرة إللي الحزن طرق بابها في أعز وأغلى إثنين عندهم.

لقيتني بدون تفكير بقول هدفنه جنب ابنه مش في أوضة تانية، لازم الراجل يكون جنب ابنه، وقعدت أسترجع الحوار و الكلام إللي سمعته على لسان الأب إمبراح.

وحصل أغرب شيء عمري في حياتي ما حكيته لحد.

فتحنا الثربة واستلمت الجثة ونزلتها مع إثنين من الأقارب للمتوفي ونيمناها على القبلة على جنبها اليمين.

عاوز تصدقني صدقني مش عاوز براحتك

نادر: حصل إيه ياعم سند؟

سند: جثة الابن لفت يابني لأن كان ضهره لأبوه، لف تمامًا
و بقى في وش أبوه وجهًا لوجه، وكأنه عاوز يُحضن أبوه و
يرحب بقدومه.



أنا وقفت مشلول مكاني مابقولش غير..

- إِنَّا لِلّٰهِ وَإِنَّا إِلَيْهِ رَاجِعُونَ

- إِنَّا لِلّٰهِ وَإِنَّا إِلَيْهِ رَاجِعُونَ

- إِنَّا لِلّٰهِ وَإِنَّا إِلَيْهِ رَاجِعُونَ

وشدّيت باب الثّربة و قولت لهم و أنا خارج...

- وإلتقى الأُحبة

- وإلتقى الأُحبة

- وإلتقى الأُحبة

الناس إلیّ كانت واقفة برا كلها انهارت من البكاء من
بُكائي.

ولحد النهاردة عمري ما حكيت الموضوع ده لحد.

بس في اليوم ده أنا أيقنت إن الموت غُمره ما كان الشيء
المُخيف إلیّ بعض مُدعي التدين بيحاولوا يوصلولنا مفهومه
المُربوع ومفهوم القبر وعذاب القبر.

أيقنت إن هناك خلف باب القبر شكل آخر للحياة.

وكل ما أحس بخنقة من الدنيا أفكر القصة دي، و يمكن
خلاص آن الآوان إني أحكيها للناس لعلهم يعيدوا الحسابات
والتفكير في كُل أمور الحياة الأولى قبل أن ينتقلوا للحياة

الثانية.

نادر: ربنا يرزقنا جميعاً بحُسن الخاتمة

سند: أمين، جاهز للحكاية إيلي بعد كده؟

نادر: حكاية مين؟

سند: حكاية سالم وإخواته

- كنت قاعد في الاستراحة كُنا المغرب و جت جُثة واحد اسمه سالم، فقولت للإثنين إيلي كانوا قاعدين هنا أنا حاسس إني ضغطي عالي، تقدرُوا تقومُوا أنتُوا بالمهمة دي وتسيبُونِي أرتاح؟ قالولي: تمام عادي مفيش مُشكلة.

- و خرجوا الإثنين وعدى يادوب رُبع ساعة ولقيت واحد منهم جاي يجري ووشه مخطوف وبيقولي: إلحق ياعم سند مصيبة، الميت مش راضي يدخل الثُربة!

سند: إزاي يعني؟ روح ياد ادفن أنت وإيلي معاك الميت وبطلوا عبط.

مساعد سند: والله ياعم سند الميت ما راضي يدخل الثُربة، كل أما نيجي ندخل بيه الثُربة يقوم خارج.

قومت يا أستاذ نادر و روحت معاه لقيت هرج و مرج شديد قدام باب الثُربة والنعش على الأرض والكل مستنيني

وبيبصولي كأن الحل عندي.

قولت ارفع النعش معايا ياد أنت وهو ومحدث غريب
يشيل النعش غير رجالتني

نادر: ليه طلبت إن محدش غريب يشيل النعش غير
رجالتك؟

سند: علشان ساعات بيكون في ناس مريضة بتفضل تحرك
في النعش وتزقه وتشده ويطلعوا يقولوا النعش كان طائر
بالميت، فأنا بقى قفلت الباب ده خالص.

نادر: وبعدين

سند: شلت أنا والإثنين الرجالة إيلي معايا وناديت واحد من
الغفر إيلي موجودين شال معانا.

إيلي حصل إن مش الميت إيلي رافض يدخل، القبر هو إيلي
كان رافض إن الميت يدخله.

نادر: حسيت بإيه؟

سند: سور يابني سور شفاف بقينا نخط فيه بيرجعنا لورا
و لما قاوحت وقولتلهم زُقوا يا رجالة شوفتك قدامي حاجة
سودا طويلة من الأرض للسقف واقفة ما بتتحركش زي ما
تكون هي إيلي مانعة دخول الميت، ولما قاوحت أكثر سمعت

صويت وبكاء ستات وأطفال و في وسط كل ده لقطت
جُملة: حرام عليك مشيه من هنا.

قولتلهم: بس خلاص كده.

نزلنا النعش على الأرض وزعقت في الناس إالي واقفعا
لقولت: الراجل ده القبر رافض دخوله و محدش يعرف
السبب غيركم أنتوا، أنتوا أهله وعارفين كويس مين مدفون
في القبر وليه رافض إن الميت يتدفن جنبه، اللهم بلغت اللهم
فاشهد.

واحد من وسط إالي واقفين قال بصوت عالي: أنا معايا
مفاتيح ثربنا، ممكن ندفنه عندنا؟

قولتله: ياريت

وفعلًا دفناه بمنتهى السلاسة في الثربة الثانية و بعد ما
دفناه وقفلنا الباب والشيخ قال: اسألوا لأخيكم التثبيت فإنه
الآن يُسأل، رجعت قولت تاني: مش معنى إنه اتدفن في
الثربة دي إن الموضوع اتحل، هقولها لكوا تاني شوفوا الراجل
ده عمل إيه و حلوا الموضوع.

بدأت الناس تتسرب واحد ورا الثاني و يروّحوا لحد ما
تبقى واحد جه وقالِي:

إللي أنت قولته صح، الراجل ده أخوه وولاده الإثنين ماتوا
في حادثة واتفنوا في الثربة دي و بدل ما ياخذ باله من
البنات اليتامى أكل ورثهم و قاطعهم و سابهم مش لاقيين
ياكلوا، فطبيعي إن أخوه وولاد أخوه يرفضوا إنه يتدفن
معاهم.

نادر: أعوذ بالله، هي الفلوس ممكن تخلي الإخوات تعمل
في بعض كده؟

سند: وأكثر يا بني، أنت أبوك عايش؟

نادر: لأ متوفي

سند: لو ليك يا بني إخوات بنات زودهم في ميراثهم شوية
وأنت راضي، دول غلبة وأنت مكان أبوك.

نادر: هعمل كده ياعم سند أوعدك هعمل كده

سند: تعرف إن أنا كُنت بصحى في نُص الليل على صوت
واحد بيُصرخ ويقول سامحني يا أخويا، الله أعلم ده حلم
ولا حقيقة بس زي ما قولتك في الأول أنا ما بقيتش
أستغرب أي حاجة.

نادر: إللي بعده

سند: ده أنت قلبك قوي بقى، هحكلك عن جنازة حصلت

وكانت مؤثرة جدًا، إحنا دفنا في مرة راجل قاعد.

نادر: قاعد! يعني إيه؟

سند: الحكاية في حد ذاتها مأسوية جدًا وبتحصل كثير، سابوا أبوهم مات وشبع موت ومحدث حتى فكر يشقّر عليه، الجيران شموا الريحه وكسروا الباب و دخلوا لقوا الراجل ميت على الكرسي وجسمه بدأ يتحلل، بلغوا ولاده الكل حاول يتكلم على الموضوع على قد ما يقدرُوا فكانت النتيجة إن الجثة جت متيبسة وحاطينها في كيس أشبه بكيس الزبالة ومحدث حضر الجنازة، ولما نزلت علشان أستلم الجثة كانت صدمة عمري، الراجل ملفوف في الكيس و هو قاعد ومتغرق كمية فورمالين مش طبيعية، واحد من إللي كانوا جايين معاه قالي: أرجوك إكرام الميت دفنه، المرحوم مالوش ذنب إن ولاده ماعندهمش أصل ونسيوا إن ليهم أب وكُنّا إحنا جيرانه إللي مُتكفلين بيه، وحابب أقولك حاجة محدش من ولاده جه معانا، كل إللي عملوه بعتولنا ظرف فيه ٣٠٠٠ جنية وكرتونة مصاحف نوزعها في العزا إللي بردو مش هيحضروه.



سند: أحكيك على حاجة كمان يابني ولا أكلمك حد يجي
يحكيهاك بنفسه؟

نادر: هو أنا هلاقي ثربي أحسن منك، احكي أنت

سند: ما هو أصله مش ثربي، إللي هطلبهولك ترزي الميتين

نادر: وهو الميتين كمان بقى ليهم ترزي؟

سند: هو مش كلنا لما بنموت بيتفصلنا كفن يابني؟ أنا

هكلمك ترزي الميتين يحكيك على حاجة كده سمعتها منه
قبل كده.

وبالفعل نده عم سند على واحد من المُساعدين بتوعه و
قاله: معاك يا ولا نمره إبراهيم الترزي

المُساعد: أيوة ياعم الحاج

سند: اديها للأستاذ نادر علشان هيطلبه

المُساعد: اتفضل يا أستاذ نادر الرقم أهو.

طلبت الرقم واديت عم سند التليفون..

سند: ألو، إزيك ياد يا إبراهيم

- إزيك ياد وإزاي أمك وأبوك

- بس يا ضلالي

- محمول بتاعي إيه؟!

- هو أنا لاقى أكل، أنت فاكرنى على قلبى فلوس زيك

- القصد، معايا ضيف خُذ كلمه واحكيه على الحاجات إللي

حكيتها لنا الجمعة إللي قبل إللي فاتت لما كُنا سهرانيين في

الاستراحة إللي هنا في الثرب

- وأنت مالك شغال إيه!

- أنت تعمل إلهي أقولك عليه وأنت ساكت

- أيوة شاطر كده بدل ما أكلم أمك دلوقتي أخليها تطيين
عيشتك

- خُد أهو

نادر: أيوة يا أستاذ إبراهيم

- إزاي حضرتك

إبراهيم الترزي: الحمد لله في نعمة يا أستاذ

نادر: احكي لي إلهي عم سند بيقول عليه ده يا اسطى
إبراهيم

إبراهيم: الله يسامحه عم سند هو إلهي سقاني ترزي
الميتيين، خليني أحكيلك عن حاجة هو لسه مايعرفهاش..

- أول إمبارح دخلت الأوضة إلهي فيها السندرة إلهي فيها
الأكفان إلهي شاريها.

- لقيتها لك مفتوحة والأكفان كلها واقعة في الأرض ما عدا
كفن واحد لقите متعلق على الشماعة ورا الباب كأنه حد
واقف.

نادر: و ده معناه إيه؟

إبراهيم: إن هو إلي عليه الدور أستعمله

نادر: واستعملته؟

إبراهيم: وحياتك بعدها بئس ساعة كان الخبر جالي

نادر: إيه كمان

إبراهيم: أكثر من عشرين مرة يجيلي في المنام ناس
معرفهمش ويقولولي: جهزلنا الكفن بتاعنا!



تاني يوم يجيلي خبر حد مات وأهله عاوزينله كفن، ولما بالصدفة أشوف صورة الميت ألاقيه نفس إللي جالي في المنام لدرجة إني اتعودت خلاص، ولما الميت مايجيليش في المنام قبل موته بليلة أقلق وأشك إني عملت حاجة غلط حرمتني من الرؤية دي.

وفي مرة عيلة واحد ميت خدوا مني ستة أكفان مش مع بعض، كل شوية يطلبوا كفن لحد ما كملوهم ستة، ولما سألت

اتقالي: أنت مالك؟! أنت ليك تاخذ الفلوس بتاعتك وأنت ساكت.

نادر: ومعرفتش السبب بردو؟

إبراهيم: لأ طبعًا، عرفت وهي دي تفوتني

- بيقولك الميت كان جسمه عمّال يرشح مية سودا من كل جسمه ومحدثش عارف السبب.

- الحكاية إيلي هحكيها لك دي هي إيلي خلت عم سند يطلبني ليك

نادر: إيه هي؟

إبراهيم: لقيت كفن مُستعمل في دولاب هدومي ولا أعرف جه إزاي ولا أعرف كفن مين، بس كان كفن هلكان ودايب و فضلت من بعد مالقيته يجيلي في المنام واحدة ست ناكشة شعرها وبتفتح الدولاب بتاعي تاخذ الكفن القديم و تقرب مني وأنا نايم وتلفه على دماغى ووشي وعاوزة تفتسنى بيه، مابطلتش أشوف الكابوس ده غير لما إديته لعم سند دفنه.

نادر: ومعرفتش إيه إيلي حطه عندك؟

إبراهيم: عرفت

نادر: مين؟

إبراهيم: اسأل إلهي جنبك

نادر: يعني إيه؟

إبراهيم: هو إلهي غفلني وحطه في الدولاب عندي

نادر: مش فاهم هو كان بيعمل فيك مقلب ولا إيه؟

إبراهيم: بقولك اسأله هو يقولك، أنا هستأذن علشان ورايا شغل.

نادر: تمام يا إبراهيم مُتشكر جدًا مع ألف سلامة.

توجهت بنظري لعم سند وسألته.

نادر: هو إيه حكاية الكفن إلهي أنت حطيته في دولاب إبراهيم الترزي؟

سند: ده عيل مهبول، أنت هتصدقه؟

نادر: أه مصدقه، بس إلهي مش فاهمه أنت ليه تعمل كده، أنت عايزه يتلبس مثلاً؟

سند: ولا يتلبس ولا حاجة، هو الكفن هيطلع عفاريت؟!

نادر: كفن مين ياعم سند؟

سند: كفن الست إلهي حكيتك عليها في الأول إلهي لقيت
الملعون بيكتب على جسمها الطلاسم.

نادر: مش فاهم بردو عملت كده ليه؟

سند: الصراحة علشان أخلص

نادر: هو أنا ليه حاسس إن في حاجة أنت مخبئها عليا.

سند: الصراحة أه، أنا في حاجة شايلها على قلبي ومحتاج
أحكيها علشان أرتاح

نادر: اعتبرني ابنك يا عم سند واحكي لي

سند: بس يبقى سر بيني وبينك

نادر: ربنا يسهل

سند: إحنا بعد ما دفنّا الست إياها، أنا شلت الكفن في كيس
اسود وخطيته في الاستراحة و نسيتته، بعدها بيومين كنت
بشقر في الثرب وراجع الاستراحة وأنا برة حسيت بحركة
غريبة، اتسحبت ودخلت لقيت واحد بيسرق الكيس إلهي فيه
الكفن المتقطع، هجمت عليه و طبقت في زُمارة رقبته لحد
ما داخ ووقع في الأرض، ببص على وشه لقيته الملعون إلهي
كان بيكتب على جسم الميتة، اتمكنت وقومت رازعه بالقلم،
فاق وكان مرعوب وطلع من جيبه زُرم فلوس

و قالى: دول خمس ألاف جنية دول نصيبك وكُنت
جايبهملك.



سند: نصيبى فى إيه يا حرامى يا دجال يا نصاب
الدجال: تمن حفاظك على الكفن المدة إالى فانت، خُذ
الفلوس دى نصيبك

سند: أنا مش فاهم حاجة

الدجال: خليك معايا وهتكسب آلافات زيها كل يوم، أقولك على حاجة كمان؟ أنا هخفلك مراتك من السرطان

سند: أنت عرفت مين إن جمالات عندها سرطان؟

الدجال: أنا بأطلع على كل حاجة، خليك معايا هتكسب

سند: هتخفف مراتي؟ ده بجد؟

الدجال: جربني

سند: طب إيه المطلوب مني؟

الدجال: أولاً، تاخد الفلوس دي تصرفها تتهنى بيها أنت ومراتك وعيالك

ثانيًا: تتفد كل إلی هطلبه منك بعد كده

ثالثًا: تاخد الكفن ده تحطه عند واحد تعرفه متجوز ولسه ماخلفش علشان يعمل بدل للمرض بين مراته وبين مراتك.

أول حد جه في دماغي كان إبراهيم التريزي، رocht زورته وسهيته ودفست الكفن وسط هدومه من غير ما أفكر إلی بعمله ده هيو ديني فين.

صرفت الفلوس وجبت للعيال ومراتي حاجات وبعد يومين

قابلت إبراهيم التريزي ضدفة في الشارع كان وشه أسود من
الحزن، قولتله: مالك؟

قالي: مراتي جالها المرض الخبيث.

في اللحظة دي حسيت بسعادة لأنني أيقنت إن كده مراتي
بتخف، ليلتها وأنا في الاستراحة إالي في الثرب لقيت
الدجال بيفتح عليا الباب وداخل وبيقولي:

الدجال: عندنا شغل الليلة

سند: إيه المطلوب؟

الدجال: ثراب من تحت هيت ودراع تكسره وتخلطه
بالثراب ده

سند: دراع مين إالي أكسره؟!

الدجال: دراع أي جثة

سند: تقصد هيكل عظمي يعني؟

الدجال: بقولك جثة لسه فيها شحم ولحم، تُسلخ الدراع و
تطحن العضم و تخلطه بالثراب إالي تحت الجثة و تحطهولي
في العلبة دي

سند: أنا هفتحلك ثربة وتعمل إالي أنت عاوزه

الدجال: لأ يا حبيبي أنت هتعمل إيلي أنا عاوزه، وأنا هقعدهنا أشرب كوباية الشاي وأعدلك الخمس آلاف الجُداد لحد ما تيجي.

بصراحة جُملة إن في خمس آلاف جنية تانيين بنّجت ضميري للمرة الثانية، خدت مفاتيح الثرب وطلعت أدور على الضحية الجديدة.

كان في جُثة راجل عجوز لسه مدفونة ما بقالهاش أسبوع، بكل بجاجة خبّطت على الباب ودخلت وبكل بجاجة قعدت قدام الجُثة وقولت لها: لا مؤاخذه ياعم الحاج الحيّ أبقى من الميت، أنت كده كده أكيد في الجنة ونعيمها و مش هيفرق معاك حتة ذراع ناقص، طّلت من جيبى سكينة جاييها معايا و كشفت الكفن، الريحه كانت لا تُحتمل، تعمدت ما أكشفش وشه، طلعت ذراعه برة و بدأت أنشر بالسكينة من عند الكوع، إحساس التقطيع نفسه كان بينخور في جسمي وعضمي وحاسس بذبذبات التقطيع بتجتاح كل جوارحي.

فضلت أنشر بالسكينة لحد ما وصلت للعضم، بدأت أدق بيها زي الجزار ما بيدق على عضم الديبحة علشان يكسره، كان باقي جزء صغير و السكينة تَلّمت و مش عاوزه تكسره، قومت ماسك الذراع و كاسره زي ما يكون بكسر ورك فرخة.

نادر: يا نهارك أسود، أنت جبت الجبروت ده منين؟

تجاهل سند كلامي وكمل...



فضلت أحرك العضة يمين وشمال علشان تتقطع لحد ما
فعلاً إتكسرت والذراع اتقطع وبقى في إيدي.

بتلفت لقيت الميت قاعد والكفن نازل من على وشه
ومغطيه دود كثير، عينيه مش موجودة و مكانها دود عمال

يخرج من الفتحتين وبوقه مفتوح على الآخر و طالع منه صوت حشرة مُرْعِب، رفع ذراعه الثاني بيحاول ياخذ مني ذراعه الأولاني، أنا من الصدمة اتشليت مكاني وبكل بجاجة بردو استعازت بالله من الشيطان الرجيم.

طبق في رقبتني بذراعه إللي باقي وحاول يقف لكنه معرفش بسبب تكتيفة الكفن لرجليه، فاتكعبل ووقع فوقني رقدني على الأرض و بقى وشه في وشي والدود عمال ينزل من وشه و يدخل جوا عنيا و يخترق وداني بسرعة رهيبة.

حاولت أزقه من فوقني لكنه كان ثقيل جدًا وشالل حركتي، الدود لما دخل وداني كنت بسمع صرخات كأنها جاية من جهنم و لما دخل في عنيا شوقت مكان أسود الأرض بتاعته عبارة عن جمر مُلتهب أسود اللون بيفور وحسيت بحرارة رهيبة بتاكل في جسمي كله، وسمعت صوت مُخيف بيقولني:

- يا ويلك يا نابش القبور هنا مكانك

- اتقي الله قبل أن تُسحق هنا.



اتبدل المشهد ولقيتني نايم في أرض الثربة والدرع
المقطوع على بطني والجثة متكفنة وراقدة زي ماهي.

خدت الدراع وطلّعت من جيبى العلبة إالي الدجال إدهالي
ومديت إيدي تحت كفن قديم موجود وخذت رمل وثراب
مليت بيهم العلبة و خرجت و قفلت الثربة ورجعت الأوضة
للدجال لكني مالقيتهوش!

بس لقيت على الكنبه الخمس آلاف جنية، أنت عارف يا

أستاذ نادر الخمس آلاف جنية في أيامنا دي يقدرُوا يعملُوا
إيه؟

يعملُوا كتير، أنا مش ببرر لنفسي الجريمة إللي عملتها بس
بقولك أنا وقتها كُنت بفكر إزاي.

نادر: كَمَلْ يا عم سند كَمَلْ

سند: لفيت الدراع في كيس أسود وخدته ورّوحت.

كانوا كلهم نايمين في البيت، خدت الدراع ودخلت الحمام
وجبت معايا سَكينة من المطبخ وبدأت أشقى الدراع، خلصت
تقريبًا نُصه وباب الحمام خبط!

سند: مين؟

جملات مراتي: إلحقني يا سند أنا تعبانة أوي

سند: حاضر أنا طالعك حالًا.

شَلت الدراع بالبقايا بتاعته في الكيس ودلقت مية في
الأرض ونَصّفت المكان بالمسّاحة بسرعة وجريت فتحت
الباب لقيت مراتي مرمية في الأرض.

رميت الكيس من إيدي وشَلتها دخلتها الأوضة، إللي أنا
ملاحظه إن مراتي حالتها كانت بتسوء، فضلت جنبها لحد ما
فاقت وأول ما فتحت عينيها انفجرت في العياط و قالتلي:

أنا هموت قريب يا سند

سند: ماتقوليش كده، أمال الفلوس إيلي أنا بجيبها دي
هعالج بيها مين؟

جملات: أنا هموت قريب يا سند، أنا شوفت حلم وحش
أوي

سند: خير اللهم أجعله خير

جملات: شوفتك في ثربة بتاكل دراع واحد ميت وبعد ما
كلت وخلصت حطيت في الكفن خمس آلاف جنية، وقفلت
عليه الثربة وخرجت.

سند (مُرتبًا): إيه التخريف إيلي بتقوليه ده، ده أكيد
بسبب الدوا

جملات: أنت بتعمل إيه يا سند؟

سند: بعمل إيه في إيه؟

جملات: أنت فاهمني كويس، إيه إيلي بتعمله خلاني أشوف
الكابوس ده وخلي حال البيت غم على طول وخلي الورم
يتمكن مني؟

سند: أنتي هتخفي، افتكري كلامي كويس

جملات: كله على الله، لما أموت بالله عليك ما تدخلش
البيت قرش حرام

سند: نامي أنتي وارتاحي والصبح نكمل كلامنا.

أدركت في اللحظة دي إني سايب الشنطة إلكي فيها الدراع
على باب الحمام، خرجت أجري من أوضة النوم وروحت عند
الحمام ما لقيتش الشنطة!

دخلت بصيت في أوض عيالي لقيتهم في سابع نومة كنت
هتجنن، في اللحظة دي باب الشقة خبط، روحت فتحت
لقيت آخر حد كنت أتوقعه، الدجال!

سند: أنت بتعمل إيه هنا؟ وعرفت عنواني مين؟

الدجال: أسئلة ملهاش لازمة، فين الأمانة؟

سند: ضاعت

الدجال: نعم يا روح...!!!

سند: أقسم لك بالله الدراع ضاع

الدجال: قسم مايلزمنيش ولا أحب أسمع

سند: تعالى أوديك الثربة وأوريك بنفسك إن الدراع
مقطوع من الجثة، بالأمانة علبة الثراب موجودة معايا.

الدجال: فين الأمانة يا سند؟

سند: بقولك ضاعت، ضاعت أنت مابتفهمش؟

الدجال: لم لسانك و ادخل هات الأمانة بدل ما تندم عمرك
كله، أنا عملت إيلي عليا واديتك الفلوس

سند: و ليه ما يكونش أنت إيلي سرقت الدراع، والله ما
أستبعدها

الدجال (غاضبًا): قولتك متقولش القسم ده ثاني

سند: أمال أحلفك بإيه؟

الدجال: احلف بسلطة و سطوة سيلبا

سند: وده يطلع إيه ده؟!

الدجال: مولانا إبليس العظيم

سند: مولاك أنت

الدجال (ضاحكًا): تكونش فاكر إن الفلوس إيلي بديهاك
بجيبها من حسابي في البنك؟

سند: يعني إيه؟ هو مش أنت بتعمل سحر وأعمال وتاخذ
من الناس فلوس؟

الدجال (ضاحكًا بصوت عالي): فلوس مين يا جاهل و

ناس مين يا غبي؟ إحنا كلنا موجودين لخدمة الكيان الأعظم
إللي بيديره مهندس الكون سيلبا الأعظم

سند: أنا مش فاهم حاجة، أنت إيه؟

الدجال: أنا إللي هندمك عمرك كله على خيانتك

سند: روح في ستين داهية، أنت وسيلبا بتاعك، أنا من يوم
ما شوفت خلقتك ماشوفتش غير الهم والحزن وربنا بعثلي
إشارة على لسان الغلبانة مراتي، أعوذ بالله منك أنت وإللي
زيك وربنا يسامحني على المصايب إللي عملتها و أنا بجري
ورا الفلوس.

الدجال (ضاحكًا): سقطت في الامتحان يا إنسان والعقاب
في الحمام

سند: أنت مش ممكن تكون بني آدم

الدجال: وعرفتها لوحدك؟

بدأ وشه يتمط بالطول وفضل يطول وإيديه فضلت تطول
لحد ما وصلت للأرض وشعره بدأ يتساقط لحد ما اتحول
لمسخ دميم، و مد إيده وغرسها في بطني ورفعني عن
الأرض وحدفني بكل عنف، اترميت وخبطت في باب الحمام
إللي كان مقفول فتفتح وشوفت مشهد رهيب عمري ما

بنسأه، شوفت مراتي قاعدة في أرض الحمام و حواليتها كمية
فلوس ملهاش حصر، وماسكة دراع الجثة إالي كان ضايع
وبتأكله و نازل من بوقها دود مالي الأرض، مجرد ما شافتني
أصدرت أصوات زي ما أكون قدام كلب سمران و بفكر أخذ
منه العضمة.

أنا فضلت مرمي في الأرض بنزف من بطني لحد ما هي
خلصت أكل الدراع كله، وبدأت تلم الدود إالي في الأرض
وتأكله بنهم شديد.



وقامت وقفت وعدت من فوقى و غابت دقيقتين ورجعت
معاها إيد الهون إلي بتعمل بيه الكفتة ونزلت دق في عضم
الذراع، مع كل خبطة كانت بتخبطها على العضم كُنت بسمع
صرخات رجل رهيبة جدًا.

طحنت الذراع كله لحد ما بقى بودرة و جت عندي طلعت
علبة التراب من جيب جلابيتي وخلطت التراب بالعضم
المطحون وقامت وقفت و فضت العلبة كلها على دماغها

وجسمها.

أنا كُنت خلاص بطلّع في الروح وأخر حاجة شوفتها كانت
جسم مراتي وهو بيترعش بعُنف وهي مرمية في الأرض
وبترجّع من بوقها دود بكميات رهيبة.

أنا بعد كدة غِبت عن الوعي تمامًا.

فوقت لقيتني في المُستشفى و أختي جنبي بتعيط
وبتقول: البقية في حياتك يا سند ياخويا مراتك الغلبانة
ماتت.

اتجننت وفضلت أصرُخ وأزعق وأقول:

إزاي... إزاي... إزاي.....

دخل الدكتور في اللحظة دي وقال..

الطبيب: أنت اتكتبلك عُمر جديد

سند: مراتي ماتت إزاي يا دكتور؟

الطبيب: تسريب غاز

سند: لأ ماكانش في غاز متسرب

الطبيب: ده تقرير الطب الشرعي يا عم سند وأنت ما موتش

علشان كُنت جنب الحمام مش جوا

سند: بس دي كلت دراع الجثة ورميت على نفسها مخلوط
ثراب الثربة وعضم الميت وشوفت الدود بيطلع من كل حته
في جسمها

أخت سند: إيه ياخويا إيلي بتقوله ده بس؟

الطبيب: معلىش سيبه، كل دي هلاوس بسبب كمية الغاز
إيلي استنشقتها، كلها يومين وتخرج وهتبقى أحسن إن شاء
الله

سند: و مراتي؟

أخت سند: اتدفنت ياخويا

سند: وعيالي؟

أخت سند: عندي في البيت ياخويا.

نادر (مقاطعًا): يعني كل ده كان تهيئات؟

سند: وقتها مكنش عندي إجابة، لكن بعدها عرفت واتأكدت
لما كلمت إبراهيم الترزي وقولتله روح افتح دولابك و شوف
في كفن قديم ولا لأ؟

و فعلاً لقاه زي ما قالك في التليفون.

- كان باقي حاجة واحدة بس هي إيلي هتأكدي كل حاجة

نادر: تنزل الثربة تشوف دراع الجثة مقطوع ولا لأ؟

سند: بالضبط

نادر: و لقيت إيه؟

قاطعنا صوت جاي من برة بيقول:

الجنابة جت ياعم سند يلا علشان ندفن الميت

سند: أستاذنك يا أستاذ نادر، الشغل وجب

نادر: طب قولي قبل ما تمشي لقيت الجثة كاملة ولا من غير دراع؟

سند: أشوفك على خير يا أستاذ نادر

نادر: طب أستاذناك بعد ما تدفن تيجي تقولي؟

سند: مع السلامة يا أستاذ نادر

نادر (بنبرة كلها يأس): ليه مش عاوز تقولي طيب؟

سند: علشان لو قولتلك باقي إيلي عندي الدجال مش

هيسيبك

نادر: أنا مش عايز أعرف غير إجابة سؤال واحد بس
وعمال أعيدهولك، جاوبني وهمشي ومش هتشوفني ثاني
أبدًا.

سند: اللهم باعد بين هذا المتوفي وبين خطاياہ كما باعدت بين المشرق والمغرب. كلنا أموات، افكر دائماً الكلمتين دول صوته بدأ ينخفض وهو بيدعي لأنه كان يبعد عن غرفة الإستراحة (إستراحة الموتى).

مشي عم سند وسابلي سؤال مالوش إجابة.

مشي عم سند وزيه زي إلی فاتوا إداني دروس أولهم: إن طريق الجشع نهايته الهلاك

وأخرهم: إن مش دائماً النهايات لازم تكون مريحة ومش لازم أبداً تكون سعيدة..

بعدت أصوات الناس، وفضلت أنا جوا الإستراحة لوحدي، حالة لا مبالة سيطرت عليا، حالة سكون رهيب سادت الأجواء حواليا، قلبي إتقبض فجأة والخوف إحتل قلبي وعقلي، وجه في بالي حوار الدجال مع عم سند وخصوصاً اسم silpa، افكرت!!، ده كان على بليزر نحاس وأنا افكرته ماركة البليزرا، كان مكتوب على البرواز عند راضية وعند دكتور بيتر، وعلى شنة دكتور سامح!، وقاله عم حمدي، وكان مكتوب على مدخل بيت عم إسماعيل!!، خرجت زي المجنون من الإستراحة وأنا بدعي وبقول يارب اللي في بالي يطلع غلط، ولما خرجت، لقيت نفسي في وسط المقابر،

سكون تام يخلع القلب من مكانه، أصوات كثير في ودني وجوايا، أصوات كل الناس اللي قابلتهم!، صوت مروة بنت خالتي وهي بتحذرنني من كساب، وصوت كساب نفسه وهو بيتوعدني أنه مش هيسيبني!!..

حطيت إيدي على دماغي من الحيرة والذهول، فضلت أتلفت حوالين نفسي، فجأة الإستراحة نفسها إختفت!!، ولقيت حاجتي مرمية على الأرض!!، ده يأكد حاجة واحدة بس، هي إن كل إللي قابلتهم أموات، حتى عم سند، كان كلامه صح، كلنا أموات!!، وإن الكل عايش في ملكوت الله، بس.. بس إيه نتيجة كل ده!!، أنا هتجنن..

كنت في حالة يرثى لها، مزيج من الذهول والخوف والتخبط والجنون وعدم الفهم، رميت نفسي بثقل جسمي على الأرض جنب أدواتي، كنت حاسس إن رجليا مش شايلاني، لكني حاولت أَلِم حاجتي لأني لازم أمشي، ما هو مش معقول هفضل قاعد في وسط المقابر.

وفجأة ؛ تليفوني رن، رقم غريب، معرفش إيه خلاني أرد، حاجة جوايا قالت لي لازم ترد، ولما رديت سمعت صوت ضحكة بسخرية أنا عارفها كويس، صوت ضحكة كساب!!!..

جسمي إتخشب، ماكنتش عارف أنطق ولا مصدق نفسي إن اللي بسمعه ده حقيقي، قطع حيرتي وهو بيقول:

كسّاب (بسخرية): إوعى تفكر إني هسيبك، وعلشان بحبك جبتك هنا، المقابر عشان موتك ساعتك جت، وكمان تُدفن على طول من غير بهدله، ده لأني بحبك أوي يا نادر، أنا اللي عملت لك لعنة الأموات، وكل إلهي إنت مريت بيه ده تحت سيطرتي أنا، أسهل حاجة بيحتاجها الواحد هي أرواح نجسة، عاشت طول حياتها تسعى لده، استعداد لأن نهايتك هتبدأ حالاً.

- قفل في وشي السكة، وحسيت إن جسمي بيتنفض وبقي تلج، أصوات كتير مرعبة كسرت السكون، وخيالات بدأت تتحرك من حواليا، كنت شايفها على كل شواهد القبور إلهي فجأة بدأت تتفتح ويخرج منها خيالات أكثر!!، وبدأت كل الخيالات تتجمع جوا بعض، كأنهم بيكونوا أو بيشكلوا كيان واحد، كنت فاقد السيطرة على نفسي تمامًا، جسمي بيترعش ومش عارف حتى أبلع ريقى ولا أرمش من كُتر الخوف، غمضت عنيًا، وسبحان من ألهمني وقدرت أعاند نفسي وخوفي وفضلت أردد آيات من القرآن، ومسكت شنطتي وخطيت إيدي على المصحف وفضلت مكمل في ترتيل الآيات، لحد ما فجأة سمعت صرخة مدوية تخلع القلب وتنشف الدم، فتحت عيني لقيت كيان عظيم وكبير قدام عيني، ومرة واحدة تلاشى!!!، زي ما تلمح عربية ماشية

بسرعة رهيبة، بلعت ريقى بصعوبة، وخذت أدواتي وجريت
زي الهربانيين، ومعرفش إزاي رجعت البيت!!، أول ما دخلت،
جريت على مذكرات نحّاس، بدأت أفنط الورق بدقة أكثر،
ولقيت ورقة متهاكة ومتطبقة، وكان مكتوب فيها:

نحّاس: أنا فوقت لنفسي، وده خلى النهاية أقرب، وعشان
كده هعترف، لازم أخلص ضميري، أنا وهما عملنا كل شئ
غلط، أنا نقلت الأموات اللي مش هيتسأل عليهم لا راحوا
فين ولا جم منين، وحمدي خباهم في تلاجته، ودكتور
بيتر كان بيشرحهم ويخرج أعضائهم بمعاونة دكتور سامح،
وإسماعيل المغسل كان بيقوم بمهمته على أكمل وجه عشان
يحفظ السر، لأن الجثث دي بردو بتتغسل، أما سند فكان ليه
الباقى، لو حد احتاج يعمل عمل ولا يدفن سحر، وكان الخير
بيغم على الكل، أنا النهارده بخلص ضميري، يمكن كلامي ده
يوصل للشخص اللي أنا وصيت راضية مراتي إنها تحكيه
وتديله المذكرات، لعل وعسى ده يخفف عني، وأكون عملت
حاجة واحدة بس صح في حياتي، ولعلمهم هما كمان يفوقوا،
يمكن لو تابوا زي ما أنا توبت، يتكشف المستور، ويرد
الأرواح المعذبة لسبيلها.

- كنت بقرأ وأنا في قمة الذهول ومش مستوعب إللي
بقراه، وبسأل نفسي إزاي ما شوفتش الورقة دي، ولقيت

إجابة نابعة من قلبي: أكيد لأن ربنا رايد إن أفعال الشيطان دي كلها تتكشف، وزي ما قال كساب بردو، إن الأرواح بتاعتهم كانت نجسة، وهو قدر من خلالها يلاعبي عشان يجنني ويوصلني للموت، لكنه نسي أهم حاجة، إن مهما بلغ مكر ودهاء الإنسان، ومهما استعان بأقوى الشياطين، فربنا أقوى من أي شئ، وليه القدرة المطلقة في خلقه وتدابير الكون، وعشان كده ألهمني إني أقدر أكمل وأكشف كل الحقيقة، ونجاني من تدابير كساب وشياطينه، ويمكن ألهمهم كمان التوبة والإعتراف بالذنوب اللي عملوها، وعشان كده، حكولي كل حاجة بطريقة مش مباشرة، عشان أقدر أكمل الطريق، ولما وصلت لسند، إداني مربوط الفرس زي ما بيقولوا.

تليفوني رن بصوت رسالة، فتحتها وقريتها وأنا حاسس بإحساس الظافر المنتصر، لأن الرسالة كانت من كساب، ونص الرسالة:

(قدرت تفلت المرادي، لكن أوعدك إن لسه فيه جولات كتير جاية مش هتقدر تفلت منها أبداً، أنت لسه ما شوفتش حاجة يا نادر، وبكرة نشوف مين إلكي هيضحك في الآخر)..

من غير أي تأجيل، قعدت وأنا جوايا حماسة وشغف وكملت باقي التحقيق وخلصته، وأنا كُلي أمل وإستعداد

للجولة إالى جاية مع كساب..

وإلى لقاء ليس بقريب

كان معكم نادر مصطفى عبدالرحيم فودة.

نقله لكم الإعلامى أحمد يونس.

...Bonus from Ahmad youness

عزيزي القاريء:

الجزء الجاي ده افصل نفسك تمامًا

عن العمل بالكامل وأنت بتقراه.

أو حتى قوم اعمل كوباية شاي

أو فنجان قهوه و اقراه....

الغد المخيف (الوريث)

المستقبل..

مبقاش في حاجة إسمها دول العالم..!

أيوه زي ما قرأتم كده..

مبقاش في حاجه إسمها دول العالم..

كل الحدود بين الدول إختفت..

كله بقى دولة واحدة كبيرة ولها مجلس رئاسي عالمي..

الهدف كانُ صنع السلام بين شعوب الأرض وخصوصًا بعد لما

إكتشفنا إن معظم الحروب إللي كانت بتحصل كانت بسبب

أطماع كل دولة في الدولة الثانية..

بداية الإندماج بين الدول كانت من سنين فاتت لما هاجمت

العالم أزمة اقتصادية رهيبة حصلتش قبل كده.. مات كتير من سكان الأرض وإتعذب الأغلبية ما بين جوع أو مرض أو فقر..

باع أغلب سكان العالم أملاكهم وإنخفضت بشدة قيمة العقارات والأراضي وزادت أسعار الاكل والشرب..

بدأنا نسمع عن دعوات ومطالب بثورة جياع.. كان في بركان من الغضب بين كل الشعوب والأفراد.. اضطرابات في كل مكان وفي كل حقة.. حرايق في كل مكان إلتهمت الأراضي والحيوانات وشردت كتير من البشر.. فيروس خطير جديد بيموت بسببه ملايين المواطنين وخسائر مادية تُقدر بمليارات الدولارات.

حروب وصراعات في معظم الدول وكوارث طبيعية في كل مكان..

بسرعة إتجمعت حكومات العالم علشان يبحثوا عن حل سريع لحل الأزمة قبل ما تحصل ثورة الجياع لأنها لو إنطلقت فمفيش مخلوق على كوكب الارض يقدر يوقفها ووقتها دي هتكون نهاية العالم حرفياً..

إتجمعت حكومة الولايات المتحدة وحكومات الشرق الأوسط و أوروبا و آسيا وكل القارات لحل الأزمة وبعد

مشاورات ونقاشات كثيرة تم الإتفاق على دمج كل دول العالم في كيان عملاق مشترك وبدأ السلام والأمان يرجع ثاني، بس خلال كل ده وفي وقت إنشغال البشر كان في خطر رهيب بيقرّب منا من غير ما نشعر..!

ومن هنا تبتدي قصتنا...

حدث في 2050

بعد لما ساد الإستقرار والسلام العالمي وبدأنا نعيش في حالة إزدهار ورفاهية كبيرة فجأة تطبيق إنتشر جداً غطى على واتساب في العالم وكل حاجة مشابهه وبيدي فلوس ومكافآت وسفر وفسح بشكل رهيب.. كله ساب واتساب والمكالمات وإتجهوا له..

التطبيق كان اسمه (no sam)....

مجرد ما بتشترك فيه بيعت ليك فلوس وهدايا مجانية.. وكل لما تبعت لحد إنه يشترك كان بيجي ليك فلوس أكثر كمان.

في لحظة العالم كله مبقاش له سيرة غير سيرة التطبيق ده والفلوس إالي بتيجي من وراه.. الموضوع كان جميل ومغري ومحدثش كان بيفكر كثير.. الكل كان بيشترك والكل كان بيحمله والفلوس كانت بتيجي للناس كل يوم في ميعاد

معين.. كل يوم الساعة ستة وست دقائق وست ثواني كان
يتم توزيع المكافآت على المشتركين..

لغاية لما في إتبعنت من التطبيق رسالة مفادها إنك
هيجيلك رسالة صوتية ليلة رأس السنة، جمعُ أسرتك و
اسمعوها كلكم مع بعض وممكن تكسبوا مليون دولار..!

الدنيا بتتقلب طبعاً والإعلام بيتكلم عن الرسالة الغامضة
دي والميلون دولار إللي ممكن الناس تكسبها بمجرد تنفيذ
شروط بسيطة..؟!

محدثش كان مصدق بس الناس طلعت تقول إن التطبيق
بيعمل كده علشان يزود إنتشاره و إن ده نوع من أنواع
الدعاية والإعلان..

طبعاً كان في معارضين رافضين التطبيق وبدؤا يحذروا
الناس منه ويقولوا إنه تطبيق مريب و بيوزع فلوس بشكل
هستيري و أكيد وراه حاجة أو سر غامض..؟!

وسط كل المؤيدين والمعارضين للي بيحصل كانت الأيام
بتمر وليلة رأس السنة أو الليلة الموعودة لوصول الرسالة
بتقرب هي كمان والكل على أحر من الجمر وعاوز يعرف
مين إللي هيكسب الفلوس دي وإيه مضمون الرسالة إللي
هتتبعنت..؟!

ليلة رأس السنة وتحديدًا الساعة ستة وست دقائق وست
ثواني، يبجي الفويس والكل بيجمع أفراد أسرته ويسمعوا
سوا.. بس ثاني يوم كلنا بنكشف الكارثة..!!!

تلت سكان العالم إختفوا..!

أيوه.. صحينا كلنا وإكتشفنا إن عدد تلت سكان العالم
مبقاش لهم وجود.. إختفوا بلا أثر وبلا أي دليل هما إختفوا
راحوا فين وحصل لهم إيه.. إختفوا بدون أثر وبشكل مرعب
مستحيل كان حد يتوقعه.. هل هما عايشين ولا ميتين..
مفيش حد عارف.

رجع المعارضين يربطوا بين الرسالة والتطبيق والإختفاء..
الكل بيخاف وبينتشر الهلع بين الناس..

يا ترى الدور على مين..؟

بس بعد مرور ست أيام من الحادثة دي بتيجي رسالة ثانية
بمكافأة أكبر ١٠٠ مليون دولار..!!!

المفروض كانت الناس المرة دي تمسح التطبيق لكن الناس
كانت زي المسحورة باللي بيحصل والطمع كان مخليهم
مش شايفين الحقيقة أو شايفين الخطر وبدؤا يجمعوا
بعض ويتنظروا الرسالة الصوتية.. وبعدها وزى المرة الأولى
بيختفي الملايين وأسر كاملة بتختفي بدون أثر..!

وسط كل إلهي بيحصل من رعب وغموض بيظهر شاب
بتاع تكنولوجيا إسمه (كريم) بيقدر يفك شفرة الفويس
ويتتبع كل حاجة ويقدر يوصل لوثائق سرية ويمشي ورا
الأحداث علشان نكتشف في الآخر إن فضائيين بالإتفاق مع
الماسونية بيأسروا أكبر عدد من البشر بالفويس ده علشان
الماسونية ماقدروش في الماضي يحققوا المليار الذهبي،
فبيعملوا حاجة إسمها صفقة النهاية، وبينتجوا تطبيق no
sam(((إلهي إسمه عكس حروف كلمة ماسون، وعن طريق
الفويس ده وبشكل ما بيخطفوهم ويحطوهم في سجون
كونية علشان يحققوا المليار الذهبي..!

(كريم) بيكتشف إن مشروع المليار الذهبي الماسونية
قديم جداً وكانوا شغالين عليه من سنين طويلة، وهدفهم
القضاء على كل البشر والإبقاء بس على مليار إنسان يتم
إختيارهم، فأساس المشروع يقول علشان نعيش حياة
طبيعية لازم يكون عددنا مليار إنسان، الباقي ملهمش قيمة
على الأرض، والمفروض يموتوا أو يتم قتلهم بلا رحمة..

(كريم) بيكتشف كمان إن الحروب إلهي كانت بتحصل على
مر القرون إلهي فانت كانت من أهم خطط المليار الذهبي،
وخصوصاً إن كل ما بقى فيه حروب أكثر، كل ما مات بشر
أكثر، كل ما قدر الماسونيين إنهم يحققوا أهدافهم.. مثلاً في

الحرب العالمية الأولى الأرض خسرت 2% من عدد سكان الأرض، وفي الحرب العالمية الثانية مات أكثر 20 مليون إنسان.. وبعد الحرب العالمية الثانية الأرض بقت مستقرة، وبقي تعداد سكان الدول يزيد، وهنا كان لازم يفكروا في خطة بديلة، والخطة دي تكون أقوى، ومن هنا بدأوا يخططوا لحروب الفيروسات والأمراض إلكي مالهاش علاج، وأخيراً لجأ الماسونين للإتفاق مع فضائيين عن طريق إنهم ينشروا التطبيق المريب ده، وبعدها بيأسروا أكبر عدد من البشر بالفويس ده، وأطلق على الصفقة دي إسم (صفقة النهاية)..!

(كريم) بعد رحلة طويلة ومخاطر عظيمة بيتعرض لها بيقدر يفك اللغز ده ويكشف المؤامرة، وبيتم إستعادة الأسرى إلكي بيحكوا عن إنهم مجرد ما سمعوا الفويس فقدوا الوعي وصحيوا لقوا أنفسهم مساجين في سجون فضائية داخل منطقة إسمها (أرض العدم)..!

بعد القضاء على المخطط الماسوني بيتم إستضافة كريم و تكريمة من كل حكومات العالم ومنحه أعلى القلادات و الأوسمة وبيصبح مثل أعلى لكل الشباب بس رغم كده كان إنسان متواضع وذكي لأقصى درجة ممكنة..!

في نهاية رسالتي المستقبلية خلوني أقول لكم إن أوقات

في تاريخ الأمم والعالم بتحصل فترات مظلمة.. فترات
الناس بتحس فيها باليأس وإنعدام الأمل.. فترات بيحسوا
فيها بالخوف والرعب.. بس في وسط كل ده وفي وسط
العتمة والضلمة والخوف دي بيظهر ناس بيقدروا ينوروا
الطريق لكل البشرية وينقذوها في أحلك اللحظات..

ومن حُسن حظنا إن ظهر في الوقت ده شاب أنقذ كل
البشرية..

الشاب ده كان إسمه كريم..

كريم نادر فودة..

إبن الصحفي والمحقق العظيم

نادر فودة.

صورة حقيقية مسربة لمذكرات نحاس

مذكرات نحاس ...

مش عرفت أبداً منين أنا لا بعرف أكتب مذكرات
ولا عمري مسكنت ورقه وقلم كتبت هاجمة غير تهاجم
تسليم الصابون والذموات .

بس هكتب ، هكتب أحسن ما يقولوا علينا مجنون ،
هكتب يمكن حد يصدق ، هكتب قبل ما أموت
نفسي أو حد منهم يموتني .

أنا اسمي نحاس ، ماشي في التسعة وأربعين سنة ،
بشتغل مُسفف بقالي زيادة عن خمستاشر سنة ،
لو قولت إني نقلت ألف هاجمة مش هكون كذاب
إن منهم ٩٠٠ هالة وفاة ، ده أنا زمايلي في الشغل
سموني (نحاس الموت علينا حق) .

أنا وصلت لمرحلة إن كل ما بيخيلنا بلاغ بمحادثة
ويكون في الوردية بتاعتي بروج وأنا متأكد إني مش
هلاقي ولا واحد عايش وهلاقيهم كلهم ميتين .
مش ده المهم ، المهم إلحج لهلكيه دلوقتي ..

القصة بدأت بحادثة كبيرة على الأوتوستراد كانت
ميكرو باص و عربية نقل ، لما وصلنا لقيناهم كلهم
ماتوا ماعدا شيخ كبير عمره فوق الثمانين سنة كان
يلفظ أنفاسه الأخيرة وإعنا بنشيله كان عمال

يقول : الأمانة منقولة .. الأمانة منقولة ،

الأمانة منقولة ، وشاور بإيده بولمن وضعف
شديد قربت ودي منه قلبي : اقبلها يا بني اقبلها

قولتله : هي إيه يا حاج ؟

الشيخ : بالله عليك اقبلها دي أمانة ومستولية

نحاس : حاضر يا حاج ماتعشش نفسك بس

والهدى خالص .

كان رده عليا :

أشهد أن لا إله إلا الله .. وأشهد أن محمد رسول الله

ومات ! مات وسبابي ألفز مش فاهمه وإللي

اكتشفتم إن المسعف إلي كان معايا

ماسمعش أي حاجة من الكلام ده !

ده كمان بيحلف لي إني كنت بكلم نفسي

وان الراجل ميت من وقت ما وصلنا .

طلعنا على القسم عملنا المحضر المعتاد وإلاي بنعمله

دايماً في الحوارث ومنه طلعنا للتلاجة مسلمنا الجتامين

و كان ميعاد ورديتي خلص وروحت ، أقدر أقول

إن من اليوم ده حياتي اتبدلت ١٨٠ درجة و البداية

كانت بأعلام كثير جداً كل ليلة بالشيخ إالي كان في

الحادثة ، الأعلام كانت عبارة عن إعادة كل إالي

حصل من وقت ما روحت مكان الحادثة لحد ما

سلمت الجنة ورسايل تانية غير مفهومة .

لحد ما في يوم كنت بتقل جنة واحد وواحدة من

بيتهم ، إالي حصل واحدنا في الطريق وزمياي

السواق جنبني فجأة زغرودة جت من مكان الجنة أنا

مرفياً موتت في جلدي لدرجة إني مابقبتش عارف

أطلق وصببت لزيمياي لقيته مركز في الطريق

وكانه ماسمفش أي حاجة ،

فمكشش قدامي غير إني ألترم الصمت ، مفيشش دقيقة
أو دقيقتين بالكثير وانطلقت الزغرودة الثانية ،
صرخت في زميائي و قولتله أنت مش سامع إلابي
بيحصل ؟ قالي : لا مش سامع هاجت

مكشش الجملة و إذ بصوت طبلح و دفوف وزغاريد
ينطلق من عند الجئت ، إلفت ورايا لقيت الجتين
قاعدين ! صرخت في زميائي و طلبت منه يوقف
العريية ، نزلت أجري من العريية و فتحت الباب
إلابي ورا لقيت الجئت نائمة على السرير زي ما
مطناهم بالضبط و زميائي مفيشش على لسانه
غير أنت إقلبست يا نحاس ، أنت إقلبست يا نحاس ،
حلفت ما أنا مكمل المشوار في العريية ، قولتله
اسبقني وحقصلك بالواصلات .

إلابي عرفت بعد كده إن الإيتين دول كانوا عرمان
ومالوا بتسريب غاز يوم فرهم .

ده كان أول موقف أعرض له و بدأت المواقف

تالني مرة كنا بننقل جُتة بنت مانت في انهار عقار،
 إحنا نقلنا في الحارثة دي جُتة كثير ودي كانت آخر
 جُتة ، كُنت يومها أنا إلهي سايف العربية و زميلي
 جنبي لأنك كان مطبق و دريتين فرضت عليه إني
 أسوق و وافق ، في عز كلامنا أنا وهو سمعت خبط
 من وراء البفت ورايا زي المجنون مفيش حاجة ،
 فكمليت سواقة سمعت صوت واحدة بنت بتقول :
 بنتي لسه هناك ، البفت بسرعة لزميلي وقولتله
 مش معقولة تكون مش سامع إلهي أنا سامع ؟
 فجاويني بنفس الرد بتاع المرة إلهي قالت إنه مش
 سامع أي حاجة ، لحد ما وصلنا الجُتة للتلاجة
 واستلمها العامل منا وأنا مابسمش غير "بنتي لسه
 هناك" بشكل متكرر و مستفز لدرجة إن أنا زعقت
 وأنا واقف في الشارع خلاص عرفت ، خلاص
 عرفت ، ارحميني .

ورجعت بسرعة لمكان العقار المنهار و قولت لاي

موجودين هناك لقيتوا جثة ثانية ؟

فكان ردهم ان الجثة الاي انا خدتها كانت اخر جثة

في المكان كله .

قولتلهم مستحيل . في جثة لسه ما طلعتش لبنت

الست الاي كانت معايا . و بعد نقاش استمر لعدة

دقايق اقنعتهم يكملوا تنقيب و كانت المفاجأة انهم

فعاد طلّعوا جثة بنت في اوالل العشرينات و كلهم في

عينهم ونظراتهم تساؤلات كثير ليا مش لاقين لها

اجابة . انا نفسي مش لاقى اجابة .

و توالت الحوادث واستمر تواصل الأزمات الاي

بنقلهم معايا .

كنت أنا وزميلي بنقل واحدة بنت جالها غيبوبة

مُتَر بالليل متأخر . و كان زميلي مشغل

كعازته أم كلثوم .

وابن الست كان ورانا بعريته والمرضىة ورا ..
كنت مندمج جداً مع أم كلثوم وهي تقول :

بعد حين يبدل الحب دازه

والعصافير تهجر الأوكاز

وديار كانت قد بما ديار

وسمعت وسط الأغنية صوت نهية ويكا، منخفض

فقلت لزيمبي : أنت مهيب إيه في الأغنية ؟

قالي : مهيب إيه مش فاهم ؟

نحاس : مخاي واحدة تعيط جوا الأغنية !

زيمبي : إيه ده ! هو أنا ما بيتربايش ؟!

نحاس : لا يا هويا ، هو ده مش أنت إلهي عامله ؟

زيمبي : أقسم بالله الشريط ده موجود على طول

بتاع هذه ليلتي وأول مرة أسمع العياط ده

جوا الأغنية .

وفي عز كلامنا ، بصيت بالصدفة ورا ،

لَقِيتِ السِّتَ قَامَتِ قَعَدَتْ وَشَدَتْ مَامَكِ

الْأَكْسَجِينَ مِنْ عَالِي وَشَهَا ، وَالتَفَتَتْ لِي وَبَعَزَمَ

مَا فِيهَا هَدَفَتْ مَامَكِ الْأَكْسَجِينَ بِالْخَرْطُومِ بِنَاعِهِ

عَلِيًّا ، أَنَا وَطَيْتُ بِمَحْرَكَةٍ لَا إِرَادِيَّةَ وَمِنْ غَيْرِ مَا أَقْصَدَ

غَبَطْتُ زَمْيَايَ فَقَرَمَلِحَ بِسُرْعَةٍ .

إِلْتَفَتَتْ وَرَأَى لَقِيتِ السِّتَ نَائِمَةً زَيْ مَاهِي وَالمَامَكِ

عَالِي وَشَهَا !!!

لَا نَزَلْنَا عَلِيشَانَ نَدْخَلُهَا الطَّوَارِي لَقِيتِ المَامَكِ

مَفْضُولَ عَنْ أَتْبَوِيَّةِ الْأَكْسَجِينَ أَوْ تَحْدِيدًا مَقْطُوعَ

بِفَعْلٍ فَاعِلٍ !

رَبَّنَا سَنَرِ وَالسِّتَ مَا كُنْتُمْ مَاتَتْ يَوْمَهَا .

مَشَى لَهْنَسِي فِي مَرَّةٍ لَا كُنْتُ بِنَقْلِ جُتَّةٍ رَاجِلٍ

مَرَاتِهِ قَتَلْتُهُ ،

طَوَّلَ الطَّرِيفَ هَرْفِيًّا كُنْتُ بِسَمْعِ أَفْطَحَ شَتَائِمَ مِنْ

جُتَّةِ الرَّاجِلِ وَتَهْدِيدَاتٍ لِيَا إِنَّهُ لَهْيَجِيَايَ وَبَطْلَعِ

عَالِي جَنْتِي الْبِلَادِ .

انتوا متخيلين هل في بني أرم يتحمل إلي

أنا أحملته ده ؟!

الموضوع عمال يزير و أنا عالتى بتسوء و قدمت طلب

إني أنقل لذي وظيفة مكتيبة واني منقلتش لا جئت

و لا مصابين تاني ، قدمت الطلب ده تحديدأ بعد

حادثة معينة حسيت بعدها إني لو منسحبتش هتجنن

ده إذا كنت لسه ما إجتنتش أصلا ، الحادثة دي كانت

في عز الشتاء والجو كان مقيم و الدنيا قالت هاتك يا

مطيرة وابلغنا إن في أتوبس شركة عمل حادثة مع

عربية نقل ، لما وصلنا شوفت منظر غريب جدا ،

شوفت كل الصابين واقفين على الرصيف

وغرقانين في دهمم ودا بيتحركوا ودا بيعملوا أي

عاجزة ، جريت عليهم أسألهم و أحاول أساعدهم

محدث فيهم رد عليا

لأنهم منومين مغناطيسيا ،

لقيت زميالي جاي من درايا بيقولي : أنت واقف

بتهيب إيه عندك هو أنا هتسيل الميتين دول

كلهم لوحدي ؟

قولتلهم أريك قولت ميتين مش أول تشوف المصابين

دول الأول نظمن عليهم

رد عليا : مصابين مين ؟ كل إلهي في الحادثة ماتوا

قولتلهم : سلامه نظرك أمان دول مين ؟ و

تاورت على إلهي واقفين على الرصيف ولقيتهم

كلهم مبنسين .

قالي : هو إنا مش هنبطل شغل المجانين ده بقى ؟

مش قد الشغلانة يا نحاس سيدها ، الرصيف فاضي

مفيش عليه أي حد و الجثث كلها مرمية على

الأرض قدامك .

كل الجثث إلهي في الأرض كانت تُسحق طبقت

الأصل من إلهي واقفين على الرصيف فأيقنت

إن هالتي بتسو ، لأني لازم أمسك الشغلانة دي .

ليلتها لما روعت البيت كنت واخذ القرار بأن أنقل
من العمل الميداني ده أو أسيدب الشغلانة خالص .
حكيت لراضية مراتي كل إلهي حصل من أول ما
شرفت الشيخ لح الحادثة الأخيرة فكان مدحا : بلاش
تتكلم مع حد وما تقطعش عيشك بإيدك .
دخلت إترميت على السرير وأنا مش عارف إيه
القرار الصح إلهي لازم يتاخذ ، معرفش نمت قد إيه
لكني صحت مخوف مش قادر أنفس مش قادر
حتى أمد إيدي أجيب المية إلهي جنبني أشربها ،
وفي وسط الضلعة شايف ناس كثير واقفة في
الأوضة واقفين زي التماثيل مش عارف أشوف
ملاح وشوشهم من الضلعة لكن شايف قبيبتهم
كوس و عددقم إلهي يتجاوز عشر أفراد ،
بصعوبة بالغة قدرت أحرك إيدي و مديتها للأباجورة
علشان أنور الأوضة ياروب لمست الزرار والأباجورة
نورت و حسيت بإيد متلجة قبضت على إيدي .

لما الأوضة نورت مفيش حاجة اغتفت زي
 ما بتقولوا في كتب الحواريات بالعكس كل حاجة بقت
 أوضع ، نفس الجئت إلهي كانت على الرصيف
 متلطفة بلدم واقفين حوالين السرير وداهد منهم
 هو إلهي كان ماسك إيدي علقان ما أنورش
 الأباهورة ، أنتوا متخيلين الموقف ؟
 تخيل نفسك نام على السرير وتصحى تلاقى أكثر
 من عشر جئت واقفين حوالين السرير ومحاولين
 وكلهم عندهم الباردة الخالية من الحياة متسلطة
 عليك ، أنا معرفش المفروض الواحد في الموقف
 إلهي زي كده يعمل إيه ويتصرف إزاي !
 كل إلهي عمله إني قرئت بعض آيات من القرآن
 فكان رد فعلهم إنهم إتكلما كلهم مع بعض بصوت
 واحد عميق مُخيف كأنه هاي من الجحيم
 وقالوا :

لا تترك الأمانة ، لا تترك الأمانة ، لا تترك الأمانة
وفتحوا الباب وخرجوا واحد وراء الثاني ، طبقا لمحدث
شاف ولا سمع غيري كالعادة ، وهنا كان قرارني
النهائي إلى هسيب الشغل أو هتغل
والذي يحصل يحصل .

دلوقتي أنا بالفعل انتقلت وسبت المجال المبداني كله
وكننت فأكرا إن هورده العلاج بس للأسف إلي
أدركنه مؤخرًا إلى فتحت على نفسي باب من
أبواب جهنم . بعد ما كننت بشوف الميتين
و بسامع أصواتهم في عريضة الإسعاف ، دلوقتي بقيت
بشوفهم في كل مكان حوالي و بعد ما كانوا مجرد إنهم
بيوصلوني رسالة أو استغاثة دلوقتي بقوا يعذبوني
نفسيا و جسديا ليل نهار ويا كدولي إن الأمانة
انقلبيت عليا بعد ما خونتها وإن إلي باقي في عمري
مجرد أيام ، حاولت أدارك الأمر و أرجع للشغل
المبداني ثاني لكن للأسف

الوضع ما تغير مش والموت بيطاردوني و كأنهم بيتنقموا
من ملك الموت في شخصي و بعد ما كنت أنا أهد
أذرع ملك الموت لتوصيل الموتى للمتلاجات بقيت
ضحية لأرواح خبيثة قررت إن هي تسلمني لملك
الموت بمنتهى البطء الرهيب .

أنا معرفش علاج إلهي عندي ده إيه ، أنا مش عاوز
أموت ولا مُستعد للمواجهة دي دلوقتي .
دي آخر حاجة بكتبها و إلهي يقع في إيده المذكرات
دي أكيد هيكون بيقرأها وأنا ميت وهنصعلك
نصيحته ، مش كل أمانة تقدر تحملها
ونكون أمناء عليها ..
انتهت مُذكراتي ..

النجاس ..